

তিব মাহিয়া পত্ৰিকা

বিশ্বপ্ৰিয়া মনিপুৰী সাহিত্য সভা, আমাম ।

১লা বছৰ, ১লা প্ৰকাশ, ১লা শ্রাবন, ১৪১০ সন, ১৮ই জুলাই, ২০০৩ইং, ১লা সংখ্যা ।



মূখ্য সম্পাদক
শ্ৰী গোপেন্দ্ৰ কুমাৰ সিংহ

চেয়াৰম্যান
শ্ৰী মনীন্দ্ৰ কুমাৰ সিংহ, গুৱাহাটী

Bishnupriya Manipuri Sahitya Sabha Patrika,
A quarterly magazine in Bishnupriya Manipuri language published by the
Bishnupriya Manipuri Sahitya Sabha,
H.O. - Kathal Road , Zero Point Lane, Silchar - 788005 (Assam)
Phone No. - 03842 - 241140

Printed at : 'The Choudhury Printers, Tarapur, Silchar -3

Price - Rupees 20/- (Twenty) only.

Cover designed by –
Shri Manindra Kr. Sinha, I.F.S. (Rtd.)


সম্পাদক মণ্ডলী	পরিচালক মণ্ডলী
মুখ্য সম্পাদক - গোপেন্দ্ৰ কুমাৰ সিংহ A.C.S.	চেয়ারম্যান - মণীন্দ্ৰ কুমাৰ সিংহ, Rtd. IFS, গুৱাহাটী।
সম্পাদক - ইন্দ্ৰ কুমাৰ সিংহ, নৱসিংপুৰ। (গল্প, নাটক, উপন্যাস)	পরিচালক - ডাঃ অশোক কুমাৰ সিংহ, শিলচৰ। (পৰিকল্পনা)
সম্পাদক - নৱেন্দ্ৰ চন্দ্ৰ সিংহ, সিঙ্গাৰী, শিলচৰ (কবিতা)	পরিচালক - মণিকান্ত সিংহ, দুধপুৰ। (প্ৰচাৰ)
কোষাধ্যক্ষ - অনিল কুমাৰ সিংহ, ৱেংটি।	সচিব - সুৱেন্দ্ৰ কুমাৰ সিংহ, চন্দ্ৰপুৰ। (বাণিজ্য)

— উপদেষ্টা মণ্ডলী —

গোকুল সেনা সিংহ - দুৰ্লভছড়া
অধ্যাপক বিমলকৃষ্ণ সিংহ - শিলচৰ
অধ্যাপক ব্ৰজেন্দ্ৰ কুমাৰ সিংহ - হাইলাকান্দি
অধ্যাপক ডঃ কালীপ্ৰসাদ সিংহ, Ph. D., D. Litt. - আসাম বিশ্ববিদ্যালয়, শিলচৰ।
সুশীল কুমাৰ সিংহ - প্ৰাক্তন ডিৰেক্টৰ, স্কুল এডুকেশ্বন, নাগালেণ্ড - শিলচৰ
অধ্যাপক নামদেব সিংহ - হাফলং
অধ্যাপক বাৰীন্দ্ৰ কুমাৰ সিংহ - শিলচৰ
এড্‌ভোকেট শ্ৰীমতি সুখজ্যোতি সিংহ - প্ৰাক্তন ৰাজ্যিক বিষয়া, সামাজিক শিক্ষা আসাম - গুৱাহাটী।

উৎসৰ্গ

আমাৰ সমাজৰ যে যে গিৰিগিথানী সারাজীবন সমাজৰ উন্নতিৰ হক
তাবাৰ শক্তি সামৰ্থল বিভিন্ন সংস্থাত থায়া সমাজ সেবা কৰিয়া গেলাগা,
দুই তিন বছৰৰ ভিতৰ গোবিন্দ সিংহ, ৰাণেন্দ্ৰ সিংহ - তিৰাখাল, কৃষ্ণমোহন
(চিল্লী) সিংহ - উনামগ্ৰাম, কুশধ্বজ সিংহ - পাথারকান্দি, লুনা সিংহ
বিলবাড়ী, প্ৰতাপগড়, মণিকান্ত সিংহ - সিন্ধাৰী, বীৰেন্দ্ৰ সিংহ, কামিনী
সিংহ - মোহনপুৰ, শেখৰ সিংহ - পাকইপাৰ, ইন্দ্ৰদমন সিংহ - নিত্যানন্দপুৰ,
ব্ৰজকান্ত সিংহ - লালা, হেমবাবু সিংহ - শিলচৰ, হাবিৰ গাজ ত্ৰিপুৱাৰ মন্ত্ৰী
বিমল সিংহ ৰাংত চিবকৰিয়া হাবি দো আগছিগা গিৰিগিথানীৰ নিঙ
বিষ্ণুপ্ৰিয়া মণিপুৰী সাহিত্য সভাৰ এ পত্ৰিকাখন কাত্‌কৰাবি অইল।



(শহীদ সুদেষ্ণার অন্তিম যাত্রা)

ইতিহাসে নিংশিঙ অনির দিনআহান

১৬ই মার্চ ১৯৯৬ ইং কলকলি ঘাটে সুদেষ্ণা গিথানক সমাজর সালে শহীদগো অইলী। তেইর মর-দেহগো করিমগঞ্জর জেলা শাসকরাংত সমাজর পক্ষত বিয়ুগপ্রিয়া মণিপুরী সাহিত্য সভার সভাপতি শ্রীগোকুল সেনা সিংহ গিরকে গ্রহণ করেছিল। তারে পাংলাক করলাতাই "ভূপেন্দ্র কুমার সিংহ বারো শ্রী গোপেন্দ্র কুমার সিংহ A.D.C. সভাপতি গিরকে সাংবাদিক সম্মেলন করিয়া হরকাঙ জাত আহানর গজে সরকারর অত্যাচারর গজে আকর্ষনীয় বক্তব্য থ'ছিল। পিছেদে মরদেহগো ফুল, ধুপআদিলো হাজেয়া শোভাযাত্রা করিয়া গাড়ীহানলো পাথারকান্দিত তিনখালে ফৌকরে দিলা। এহানাত চামটিল্লার "প্রফুল্ল সিংহ গিরকর অবদান যথেষ্ট।

দৈনিক সোনার কাছাড় পত্রিকার ক্যামেরা বন্দি সুদেষ্ণার ছবিহান প্রকাশ করলাং। ছবিহান যোগাড় করেছিলতাই নাট্যকার শ্রী ইন্দ্রকুমার সিংহ গিরকে।

“ইমা তোরে হমাদিয়ারে — ”

— সম্পাদনার কলমগৎ —

আমার সমাজের রথী মহারথী প্রতিভাবান সাহিত্যিক থাইতে বিষ্ণুপ্রিয়া মণিপুরী সাহিত্য সভা - পত্রিকা-হাব সম্পাদনা করাবির দায়িত্বহান মোর সাদে অর্বাচীৰ আগর গাজ, বর্তা দিলা । ১৯৮৪ - ৮৫ ইং সনে হংকারছি সাহিত্য সভা এহান ১৯৯০ ইং পেয়া হিংলা লয়ার প্রীযুক্ত গোকুলাসবা সিংহ গিরকর সভাপতিত্বত বিয়াম চাংখল অয়া চালছিল । অ, বি, সি, কমিশন, হাইকাট, সুপ্রীমকাট বারা বি:ম: স্টুডেন্টস্ ইউনিয়নর আন্দোলন জাতর ভাষার অস্তিত্বর কাজ এ সাহিত্য সভা সক্রিয়ভাবে সমাজর আর আর সংস্থার লাগে গেলগা যুগ এহাবাত অংশ বোছগা । ঔহান হাবি গিরিগিথাবীর হৃদিত বিষ্ণুপ্রিয়া মণিপুরী সাহিত্য সভার সম্পর্কে উচ্চ ধারণা আহান আছগা । ঔ বিঙ উহানল আরাবকো খাবি সাহিত্য সভাহান ঙালক বুলিল বিঙ এবাকার সুযোগ্য সভাপতি প্রীযুক্ত মণীন্দ্র কুমার সিংহ গিরকর ঐকান্তিক চেষ্টায় আজি এ পত্রিকা-হাব প্রকাশ পারতা । ঔহান গিরকর আন্তরিক প্রদ্বা বারা কৃতজ্ঞতা বাজাবয়া বুরারিয়ার ।

লাগে সাহিত্যর পয়লাকার সরকারী পেন্সন্ প্রাপ্ত আমার প্রাক্কয় কবি প্রীযুক্ত মদনমোহন মুখোপাধ্যায়, ২য় পেন্সন্ প্রাপ্ত লেখক প্রীযুক্ত ইন্দ্র কুমার সিংহ, কবির প্রীযুক্ত ব্রজেন্দ্র কুমার সিংহ, প্রীযুক্ত চন্দ্রকান্ত সিংহ, প্রীযুক্ত চন্দ্রমোহন রাজকুমার গিরক গাছিরে চিবকরিয়া যে যে গিরিগিথাবীরে অতি কম সময়র ভিতর লেখা দিয়াপঠাদিয়া পত্রিকা-হাবর পয়লা প্রকাশ এহান সার্থক করে দিলা, উতাকা তাবারও কৃতজ্ঞতা জাবয়ার ।

লেখকর লিখা প্রবন্ধ, কবিতা, গল্প ইত্যাদি তাবার নিজস্ব প্রতিভা বা চিন্তার বহিঃপ্রকাশ । উতার ভিতরে কোব বিতর্ক থাইলে উতা তাবার নিজস্বতা, পত্রিকা সম্পাদক মণ্ডলী বা পরিচালক মণ্ডলী উতারকা দায়ী বাইতাই ।

আমার দপ্তরে আরাবকো লেখা বহু লিখাক দিয়াপঠাদিবায় জমা আছ । পত্রিকার গাছিকার সংখ্যাত উতাও উপযুক্ত বিবেচিত অইলে প্রকাশ করাবির হংবা থাইল । সম্পাদক বারা পরিচালক মণ্ডলীয়ে গাছিকার সংখ্যাত নিজস্ব সম্পাদনার ধারা আহাবলো পত্রিকা-হাব বিকালাবির সিদ্ধান্ত কারছি । থাংত, কোব সময় পত্রিকা-হাবর কলেবরগ চেয়া বারা সম্পাদনার দায়িত্ব পালন করতে গিয়া লেখক গিরিগিথাবীর কোবা লেখা বা কাইলেও য্যারো বা করবাং, ভাবহান থয়া খাবি কলম ধরলেও, বুঙই বাবি বাকরে দিতাঙাই বুলিয়া আশা থয়ার । উতাকা আমারে ক্ষমার আঁহিলো চাদিবাং ।

থাং বাং শিলচর তারাপুরর 'দি চৌধুরী প্রিন্টার্স' মাপুগা আব্দুল আজিম চৌধুরী গিরকরাংত অকরিয়া প্রেসগর হাবি কর্মচারীরাং পত্রিকা-হাব কম সময়ে ছাপয়া বিকালো দেবাকা কৃতজ্ঞতা স্বীকার করিয়ার ।

প্রফ কপি চাদবাকা প্রফসর বারীন্দ্র কুমার সিংহ, বরেন্দ্র চন্দ্র সিংহ, ইন্দ্র কুমার সিংহ গিরক গাছিরে প্রদ্বা বা জাবইলে পুংবিং বা সাঙুর ।

পত্রিকা-হাবাত বিকুলতই কবিতা, প্রবন্ধ, গল্প বা আর আরতা পাকরিয়া সৃষ্টিকামী সমালোচনা অইলে, লেখক গিরিগিথাবীরে তাবার লেখা বরাবর দিয়াপঠাদিলে, আমি হাবির কৃতজ্ঞতার বাঁধান বাঁধা থাবার অঙ্গীকার করিয়ার ।

লয়ইতগা, Printers Devil র আতত বিন্ধুত বেয়েইতই হান্ত, অবিচ্ছাক্ত ভুলকা ক্ষমা বাকরে দিয়াইলে 'উদ্ধার বাইতাঙাই পাওরি ।'

১০ জুলাই, ২০০৩ খৃঃ

শিলচর ।

শ্রী গোপেন্দ্র কুমার সিংহ

পত্রিকাৱানর পাতাহান লেহে

১। আরি	— ইন্দুকুমার সিংহ	১
২। মহাকবি কালিদাসর প্রিয় শব্দ দুগ	— চন্দ্র কান্ত সিংহ	৬
৩। বিষ্ণুপ্রিয়া মণিপুরী সাহিত্য সভা পত্রিকা সম্পর্কে	— মণীন্দ্র কুমার সিংহ	৯
৪। জলসিটা না পানিসিটা	— ব্রজেন্দ্র কুমার সিংহ	১০
৫। ইলিয়াডে হেলেনর রূপহান	— পার্থনন্দন সিংহ	১১
৬। আরাক আন্দোলন আহান	— কুমকুম সিংহ	১৩
৭। জীবনর সার্থকতা	— মণিকান্ত সিংহ	১৪
৮। সুদেষণরে	— মদন মোহন মুখোপাধ্যায়	১৭
৯। অহংকার	— সুখজ্যোতি সিংহ	১৮
১০। প্রভো স্মরণে	— * গোলাপ সিংহ	১৮
১১। বিষ্ণুপ্রিয়া মণিপুরীর জাতীয় চেতনাবোধ	— গৌর কিশোর সিংহ	১৯
১২। স্বাধীন ভারত বারো বিষ্ণুপ্রিয়া মণিপুরী	— চন্দ্রমোহন রাজকুমার	২১
১৩। হিষ্ণুপীর য়ারী	— শ্যামানন্দ সিংহ	২৯
১৪। কানুন ঘরে আহেছে	— নরেন্দ্র চন্দ্র সিংহ,	৩০
১৫। সাহিত্য বারো সমাজ	— সুশীল কুমার সিংহ	৩২
১৬। শ্মশান	— লেং - দৃষ্টিকোণ	৩৩
১৭। দশমিক ভগ্নাংশ	— স্মৃতি কুমার সিংহ	৩৫
১৮। হুনার মণিপুর চেইকগা	— সেনারূপ সিংহ	৩৯
১৯। তপস্যালো পুণ্য পানা ভোগলো পুণ্য মাঙকরানি	— অধ্যাপক বীরেন্দ্র সিংহ	৪০
২০। ভগবন্ সৌভরি	— বনবীর সিংহ	৪৩

আরি

— ইন্দ্রকুমার সিংহ

নিজরে মানুষাং ভরি করে দেখ্যানি এহান প্রায় হাবি মানুষে পুংনিংহান দিয়া মনেইতারাহান। বরমঙ্গলরাং এ ভরি অনির আশা এহান রঞ্জআগ কম নেয়ছিল। বরং নিয়াম হে বুলানি য্যাকরের। মুট্রার ভাগা ডাম হানাং তা মহাভারত হানল বহের। আঁহিগীং আনক্হান লাগেয়া তা হস্তোমে করে ও লেরিখ উহান থিকরের উগরে ডাঙরিয়াগ নাবুলানির কোন ক্ষেমতা নেই! উগর থাংনাং আরাকৌ কত কাম! যেতাং তা নাইলে সুপ নাচলের। যেমন ধরিক, শৌ লেপ নাইতারা বহকলকেই মুনীশৌ নাপাছি মালক লকেই - বিয়া নাছি নিঙলপীগিদেই - এতাহাবির বিপদ তারন কারণ অইলতাই বরমঙ্গল। তানুর দশার কাম, গ্রহ শান্তি, মানুর হাত, যাদু, দৌর বারি কিতা কিতির বন্ধন খণ্ডন করানি তা নাইলে নার। উতার থাংনার শৌ নুয়ারার চাপাল - নুয়ারাগ জবর অইলে খৈতৌ বাধানি ঠৈ-কিতা ঠৈয়েলে - ঠৈ ডাহানি - আত জাং কচকিলে খৌ সলকরানি কত কিতা! হুদা এতালয় নাছে। গণাবাহা বারো আত চানাটৌ কম হেইনাগ নাইগে। আরাকৌ খানি আছে - মেইপারল! হাবির খামতলে অইলতাই তার পাণ্ডিত্য! রামায়ণ, মহাভারত, চৈতন্য চরিতামৃত কিতা কিতির অর্থ দেনাং তা বারতন পার। এতা হাবি গুণে বরমঙ্গল পালয়া আছেগ। উহানেতে তা যে সাধারণ মানুর দলাগ গজে আছে এহান মানুষে তারে নামাথলেউ তা কিন্তুমান হবা করে বৌপার।

কিন্তুমান ঠেকাহান অইলতাই আকহান। ক্ষেতির বি বুলতে টুমা আহানৌ নেই। লেইরা অয়া চলের। তেব, ইশ্বরর কৃপায় থতাহানতে বন্ধ নাছে কোন দিন। দুগ শৌ বারো মইলকরে ক্ষেতিং নালামেয়া চলে পারের। ঘরেও নিকুলেই রূপাল অরং অরং! কিয়া বুলে তা কোনদিন বড়ি আগল শিকারে না নিকুলের। তার দলাগ বড়িং নানান মাচেলর মাচাক। মেইপারল, কবচ, চাপাল, আতচানা, ঠিক চানা কিতা কিতি মাচেলর মাচাক আগং না আগং শিকারগী থেংঅনি লাগতৈ। এহান তা নিয়াম ফাংকরে হারপাছে।

এবাকাতে হুদা আনক্হান আঁহিগীং দিলেই না চলের আনক্হানর গুরুত্ব নিয়াম করতে গেলেগাই লগে উপযুক্ত কলর আরি আগ কাদাং লিংখাত অনি লাগের। ও আরি উগর লগে চুহিগ সংযোগ করানির থাংনাং থতাহানাদে ধুমার কুণ্ডলী নিকালেয়া কথার জোয়াব দিলেহে ওজন হান থারতা নায় — নাইলেতে হাবিতা ফরসা। এ ছবি এহান হনুমানের রামসীতারে যেসাদে হুদিগং থছিল উসাদে তাউ নিয়াম নিংকরিয়া থেংকরিয়ারগাই থছে। মানুষাং কথা এহান পাতলা অইলেও বরমঙ্গলরাংতে জবর চিন্তাহান। আরি আগ তারতা যেসাদেউ লাগের - লাগের।

কিন্তুমান কিসাদেতে যোগাড় করানি? নিজে লনাতে এজনমে নাইতৈ। ধনল কোনদিন কুলা নারতৈ। কিন্তুমান তারতা লাগের - মনর এ আশা এহান থুংকরানিরকা নানান ফিকির বিছারেয়া থার। রাতি আঁহিং ঘুম না ধরের — ঘুমজের মলপাকগ ভীষ্মর শরশয্যাহান অর।

যেদিন কাবকনু গাছিয়াং বুলাং গেলগা, উদিন বরমঙ্গলর মনর রাজ্যত বৌবুলুনিগর সাদে চিন্তা আহান বুলানি অকরল। পয়লা ঘরে হমেয়াউ খুটি চকি হানাং থছি কলর আরি উগদে পাংখাক তার দৃষ্টিহান পড়ে পড়িলগা। তা আঁহির পট নামারিয়া খানি আহান চেয়া থাইল। আরিগর দৃশ্যহানৌ চানার ডেকীহান অছে। আন্দুকা রঙর প্লাসটিকর চুহিআঁগৈ কালা ডাছনি উগরে 'তিতরু মি লতা' বুলিল ভাব উহানল খাজুরাহর মিথুন মূর্তিগর সাদে কলকরিয়া থছে। আরিগর ও মোহিনী রূপ দেহানি ফাং নেই তার পিঙ্গলা নাড়ীয়েদে আটেছিল নিংশা উহান ইরা নাড়ীয়েদে বুলন দিল। তা নাকগং আতহান দিয়া শ্বরফামহান চা বেঙ্গ পেইরাক।

ইবায়, ইপু, কোম্বাকা আইলেতা — ব বেনায় থাংথা কাবকনুর নারগ হনিয়া বিভোলাহান ভাগিল। লগে লগে তেইর

কথাহানর জোয়াব দিল - 'হিঃ আপাংপী, তি কিতা হারপেইতেই - এ আরি এগ দেহানি ফাং নেই তিলোন্তমার বাপকরে নিংশিং অইলু। অঃ ইশ্বর, হবা মানু এতা ত্বরায় মরতার জিংতা নাইতার নিয়াম দিন! আঃ কিসাদে মানুগ অছিলতা আদপে বচনে ফাজিয়েনে কথাহান লয়করিয়া বেতর মুড়াগৎ বহিল। কথাহান হুনানিয়ে কাবকনু মুরগ নঙেইল। হেয়কর প্রশংসা তারাং হনিয়া তেই মেত্তমহানাং কঙালা অইলী - মনে মনে ডাঙরৌ খানি অইলী। লগে লগে জিলক তিলোন্তমারে ডাহিয়া ত্বর করে হজক গুরা পানা দেনারকা মাংল। তেই নিজে চাহা রাধানিং হমেইলিগা।

তিলোন্তমা বাপকর কলর আরি উগল হজকারী মুঙ হানাং খদিল। হারৌহানে তা টিকিগ ফুআহান দিয়াও চুহিগ ওঠ দ্বিগীর হাদিৎ দিয়া বেলেয়া ধূমা আছুলানি অকরল। ধূমা নিকুলতে না নিকুলতে কাবকনু চাহা খেরি আহান মুঙে মাটিহান লেপিয়া খদিল। বরমঙ্গল ব্রহ্মাণ্ড গর হাবি বর খমকরিয়া মালক জিলকর গজে ডালানি অকরল। তার তাংগর ইচেলগরমা মালক জিলক বাহানি অকরল। তাং দিল্ মাহেই জেলেইর মনহান মমগর সাদে গলের এহান তা দলাগ দিন আগে হারপাছেগ। উহানেতে লেইনহান হারপেয়া জাত জাত হজক বেলানি অকরল। খামতলে তা খৌয়ালগৎ থছিল একাঘাতি কারউগ জিলকর গজে এরেদিল — 'মোর ইমা এগর লেইপাকহান ফারেনে -

কিন্তুমান' - 'হাঃ ইপু, কিতা অছেথাং'? তিলোন্তমা না আংকরিয়া নারল।

— বাছাহে, আজি নাগৈ' - তা গারি বেলেয়া মাংল।

'না ইপু, কোনদিন আহর ঠিক নেই - মাতিলহান অইলে আজি মাং।'

বরমঙ্গল শিকারগর অবস্থাহান হবাকরে হারপেইল, তাল্প আনকহান জেপগন্ত নিকালেয়া নাকগর গজে সংস্থাপন করিয়া থতাহানাদে ধূমা নিকাল নিকাল মাংল - 'চেইকতা তোর আতহান'।

লগে লগে তিলোন্তমা আতহান সমজা দিল। তা কুপকরে আতহানর রেখা, ক্ষেত্র, তেরার চিন, বজ্রর, আঙুলির পাপ, নকর রং, আঙুলির মুদ্রা কিতা কিতা চানা অকরল। তিলোন্তমা তার কথা হুনানীর আশায় বাছাকাছা নারিয়া থাইলী। তা উহানৌ মিল্লেং করের। পয়লাই তা মালকরে বারেয়া মাংল — কাবক খানি পিছে আহিছনে' - লগে লগে তেই তার মুঙেত্ত নেইলী। এবাকাতে আর চিন্তার কারণ নেই। হাতে হাতে ফলাফল মাতানি অকরল - 'তোরতা ইমা হাবিটাউ হবা কিন্তু তোর শনির ফাম এহান নিয়াম সান্তি। এহানল তোর কোন কথা চললেই অইতৈ অইতৈ বুলিয়াও নার। জোড়া লাগিয়াও না লাগের। কত হবা ফাম আইতারা - কিন্তুমান ছেদরগুরিং ফরসা! মূলে এশনি গিরক। তিলোন্তমার মেইথংহান গন্তীর অইল। কোন আহান জোয়াব নাংল। তা যাতেয়া আংকরল 'মাং বেনায় হায়হান না নাগৈহান'।

— 'হায় ইপু' তাপকরে জোয়াবহান দিল।

— 'হিঃ আবেরী, বরমঙ্গলে কী আপ্পানে তা মাতেরতা। এতাতে কীতা — মোহিনীর জিলকর বিয়াতে মিহে লেপকরে দিলুগতে। রাম বাবুর মইলক শৌ-নায়া আছিলী উগরে ঝড়িগ দেনায় মাউহানাং সট্। ঠাচা নাকরলে আংকরিছগা। উগর থাংনা গন্ধরাজর মরণফাঙছিল শৌউগর উসেল সিলকরে দেনায় দ্বিদিনর ভিতরে দাবদানি অকরেছিল — হুঃ কতি যারি - কতি হুনতেইতা — মোরে নাচিনেছং ইমা - নাচিনেছং! তার কথা হনিয়া তেই নিজরে পাছরে বেল্প। মুঙে সেইক্ষাং দৌগো দেখলপারা। তেই আরাখানি তার কাদাং চেপয়া মাংল - 'ইপুরে পানা এহানৌ লেইপাকহান বুলতে অবিশ্বাসর কথাহে মাতর। বরমঙ্গল চুহিগ আরিগৎ থয়া দীঘল করে নিংশাহান বেল্প। খানি আহান ইম্পানি অয়া থাইল।

তিলোন্তমার বিয়ার কথা আহান তা হুনেছিল। তব্বীর পুতক জগতরকা কাবকনু কতদিন হুনা করেছিলী। কিন্তুমান বাপক নেয়নির সালেদে তব্বী বিয়া এহানাং খানি হাংকৈ আহান অয়া আছে। পাত্রগ হিসাবে জগতরে পানা কিন্তুমান নিয়াম ভাগ্যর কথাহান। তা এহানরে ভিত্তি করিয়া আশুয়ান অনা অকরল। তা অয়া মাংল — 'দক্ষিণর বারাদে শুভ কাম এহান অনার কথা - কিন্তুমান খানিপ্পারাং'।

— 'ইপু, কিসাদে করলেতে কাপানি য়াকরতৈ'।

তিলোত্তমা লাজ উরা বেলেয়া এহান পেয়া ফৌঅইলীগা। তা আর ডিল নাকরল। তেইরে পথগ দেখ্যা দেনাং উবা অইল। হাতে হাতে বারো অকরল - 'গ্রহ শান্তি আহান করলেই এ ফাল্লুন লাল নাইতয়'

— 'শান্তিহান করেদে বেনায় ইপু'।

— 'অঃ দলাগ খরচ - তি আপ্পানে হিন নাপেই'।

— 'ইপু রুপারতে কি চিন্তা - কামহানহে করেদে।' বরমঙ্গল দেখল তার লৌশিং বৃথা নাগেলগা। মনে মনে তার লৌশিং হাবিরে তা তারিফ করল। তিলোত্তমারে ধলা চে টুমা আহানাং পূজার মাচেল ইকরিয়া থনারকা মাংল। তেই লংলেইগর সাদানে ঘরে হমেয়া চে টুমা আহানে কলমগৈ নিকুলিয়া আহিলী।

বরমঙ্গল মাচেলর নাঙ মাতের - তেই ইকরিয়া পাঁচ জাত ফুল, এইরা পাঁচ তাংখা, নীলুয়া ফুতি, খৈ পাঁচ মুঠি, কলা পাঁচ কান্দা, চিরা পাঁচ পৌয়া, পয়সা পাঁচ সিকি, মধুর, ঘি, ধান পাঁচ কাঠি। মাতিয়া খানি থামিয়া খাংখা বারো মাংল - 'অঃ আরাক মূল জিনিষ আহানতে নাও মাতেছুহে'—

— 'ইপু, কিহান থাং'

— 'আরি আগ লাগতৈ'

— 'হায়দে, নারিকলর আগ দিতাঙাই নাই'।

— 'আঃ আঃ উসাদে নামাতি - গমনেই। কীজাত মানু খৌরা দৌগ, তারাং খেলি মেলি অনা নাকরের'।

— 'হাঃ ইপু, নারিকলর গমনেই হানতে কীতা-তে' —

— 'দুর আবেরী, দৌর কামে ধাতুর জিনিষ নাইলে নার।

— 'হানতে ইপু কলর আরি দেনা'।

— 'উঃ। তা কথাহান দীঘল নাকরিয়া অক্ষর আগং লয় করল। কিয়া বুজ্জে তা হারপার, আরিগ পেইতৈ বিয়া নাছি নিঙলপিরাংত পারিলতা আদায় করানির লৌশিং তার নখগর আগাগং। তিলোত্তমা খানি খালকরিয়া মাতানি অকরল - 'ইপু, কলর আরি নূরাতা নায়া পুরানাতা য়করবতা?'

— 'ধাতুর জিনিষে কী মাঙর থাং।' বরমঙ্গল জোয়াব দিল। তিলোত্তমা খানি আহান খালকরলী। আকবেদে বাপকর সাংহান দেহানি পারা করে থনা— আরাক আকবেদে জগতরে বেলানি। আরিগত মায়া বেজ্জে জগতরে পানা। শ্যামরে ধরতু না কারে ধরতু। খামতলে তেই জগতরে ধরানি মনেইল। তেই আরিগ দেনাং লেপইলী।

— 'ইপু, উহান অইলেতে এ বাবার আরি এগল চা বেনায়'

— 'অইতই'

— 'কোন দিন তেইপু'

— 'যে কোন ঠাংচার দিন আহানাং।'

— 'উহান অইলেতে ইপু, আইব ঠাংচাত শ্বে নাক।' বরমঙ্গল আনকহান কাড়িয়া ঝেপগং থইল। হজকারী হবা করে আসুল

আহান দিয়া বং বং ধূমা নিকালেয়া তাল্প মাংল— ‘মি রাতি আহিতৌ তি হাবিতা লিংখাত করিছ - এবাকা যিংগা মি।’ তা উঠিয়া ঘরেদে সালৈল। ঠাংচার দিনে কামহান করিয়া বরমঙ্গল আরিগল ঘরে হমেইলগা। গুল্ল ভাত পানি খেয়া ফামহানাৎ পড়িলগা। ডাঙর করে হজক আকারি লাগেয়া তা ঘুমজে ঘুমজে ধূমা নিকালানি অকরল। জীবনর আকহান আশা আজি থুংকরল। ছত্তোমেও নিংশিং অনার দিনহান আজি। আক্ষুলাগৈ আপন মনে আহে আহে খালকরের।

কিন্তুমান জগতর লগে বিয়াহানতে সামকরে দেনা লাগতে। বারো, উহানিতে কীহান থাং — বরমঙ্গলর তাতে হাবিহান কুরুসুমেতাই। তা মনে মনে খালকরিলতা খালকরিয়া ঘুমজিল।

বিয়ানে ঘুমেত্ত উঠিয়াই তা মুরগৎ কৈয়ৎ আহান বাধিয়া - হবাকরে কলর আরিগৎ হজক আকারি লাগেয়া - তমালর কাঁটা আলা বেকা লাঠি আগ ধরিয়া তস্বীর ঘরগদে ধাওয়া করল। পেটগৎ লৌশিং থয়া থতাহানাদে ধূমা নিকালানি নিকালানি তস্বীর উঠানহানর মুঙে ফৌঅইলগা। তস্বী তারে দেহানি ফাৎনেই মুকসীহান দিয়া গুজরল। তারে খুটির চকি আহানাৎ বহুয়েয়া তেই তাল্প আংকরল - ‘ইপু, বিয়ান ততে কোংবারার দৌ মরিয়া’ - বরমঙ্গল কুপকরে তেইর মেইথংহান চেয়া মাংল - ‘তুমি হে আমারে নিংশিং নারাইতা - কিন্তুমান আমিতে তোমার হবা সাক্তি আহান অইলেই মিল্লেং না করিয়া নারিয়ার।

— ‘খানি বিপদ কিতা দেখলে থাং ইপু?’

— ‘উহানেহে বিয়ানত ফৌঅইলুয়া নাই — মনহানাৎ শাক্তি নেই।’

— ‘ইপু, কিতা অছেথাং - তস্বী লাংঅয়া আঁহিগী বাহিয়া তারে চেইল। তা মুরগ হেইরাপ তলেদে নঙেয়া মাতানি অকরল - ‘কালি রাতি হবা নেই হপন হান দেখলুতা মৈষ গুট আহান খেদে খেদে নেওরিগা বুলিয়া - এসাদে মৈষ খেদানি এহান নিয়াম সাক্তি কো’।

তার কথাহান তেইর কানহানর পরদাহান ফাটেয়া হমেইলগা। তেইর গারিগ রম কাটা দিল। কোন রকমে তারে হমা দিয়া মাংল - ‘মোরাং মতিয়া ইপু কী লাভ - ইপুয়ে কীহান করানি থকরতা করেদিয়াদে’। তা মনে মনে বারো আহানি অকরল। হাবিতা জাতা দিয়া অন্য কথাত পড়িলগা।

— ‘বাছাহে উতাল হিন নাপেই। মি থাইতে কোন হিন নেই। মরগতে ঈশ্বরর আতরহান - মানুয়ে করিলতা কিন্ডাউ নেই। এবাকাতে হাবিতা থয়া বহক আগ আনিয়া নুঙেই অয়া থাক। তোর লগরতায় নাতি নাতল পিঠিং বাধিয়া আটতারা। তুমি কইনা বিছারতে বিছারতে জম্মু দ্বীপ এগ ছাকলাই। কিন্তুমান হারপেইছ, নিয়াম বাছলেই কানা নেই। লেইখাত পড়তরাই।

— ‘না’ ইপু উহান নাগৈ, তা বিয়া করানি নাকরের এবাকা’।

— ‘অহোঃ উহানিল - তার ক্ষেমতা আছে বিয়া নাকরানি।’

— ‘ইপু করুয়া পারতেই থাং?’

লাঠিগ মাটিহানাৎ ঠক করে বহুয়েয়া - খুটি চকি হানাৎ বুকুর আগ লাকরিয়া নংশাগর সাদে হুঙ্কার দিল - ‘মোর আতে বেলাদিলেতে - আজি বুন্নে আজি!’

— ‘হে ইপু তি যেহান মাঙেই উহান - বিয়া দেনার থাংনাৎ ইপুয়ে দশআতি ফেইচম আহানল হমা দিতৌ - দিতৌ’।

— ‘ফারে ফারে, নুঙায়েদা - এতাহে জাতিলা নিঙলর কথা নাই।’ বরমঙ্গল হবা করে ফংহান ঠিক ঠাক করিয়া ঘরেদে সালৈল।

বরমঙ্গলর কথামত্ত তস্বী হজক ঠাক আহান খেয়া নুয়ারা অয়া পড়লী। অবশ্যে তা যেতা যেতা কানে মন্ত্র দেছিল উতা তেই

পুংখাক পালন করে করে যেইরিগা।

পুতক জগৎ মালকর টেলিহান পেয়া ঘরে ফৌওইল। ঘরে আহিয়াও মালকর অবস্থাহান দেহিয়া ডাঙর ডাক্তর আনানির শিজিল করল। বরমঙ্গল নুরারাগর কাদাৎ বয়া তেইর মিছল পরীক্ষা করের। তা দোয়াদে নিকুলিয়া জগতরে ডাক দিল। জগত কাদাৎ আহিল। বরমঙ্গল মেইথংহান গভীর করিয়া মাংল - 'বাবা ডাক্তরগ তি আনিছগা! মিছল খানি চেয়েছে পারা - এবাকাতে মনে আশা কিতা কিতা থাইতে পারে, আকফুর

— হাট মিও থাইতো। জগতরেল তা মালকর কাদাৎ বহিলগা। বরমঙ্গলর ফাপগৎ জগত আপাং অপরিগা। তার কথামত চলতে তা হাংকৈ নাইল। বরমঙ্গল তম্বীরে ডাকল। তম্বী আহিগী মেলিয়া আকফুর চেইল তারে। দ্বিয়গীয়ে আহিল মাতামাতি লয়করলা তম্বীরে মাংল - 'তম্বী, এরে জগতো আহিল। থাইতে দ্বি আক কথা হানি থকর। তোর মনর আশা কিতা থাইলেউ মাং - না লুকেই - মি আছ। যেহান মাঙেই উহান করতো।'

— 'হায় ইপু, বহক আগর মেইথংহান দেহানি মনাউরি।

— 'কারে লেপকরেছৎ মাং বেনায়'।

— 'হায় এরে কাবকনুর জিলক তিলোত্তমারে - মালক উগয় দিবানিশি গেরেং গেরেং করিয়া লাগেছিলীতাই -'

— 'তেস্ - লয়েল - হাংকা রাতি দেখতেই সুপ না খালকরি'। বরমঙ্গল জগতরে আকফুর চেইল। জগত লাজপেয়া মেইথংহান তলেদে দিল। বরমঙ্গল মনে মনে মাতল - 'বাছা, কুকীর ফং হানাৎ বেল্পুতার মাঝে - বিয়া নাকরিয়া ক্ষেমতা - '। তা দুবাদে নিকুলিয়া জগতরে ডাকদিল। জগত নিকুলিল।

— 'হনলেনায় বাবা তোর ইমার কথা'।

— 'ইপু হায়, কিন্তুমান কিসাদেতে' -

— হিঃ কিতার বিয়া - হুদা মেইথংহান দেহানির হে কথা নায় — বিয়া এহানতে মাঙে গেলেগা লোকাচারহান - হারপেইলে? জগত লাজুয়াগ। কোন জোয়াব নাংল। তার মনর ভাবহান দেহিয়া বরমঙ্গল হারপেয়া হুদেইল। লাঠিগ আকফির মাটিত বারেয়া জগতরে হুয়েইল - 'বাবা সুপ না খালকরি - মি হাবিতা ঠিক করতো। তি ইমে বয়া থাক। ডাক্তর আনিয়া লাভ নেই। এবাকা ঘরে গিয়া তেইর উছিল হান ছিলকরে দেনায় কালি হানাৎ খারাং। বাবা, মোর নাঙ বরমঙ্গল - যেহান মাঙেই উহান করতো।' কথাহানি লয়করিয়া ঠিকঠাক করিয়া ঘরেদে সালৈল।

রাতি তিলোত্তমারেল বরমঙ্গল হুতুমেউ হমেইলগা। লগে কাবকনু। তম্বী তারে চেয়া চেইতক মুক্তি আহান দিয়া মেইথংহান বুলেইল।

বরমঙ্গলে মাতের - 'এরে চা, তোর বহকর মেইথংহান চা, - কইতে তিলোত্তমা - তেইরে হমাদে - জাঙর ধুলি ল'।

তিলোত্তমা হমা দিয়া জাঙর ধুলি লইলো। তম্বী আহিরপানি বেলেয়া মুরগো মাঠিয়া দিল। বরমঙ্গল আর ডিল নাকরলো - 'তিলোত্তমা, লাজ নাপেইছ - মুলগো হমাদে'।

সাপুড়িয়াগর মুঙে হরপগো যেসাদে ফনাহান নেইকরিয়া তুমিল অর জগৎ গিরকৌ আজি বরমঙ্গলর মুঙে হিলগর সানে উবা অইল।

তিলোত্তমা জগতরে হমা দিয়া জাঙর ধুলি লইলো।

বরমঙ্গল লগে লগে চুহিগৎ যৌকরিয়া আছল আহান দিল। আছলহানর চোটে টিকিগৎ জ্বিগলাগেছিল। থাংনাং তপ্প তপ্প আরিগদে চেয়া মুক্তি আহান দিল।

মহাকবি কালিদাসর প্রিয় শব্দ দুগ

— চন্দ্র কান্ত সিংহ

প্রায়ই কবি বা সাহিত্যিকরতা প্রিয় শব্দ দুগ আগ থার। গিরক আগই রবীন্দ্রনাথ গিরকর সম্পর্কে ইকরেছিল যে যদি কোন সময় ‘তরুণ’ শব্দ এগ আহের উহান অইলে ‘অরুণ’ বা বরুণ শব্দ এগি আইতই। মি উদাহরণ আহান ‘কথাও কাহিনী’র ‘শ্রেষ্ঠ ভিক্ষা’ নাঙর কবিতা উগন্ত দিউরি —

সদ্য মেলিতেছে ‘তরুণ’ তপন
আলস্যে ‘অরুণ’ সহস্য লোচন
শ্রাবস্তী পুরীর গগন লগন

প্রাসাদে ।

মহাকবি কালিদাস গিরকরতাউ উসাদে প্রিয় শব্দ দুগ আহান আছিল শাৎ। শব্দ দিয়োগি অইলতায় ‘নিবাত’ ‘নিষ্কম্প’। শব্দ এগির অর্থহান অইলতায় ‘বৌহান নাদানি’ বারো ‘না লড়ানি’। মি যেপেই যেপেই শব্দ এগির ব্যবহার পাছু উহানির কথাহানি মাতিং। মি দুহান কাব্যত পাছু দিয়োহানি অইলতায় “রঘুবংশম্” বারো “কুমার সম্ভবম্”। মি “রঘুবংশম্” এন্ত অকরুরি —

পয়লাকার উদাহরণহান তৃতীয় অধ্যায়র ১৭ নং শোলকহানাত পেয়ার। শোলকহান এসাদে —

নিবাতপদ্ব স্তিমিতেন চক্ষুষা
নৃপস্য কান্তং পিবত সূতাননম্।
মহোদধে: পুর ইবেন্দু দর্শনাদ্।
গুরু: প্রবে: প্রবভুব নান্ননি ॥ ৩ ॥ ১৭ ॥

অর্থহান এসাদে —

বৌহান নাদিয়া ইম্পানি অয়া আছে থাম্পালসাক্ আহিগল মহারাজায় তার শৌগর হোভা মেইথং উহানি চানাত লাগিল। জোনাকহান দেহিয়া যেসাদে সমুদ্রহান ফুলের উসাদে মহারাজার হারৌহানৌ পুন্নিঙহান বুজিয়া আহিল।

শৌগ দেহানির আচানক এ হারৌ এহানর কারণহান হারপেইতে গেলেগা আমি খানি আহান পিঠিয়েদে যানা লাগতই। যারিহান এহান —

ইক্ষাকু বংশর মহাপ্রতাপশালী মহারাজ ‘দিলীপ’ বারো মহারাণী ‘সুদক্ষিণা’র পুন্নিঙে হারৌহান নেই, কিয়া বুজ্জে, নিয়ামপারা বছর গিয়াউ তানুরাং দারা-সন্তান না পালছি। উহানেতে তানু আকদিন ইক্ষাকু বংশর কুল পুরোহিত ‘বশিষ্ঠ’ মুনিদেবরাং দিয়োগিয়ে গিয়া তানুর মনর দু:খ হারপেইলা যে অনেকদিন আগে মহারাজা দিলীপে ইন্দ্ররে দেহা করিয়া স্বর্গন্ত লামতে ‘সুরভি’ গিথানকরে অবজ্ঞা করিয়া আহেছে, উহানে সুরভিয়ে ছিরাপ দেছে যে যতদিন পেয়া মহারাজায় তেইর জিয়া জিপুতরে সন্তুষ্ট নাকরেছে অতদিন পেয়া দারা-সন্তান নাপেইতাই। উহানে বশিষ্ঠ মুনিদেবয় মহারাজা বারো মহারাণীরে মাতল যে তার আশ্রমেই ‘সুরভি’ গিথানকর জিলক ‘নন্দিনী’ আছে, তেইরে সেবা করিয়া তুষ্ট করলে মহারাজার শৌ-শুমারা অইতাই। বশিষ্ঠ মুনিদেবই ও দিনেঙই তানুর দিয়োগিরে নন্দিনীর সেবাত লাগানিরকা যাথাং দিল। এরে নন্দিনীর সেবা এহান কিন্তু হেতেমেতেহান নাগই। কিসাদে করিয়া সসাগরা পৃথিবীর মাপুগয় পুত্র সন্তান আগর সালে মহারাণীরে লগে করিয়া নন্দিনীর সেবা করেছিল উহান তলে দিউরি শোলক এহানাত ফুটিয়া উঠেছে—

“স্থিত স্থিতামুচ্চালিতঃ প্রয়াতাং

নিষেদুধীমাসনবন্ধধীরঃ।

জলাভিলাষী জলমাদদানাং

ছায়েব তাং ভূপতিরঙ্গগচ্ছৎ ॥২॥৬

অর্থহান এসাদে - নন্দিনী উবা অইলে তা উবা অর, তেই আটানি অকরলে তাউ আটানি আকরের, তেই পানি পিলে তাউ গিরক এগ আমার সমাজর একমাত্র IRS গ। এবাকা Income Tax Deptt. এ Addl. Commissioner গ। সমাজর উন্নতির কা সদাই চিন্তা বারো হত্না করিয়া যারগাগ'। গিরক শিংলার দলিবিলা গাঙুরগ পানি পিয়ের, এসাদে করে ছেয়াগর ডেকি মহারাজায় নন্দিনীর লগে থাইল।

সসাগরা পৃথিবীহানর মাপুগ অয়া শৌআগর সালে মহারাজা দিলীপে এসাদে করিয়া বনে গিয়া নন্দিনীর সেবা করেছিলতা। এসাদে করিয়া ২১ দিন সেবা করানির পিছেদে নন্দিনীয়ে তুষ্ট অয়া শৌপানার বর দেখিলী।

নন্দিনীরাংত বরপেয়া মহারাজায় মহারাণীয়ে আলয়া কমুঙে আহানির পিসেদে মহারাণী সুদক্ষিণা গারিত অইলী। যথা সময়ে প্রবল প্রতাপী রাজা 'রঘু' জরম অইল। ঔ রঘুরে দেহিয়া মহারাজা দিলীপর পুন্নিঙহান এসাদে হারৌহানে বুজিলতা। পয়লাকার মুনিশৌগর মেইথংহান চেয়া বাপক আগর মনে যে আনন্দ আহান আহের উহান মহাকবিয়ে আচানক লুকরে এরে 'নিবাত পদ্ম প্রবভুব নাঈনি' শোলক এহানাত ফুটেয়া তুলেছে।

পিছেকার উদাহরণহান রঘুবংশমর ১২শ সর্গর ৩৬ নং শোলকে পেয়ার। মহাকবিয়ে ইকরেছে —

সংরন্তং মেথিলীহাসঃ ফণসৌম্যাং নিলায়তাম্,

নিবাতস্তিমিতাং বেলাং চন্দ্রোদয় ইবোদধেঃ ॥১২॥২৬

অর্থহান এসাদে —

মেথিলী অর্থাৎ সীতায় মুকসিহান দিল উহানে খানি প্লারারকা হোভা মূর্তি ধরেছে উগয়, বৌহান নাদিয়াও জোনাকহান নিকুলে যেসাদে সমুদ্রহান ফুলের উসাদে হোভানেই রূপহানাত অলইলী।

এহানর আগেকার য়ারি চুটি এসাদে — দণ্ডকবনে শূর্ণনখায় শ্রীরামচন্দ্র বারো লক্ষণরে দেহিয়া মোহিত অয়া পয়লা রামরাং পিছেদে লক্ষণরাং তেই ঘরপাতানিরকা মাতেছিলী আরো দিয়োগিয়েউ শূর্ণনখারে না বুলিয়া মাতলা আরো তেইর দশা উহান দেহিয়া সীতায় মুকসিহান দেখিলীতা, উহানেতে শূর্ণনখার সৌঅনিহান আরাকৌ দ্বিগুণ অয়া মেইথংহান ফুলিয়া বিকৃত অছিল উহানেই মহাকবিয়ে শোলক এহানাত মাতেছেতা।

তার পিছেদে আমি এরে আলোচনা করিয়ার শব্দ এগি ১৩শ সর্গর ৫২ নং শোলকে পেয়ার। শোলকহান এসাদে —

বীরামনৈর্ধ্যান জুযাম্‌যীনাম্

অমি সমধ্যাসিত বেদিমধ্যাঃ।

নিবাত নিষ্কম্পতয়া বিভাতি

যোগাধিকরয়া ইব শাখিনোপি ॥১৩॥৫২

অর্থহান এসাদে — বীরাসনে বয়া মুনিঋষি উতায় ধ্যান করিয়া আছি বারো তানুর যজ্ঞর বেদীরমা আছে গাছবৃক্ষ উতাত বৌনেয়য়া ইম্পানি অয়া ধ্যান করিয়া আছি তা পারা অছি।

পিসেকার উদাহরণহান ১৯শ অধ্যায়র ৪২ নং শোলক উহানাত পেয়ার। শোলকহান এসাদে —

‘অর্পিত স্তিমিতদীপ দৃষ্টয়ো

গর্ভবেশ্যষু নিবাত কুক্ষিষু।

তস্য সর্ব সুরতান্তরক্ষমা:

সাক্ষিতাং শিশির রাত্রায়ৌ যযু: ॥ ১৯ ॥ ৪২ রঘু:

অর্থহান এসাদে — কনুঙর বৌনেই কোঠাগত আছে লেমগর সাদে আহির মিলেঙর মানুগ বারো হাবি সুরতক্রিয়ার সমকক্ষ ও রাজা উগরে জারর পরর রাতি উতায় পেইল, অর্থাৎ নানা রতিক্রিয়ার মাধ্যমে রাজা উগয় জারর পরর রাতি কাটেইল। এপেই মহাকবিয়ৈ ইক্ষাকুবংশর লমরগা রাজাগ ‘অগ্নিবর্ণ’র য়ারিহান দেছে। প্রখ্যাত ইক্ষাকু বংশ যেহানর রাজার প্রজাপালনে নিজরে উৎসর্গ করেছিল। ও বংশ উহানর লমরগা রাজা উগয় ভোগ বিলাসে নিজরে বুড়োয়া থয়া শেষ পর্যন্ত যক্ষারোগ অয়া মরেছিল। উহানর বর্ণনাহানর মাতেক আহান শোলক এহানাত আছে।

এহানাত ‘রঘুবংশম’র উদাহরণহানি লমইল। পিছেকার উদাহরণহানি ‘কুমার সম্ভব’ কাব্যহানাত দিউরি। ‘কুমার সম্ভবে’ দুহান শোলকে এ শব্দ এগি পেয়ার। পয়লা পেয়ারতাই ৩য় সর্গর ৪২ নং শোলকে। শোলকহান এসাদে —

‘নিষ্কম্প বৃক্ষং, নিভৃত দ্বিরেকং,

মুকাণ্ডজং শান্তং মৃগপ্রচারম।

তচ্ছাসনাং কাননেব সর্বং

চিত্রার্চিতারন্তমিবা ততস্তে ॥’ ৩ ॥ ৪২ কুমার

গাছরতা লড়ানি নেই, ভ্রমরা ইম্পানি অছি, পাহিয়া পলি হাবি নিমাত, বনর পশু হাবি ইম্পানি অইলা; তার (নন্দীর) শাসনে বনহান হাবি ছবিহানর সাদেই অয়া থাইলা।

মহাদেব যেবাকা ধ্যানে বহিল উপেই মহাদেবর মানায়গ নন্দীয়ে যাতে মহাদেবর তপস্যাৎ বিঘ্ন নার, উহানর ব্যবস্থা করানিরকা তা বনর গাছ পশুপক্ষী হাবিরে তার ছনার দণ্ড উগল য়াথাং দেখিল য়ারফলে হাবিতা ইম্পানি অছিল।

এরে শোলক এহানর পিসেদে আমি বারো শব্দ দিয়োগি পেয়ার এরে সর্গর ৪৮ নং শোলক উহানাত এরে মূর্তি আগ য়েককরেছে। শোলকহান এসাদে —

অবৃষ্টি সংরন্তমিবান্মুবাহম্

অপামিবাধারম্ অনুত্তরঙ্গম্।

অন্তশ্চরাগাং মরুতাং নিরোধান্

নিবাত নিষ্কম্পমিব প্রদীপম্ ॥ ৩ ॥ ৪৮ কুমার

গিরকে (মহাদেবে) যেবাকা তার দেহাগর ভিতরর বৌ খামকরিয়া থছিল উপেই তারে মনে অইল যেন একাকা বরণ দিং দিং বুলের অথচ বরণ নাদের মেঘ, বা টৌ নেই সমুদ্রহান বা বৌনেই ফামে থছি না লড়ের বর্তি আগ।

এরে ‘নিবাত নিষ্কম্পমিব প্রদীপম’ শব্দ এগিয়ে দেবাদিদেব মহাদেব গিরকর হাবিতা যেমন আকপেইত যমকরিয়া আমার মুঙে উবা করে দেছে। মহাকবির লেখনীর কি অপূর্ব ক্ষমতা!

গজে দিলু উদাহরণ এহানিয়ে দেহার যে মহাকবিয়ৈ কতি চুকরে শব্দ দিয়োগির ব্যবহার করেছেতা।

— ০০০ —

বিষ্ণুপ্রিয়া মণিপুরী সাহিত্য সভা পত্রিকা সম্পর্কে

— মণীন্দ্র কুমার সিংহ

সভাপতি, বিষ্ণুপ্রিয়া মণিপুরী সাহিত্য সভা

বিষ্ণুপ্রিয়া মণিপুরী সাহিত্য সভার এ পত্রিকা, সাহিত্য কলা সংস্কৃতি প্রেমী আসামর বিষ্ণুপ্রিয়া মণিপুরীর বহুদিনকার খোঁরাঙ থংকরতে। বিষ্ণুপ্রিয়া মণিপুরী ভাষার সাহিত্যিক কবি নাট্যকার, উপন্যাসিক ইত্যাদি লেখক-লেখিকার নিজস্ব লেখনি প্রতিভার প্রকাশও বিকাশর মঞ্চ আগ এবাকা হইঙেল। তারো, লেখক-লেখিকা হাবিবে এ হনার সুরাকহান ল'দিয়া আমার বিষ্ণুপ্রিয়া মণিপুরী ভাষারে রূপে রঙে গন্ধে বরণে, ভাবে ভঙ্গীমায় গরিয়সী করিয়া তুলিয়া পৃথিবীর সাহিত্য জগতে হনার আসন আহানাত বহুবা দেনারকা আন্তরিক হেইচা জানাউরী। বিষ্ণুপ্রিয়া মণিপুরী ভাষার সাহিত্যর পাঠক-পাঠিকা হাবিবরতাউ বহুদিনকার বিষ্ণুপ্রিয়া মণিপুরী সাহিত্যর রস্ আনন্দনর খোঁরাঙ এ পত্রিকায় পূরণ করতে বুলিয়া নিঙকরৌরী। তা থকয়া, লেখক-লেখিকা, পাঠক পাঠিকা আপামর সর্ব জনসাধারণরে এ সাহিত্য পত্রিকাহানরে অকুণ্ঠচিত্তে পৃষ্ঠ-পোষকতা করিয়া থোতাল দেনারকা (সনির্বন্ধ অনুরোধ) সাজারাং হেইচা জানাউরী।

পৃথিবী যেসাদে বেলীর বিচ্ছিন্ন অংশ আহান কালক্রমে পালয়া অন্যতম গ্রহ আগ ঐয়া জীব জগতরে য়াকুরিয়া আহের উসাদে বিষ্ণুপ্রিয়া মণিপুরী সাহিত্য সভাহানো, ২৪শে মে, ১৯৮৪ ইংরেজীত, নিখিল বিষ্ণুপ্রিয়া মণিপুরী মহাসভাত বিচ্ছিন্ন ঐয়া, কালক্রমে নিজস্ব স্বত্বায়, গরীমায়, স্বয়ং সম্পূর্ণ ঐয়া বিষ্ণুপ্রিয়া মণিপুরী ভাষা জননীৰ সেবা করিয়া আহের, এহানো অনাস্বীকার্য। বিষ্ণুপ্রিয়া মণিপুরী সাহিত্য সভা, অন্যান্য সংস্থার প্রতিদ্বন্দ্বি বা পরিপন্থী নাগে। উহান নিঙকরলে আমারতা ভুল ঐতে। বিষ্ণুপ্রিয়া মণিপুরী সাহিত্য সেবাত, বিষ্ণুপ্রিয়া মণিপুরী ভাষা জননীৰ সেবাত, ক্রটি, বিচ্যুতি ঐতে।

শুভ জন্ম লগন্ত বিষ্ণুপ্রিয়া মণিপুরী সাহিত্য সভাহান, যেসাদে বিষ্ণুপ্রিয়া মণিপুরী সমাজর বিদগ্ধ কবি, সাহিত্যিক, উপন্যাসিক, নাট্যকার, গল্প-প্রবন্ধ লিখক, গীতিকার সমালোচক, শিক্ষাবিদ, চিন্তাবিদ, বে-সরকারী, সরকারী কর্মচারী, অগণন গণ্য-মান্য ব্যক্তিৰ সমাবেশে ইঙাল-ঙাল বারো সমৃদ্ধ বারো সর্ব-সাধারণর করুণা-ধন্য ঐয়া আহের, উসাদে বিষ্ণুপ্রিয়া মণিপুরী সাহিত্য পত্রিকা এহানরেউ চির যুগময়ী করিয়া থ'দিতাঙয় বুলিয়া আশা করৌরী।

চল্লিশ-লক্ষ বছর মানব ইতিহাসে বিষ্ণুপ্রিয়া মণিপুরী জাতিৰ ইতিহাস সহস্র বছরৌ নাগে। জাত আহানর ইতিহাসে, মানুর জন্ম আহান, কিতাউ দীঘল সময় নাগে। গোকুলানন্দ গীতিস্বামীৰ পঞ্চাশোদ্ধকাল বছরৰ বিষ্ণুপ্রিয়া মণিপুরী জাতিৰ জাগরণর এলার দিনেঙ এরে মাত্র হৌদিন, সুদীর্ঘ, চল্লিশোদ্ধকাল বছরৰ আন্দোলনর পিছে, ১৬ই মার্চ, ১৯৯৬ ইংরেজীত, শহীদ সুদেষ্ণাৰ মরণর পিছে, ১২ই ফেব্রুয়ারী, ২০০১ ইংরেজীত পাঠশালাত বিষ্ণুপ্রিয়া মণিপুরী ভাষার পৈলা লেরিক 'কনাক পাঠ' তয় মানে পাকরানি অকরাগিয়ে বিষ্ণুপ্রিয়া মণিপুরী জাতিও বিষ্ণুপ্রিয়া মণিপুরী ভাষার স্বীকৃতি আসাম সরকাররাংত পেইলাঙ। অবশ্য উতার কত বছর আগে বিষ্ণুপ্রিয়া মণিপুরী ভাষা ত্রিপুরা রাজ্যে স্বীকৃতি পাছে। এ হাদি এগোত, আমার আগেকার দিকপাল হাবি, দৌর খয়া পেইলাগা।

শ্রী শ্রী ভুবনেশ্বর সাধুঠাকুর, পুণ্ডরীকাক্ষ শর্মা, রাজবাবু সিংহ, মহেন্দ্র সিংহ, মানিক সিংহ, জগৎ মোহন সিংহ, নন্দকিশোর সিংহ, সেনা সিংহ (ঐতিহাসিক) কামেশ্বর সিংহ, গোলাপ সিংহ, সেনা সিংহ (সাহিত্য-ভূষণ) কার্ত্তি সিংহ (উকিল) কামিনী উকিল, বাবুচন্দ উকিল, চন্দ্রকান্ত দারোগা, কুঞ্জেশ্বর সিংহ, কুঞ্জবাবু সিংহ রাজবংশী, ভূপেন্দ্র কুমার সিংহ, বিমল সিংহ (মন্ত্রী) নিশিকান্ত সিংহ (ডি.এস.পি.) কৃষ্ণকুমার সিংহ, কুশধ্বজ সিংহ, কালাধন সিংহ, মণিকান্ত সিংহ (সিঙ্গারী) চূড়ানন্দ সিংহ, (ইত্যাদি) এরে এরে নিংশিং পাল্পা গিরক্যাছির জনম এতা ভাষা আন্দোলনর হাদিগোং, ফুলঅয়া সাতছিলা কিন্তুমান-ভাষা আন্দোলন লমৈতে লমৈতে, কেলয়া গেলগা। বিষ্ণুপ্রিয়া মণিপুরী জাতিৰ ইতিহাসে অপূৰনীয় ক্ষতি ঐল, কবি গোকুলানন্দ গীতিস্বামী বারো জাতীয় ঐক্য-মহত্তর স্রোতস্বিনী বাগ্মী বিমল সিংহ, মন্ত্রী (ত্রিপুরা) বিয়োগে। আজিকার দিকপাল হাবিৰ্যো,

শ্রৌচ বৃদ্ধ, জরা-জীর্ণ এয়া অক্ষম অযিতারাগা। সৃষ্টির নিয়ম। বহুকাল কারেউ বাছেয়া নাউ-থার। তা-আরো সময়তে কৈ অববু মনরে বুঝেইক। সৃষ্টির মহান কর্মত মহৎ মন আহান্‌লো সুসৃষ্টিকার সহস্র সহস্র বাছ মেলিয়া সৃষ্টি-কর্তারে পাঙলাক করিক। অসৎ মন হীন চতুরালিলো কোন মহৎ কর্মর সৃষ্টি নার। মহৎ মন, মহৎ কর্মর ধারক ও বাহক। মহৎ কর্মই সৃষ্টি। সুসৃষ্টিয়েই স্থিতি। স্থিতিয়েই কীর্তি। কীর্তিয়েই অমর। অমর কীর্তির রচয়িতা ঐক্। অকর্মহানেই উৎসন্নতা। কুকর্মহানেই বিনাশ। অকর্ম, কুকর্ম, অকার্য্য বারো ত্যাজ্য। যে কর্মে পরিণামে আনন্দ আনের উহানেই কার্য্য। তারো, বহুজন হিতায়, বহুজন সুখায়, সংবুদ্ধি, সং-জ্ঞান, সং-সাহস, শ্রদ্ধা ভক্তি, বানা নুংশি, অনাসক্তি, নির্দত্ত, নিরভিমান এয়া সৃষ্টির এ মহতী কর্মত একাগ্রাচিন্তে ব্রতী ঐক্।

সাহিত্য-কলা-সংস্কৃতির এ সুবিশাল রম্য-ভূমিত আমি এবাকাউ কাঞ্চেল আগোত উবা এয়া আছি। কাকেই কারতে আঠু নিক্করের। এ অবস্থাত পথ-আটতে কাঁটা বিধলে, উবান্ত পড়িয়া স্থানুবৎ - স্থিতাবস্থা ঐতয়। আমার সাহিত্য-কলা সংস্কৃতির রম্যভূমিত বিচরণ নাইতে।

অববু মনর, 'স' 'ছ'র অববু দ্বন্দ্ব, শব্দ এতা 'বাংলা না বিষ্ণুপ্রিয়া', 'লেখাহান-তোর না মোর' 'মুন্‌ এগ', 'তোর বারার, না মোর বারার' 'মোরেল নাইলে-তিতে কিয়া কহিতে', 'মোর কাম, তি:তে কিয়া করতে', 'মি থাইতে, তিতে কিয়াকা, এতার প্রশ্নাতীত অনার সময় আছেছে। পাছরিক। সৃষ্টির আনন্দে আনন্দ ভোগ করিক। আমার বিষ্ণুপ্রিয়া মণিপুরী সাহিত্য-কলা-সংস্কৃতির রম্যভূমি আনন্দিত অক। রূপে, বর্ণে, গন্ধে, পুষ্পে বিমুক্ত অক্, আমোদিত অক্। নাইলে, আমার উত্তর পুরুষরাও আমি উত্তরদায়ী থাইতাঙাই।

'যত মত তত পথ'। কিন্তু লক্ষ্য আমারতা আকহান্‌ অনা থক। বিষ্ণুপ্রিয়া মণিপুরী সাহিত্য-কলা-সংস্কৃতির শ্রীবৃদ্ধির ক্রমবিকাশ, এহিত মঙ্গলময় সৃষ্টির মহা-নন্দময় কর্মে নিজরে উৎসর্গ করিক। আনন্দম-সত্যম, সত্যম শিবম। শিবম-সুন্দরম-ইমাঠার-পুষ্টি-পালক।

— ০০০ —

জলসিটা না পানিসিটা

— ব্রজেন্দ্র কুমার সিংহ

জলসিটা না পানি সিটা কিতা দিতেই মোরে।

ছেয়াগ না বরন আহান দিতেই ভিটাগরে।

অকনেইগ কানা নেইগ

কারাংতো মি পানা নেইগ,

দিতেইগতে তিহে পাউরি,

তোর বারাদে নাচেয়া মি খলবারিদে চাউরি,

কিতারকা থাং হাদি হাদিৎ খেয়য়া মি থাউরি।

সালছিল পথগ চানাং

বাহিলতা নাই আধারহানাং

পাগালাগই বিসারারতা পাগুলিগ কুমপেই

চউলগি হাবি বেলাদেরগা লালপেই আর চুমপেই।

কইতে খেরি, কইতে কুপাঙ, ঘর দুয়ারৌ কইতে।

কিগই উতা নিলাগাতা ঠুয়য়া মি বইতে।
 হারো গিদেই, যারো গিদেই
 ঠই এগরমা খানি জ্বিদেই
 জল নেয়ছে, পানিয়ো নেই, ভিটা এগো নেইতা,
 কাপ আহানর থানার ফামহান খানিক করে দেইতা।
 আহির পানির ফুটা এগৎ নেয়ছে তোর শাতহান,
 কুঙ্গ আগই মুকাদেছি তোর লগে মোর বাধহান,
 আংঠি এগ আঙুলিগৎ আছে নাই ঘুমজিয়া
 তিতে বার মোর আতহানি মানা করলে কিয়া।
 মানা করলৌ আহিতৌ মি তোরে বিসারেয়া
 জল নেয়ছে, পানিয়ো নেই তোর বানাহান নেয়া।
 পানি দিছনে পিনার সালে,
 জল দিছনে মরগ কালে।
 খানিক করেউ কেনে-
 আছু দিনেই খৌনু এগৎ ডক আহানৌ দেনে।

— ০০০ —

ইলিয়াডে হেলেনর রূপহান

— পার্থনন্দন সিংহ

স্পার্টা-রাজার খুলি জিলক হেলেন বুলিয়া নাংহান,
 জগতরমা নেই উপমা অমাতিক তেইর রূপহান।
 তেইর হোভাহান দেহিয়া গ্রীসর রাজার জিপুত হাবিয়ে,
 লালফামরকা যুগত ঐলা তেইরে পানার সালে।
 উপায় নেয়া টিগুরিউস স্বয়ংবরহান যুৎল',
 হাবি রাজার জিপুতরাং হেইচা আহান থইল।
 'মোর জিলকে যেগর গারগত ফুলডাল পিদাদিতই,
 উগই সিচ্চিল হেলেন ইমার গিরিগ লেপইতই।
 এহানকা কুংগউ তুমি হিন্‌পা-হিন্‌পী নাইঅ,
 নিঙলছোঁগর বিবেকহানাত হিন্তে নাদেদিঅ"।
 এতা হনিয়া রাজার জিপুত তাপথা অয়া হাবি,
 কথা দিলা নাকরতাই আর জোড়াজোড়ি দাবি।

মাহিসিনীর মেনেলাউসর লু'অবয়ব দেহিয়া,
তারে মালা দিল হেলেন পিলিক পিলিক চেয়া।
কলঠংচেলপা রাজাগিরক্ টিগুরিউস নিজে,
সমজা দিল রাজ্যহানউ মেনেলাউসর আতে।
জাঙাক্-জিলক্ স্পাটারমা রাজা-রানী অয়া,
সংসার এহান কাটেইতারা হারৌ-পিয়ং করিয়া।

ঈজিয়ানর হৌপারেসু পেরিস লৌশিংশিংপা,
আহিল গ্রীসে ট্রয় রাজার পুতক পাংকাল থক্‌পা।
রাজপটির হৌনাবিল মেনেলাউসে তারে,
সরল অয়া জাগা দিল কনুংগর ভিতরে
ভাবহান এহান অপরিগ হারৌ অয়া থাক্,
গ্রীস দেশর অতিথ সেবার বদানামতে নাক্।
সরল মানুর সেপ্‌হান পেয়া হাবি গরল মানু,
পাপ স্বার্থ পুরেইতেগা পিছ নহিতারা তানু।
অচিন মানু কোনদিনউ ঘরে থনা নাকরের,
হাজার হবা অইলেরগায়ৌ হুকাং য়ারী ঘা-করের।
হারৌ এতা নিয়ামদিন না'র তেল্লাম আহের হিন,
মেনেলাউসর জিনা ভাগিল আহিল হিনর দিন।

অপরবিগর নুঙেই লাগিল রাজার আদর পেয়া,
টক্-সল্করের মদনজ্বালায় হেলেনরে চেয়া।
নিংশিং অইল তা এফ্রোডাইটর হৌদিন দিনর বর,
'মালেমর হোভা নিঙলউগ অইতই মিনক তোর'।
হেলেন'রাং বিভূলা পেরিস প্রেম নিবেদন করল,
মেনেলাউসে এতা কিতা কিত্তাউ হার না পেইলো।

ক্রীটদ্বীপে গেল্‌গা রাজা অপরবিগ' থয়া,
দেশে আলইল পেরিস সেপে হেলেন'রে নিয়া।
ট্রয় রাজার কু বেভারে গ্রীসর মানু সম্মা,
নয় বছর যুদ্ধ করিয়া হেলেন'রে আনলা।
গ্রীসও জ্বলিল ট্রয়ৌ পুড়িল, হাবি ধ্বংস অইল,
পেরিস মরিল রূপর জ্বালাত কিত্তাউ কানা নাইল।

অন্ধ কবি হোমার গিরক চুম্পুল-চুম্পুল ফুলে,
গাঁথেছে, ন্যায়-সেইত্যর মালা অমর 'ইলিয়াডে'।

আরাক আন্দোলন আহান

— কুমকুম সিংহ

আজি বিয়ানতো কাগজ কলমলো বহেছে — উদ্দেশ্য সাহিত্য সৃষ্টি। কিন্তু মি সাহিত্যকগউ নাইগে, কবিগউ নাইগে হানতে চেষ্টা করানিত কিতা আপত্তি ? খুলা বেয়কগো খাংতাক আয়া মোর খাতাহান বন্ধ করে দিয়া মাতলো — “দেনে আপ্পানে কাগজ কালি নষ্ট নাকরি। তি ইকরতেই এতা আকগয়ো নাউ পাকরতায়। তোমার সাহিত্য সৃষ্টির উদ্দেশ্যহানৌ কিহান ?”

মি রবিঠাকুর অইলে মাতলু অইছ — “সাহিত্যর উদ্দেশ্য নেই। সৃষ্টির উদ্দেশ্য বিছারেয়া নাপেয়ার। ফুল কিয়া ফুটের উহান আকগয়ো অনুমান করানি নুরারতারা, কিন্তু ইটর ভাটা কিয়া পুড়তারা উহান হাবিয়ে হারপাছি। সৃষ্টির সাদে, সাহিত্যই সাহিত্যর উদ্দেশ্য।”

মালক আগয় নয়মাস দশদিন শৌগরে গৰ্ভত থয়া নিজর রকতলো, পুষ্টিলো, মেধালো হংকরিরি বারো দিন সুঅইলে জবর হিনপেয়া শৌগ জরম দিরা। কিন্তু শৌগ ভূমিষ্ট অনায় মালকগর মুকসি নুকুলের। মেগুম হানাত মালকগর অতদিনর হাবি হিনদুঃখ ককয়া যারগা। এহানেই সৃষ্টির আনন্দহান।

সাহিত্যিকে সৃষ্টিকায় সৃষ্টি করে। কিন্তু মান এরে সৃষ্টি এতা কুঙ্গয়তে পাকরতারা ? পাঠকতে কৈ ? দোষহানতে কারাং ? পাঠকরাং না লেখকরাং ? না, সাহিত্যত চরিত্রবল নেই আর ? কবিগুরুর মতে অবহেলায় যে রচনা সৃষ্টি অর উহান অবহেলার সামগ্রী। যে রচনাহানাত যথার্থ জীবনর হাবি অনুরাগ সাহিত্যিকে অর্পন নাকরেছে উহান কোনদিনো মানুর অন্তর আকর্ষণ করানি নুরারের। লেখকর কামহান অইতৈতা অন্তরর বিশ্বাসর পরীক্ষা চালানি, আটল নেয়া নিভীকভাবে সাহিত্যক্ষেত্রে অবতীর্ণ অনা, প্রয়োজনে আঘাত করানি বারো আঘাত সহ্য করানিত সক্ষম অনা।

আমি সমালোচনার ডরে সাহিত্য সৃষ্টি নাকরানি থক নেই। হাবি লেখা হাবির পছন্দ নাইতে পারে। হাবি পাঠকর নিজর নিজর পছন্দ-অপছন্দ আছে, উহানাত কোন বাধা নেই। কিন্তু আমার এবাকা প্রয়োজন পাঠকর। সমালোচনা করানিরকা অইলেউ আমার লেখাহানি পাঠকে পাকরে দেকা। অবশ্য দুই ধরণর সমালোচনা আছে — সৃষ্টিকামী বারো ধ্বংসকারী। ধ্বংসকারী সমালোচনায় লেখকর মেরদগুগত আঘাত করে, কিন্তু সৃষ্টিকামী সমালোচনায় লেখকর লেখানির মান উন্নত করানিত সাহায্য করে। যে জাতর সাহিত্য নেই, সংস্কৃতি নেই, উ জাতর কোন পরিচয় নেই। আমার লেখকে হিনপেয়া লেইরিক ইকরিয়া, ছাপেয়া, বেহানি নুরারিয়া আরাকৌ লেইরা অইতারা। আমি নানা ভাষার নমুনা নমুনার লেইরিক খুন্তল দিতে দিতে প্রিষ্টিং প্রেসর প্রেসারে পড়িয়া হই প্রেসার অনাত বাধ্য অইয়ার। হানতে আমার লেখকে সাহিত্য সৃষ্টির উৎসাহ কিসাদে পেইতায় ?

আমার জাতর পত্রিকা কতহান আসাম, ত্রিপুরা বারো বাংলাদেশেও নিকুলেছিল। কিন্তু মান কয়হান টিকিয়া থাইলতা ? সম্পাদকে হিনপেয়া পত্রিকা আকেইহান চালেইতারা। কিন্তু রূপার অভাবে লম্বিতগা পত্রিকা মুর সুপয়া পথে পড়িয়া মরের। পত্রিকাহানি জিংতা করিয়া থনি পাঠকর উদ্দেশ্য অনি থক। আমি কিয়া নাহারপেয়ার যে এরে পত্রিকাহানি আমার সুখপাঠ্য আকেইহান ? অবশ্য পত্রিকা এতার তত্ত্ব গুণ থানা থক। পয়লা গুণহান অইলতা নিরপেক্ষতা। তার পিছেদে অইলতায় ভাষার শালীনতা, দৃষ্টিভঙ্গীর স্বচ্ছতা ইত্যাদি।

এখরুম আমার সাজে আরাক আন্দোলন আহানর ঠোরাং করিক। এহান অইলগাতায় ইমা ঠারর লেইরিক পাকরানির আন্দোলনহান। সরকারে আমার ইমাঠরহানরে স্বীকৃতি দিলা। কিন্তু ঠারহান হুদা পাঠ্যক্রম হিসাবে পাকরলে নাইতে। ইমাঠারর যেকোন হবা সাহিত্য পাকরিক। সাহিত্যিকে সাহিত্য সৃষ্টি করকা, পাঠকে সাহিত্য পাকরকা সংস্কৃতিবান গিরিগিথানীয়ে বিয়া, জন্মদিন, বিবাহ বাধিকি ইত্যাদিত মারূপ মাসাং, শৌ-শুমারা, কুটুমকাসা হাবিরে লেইরিক উপহার দেকা, পাঠক সমাজ চংখল অইলে সাহিত্যিকউ বলি-পাংকাল অইতায় সাহিত্যউ সমৃদ্ধ অইতে। পাঠক-পাঠিকা ছাড়া সাহিত্যিক, পত্রিকা-ম্যাগাজিনর সম্পাদকর অস্তিত্বই নেই বারো দুঃখ হারপাকুরাউ নেই।

জীবনের সার্থকতা

— মণিকান্ত সিংহ

(দুধপুর), বি, এস, সি, বি, এড

পৃথিবী ইমার বুকে বিভিন্ন জীবজন্তু সৃষ্টি অয়া প্রকৃতির নিয়মে জিংতা অয়া পালয়া আছি এতা পৃথিবীর মা হাবিস্ত শ্রেষ্ঠ জীব বুলিয়া দাবি নাকরতারা। কিন্তুমান মানুষোতা পৃথিবীর মা হাবিস্ত শ্রেষ্ঠ জীব বুলিয়া দাবি করতারা। কিয়া বুললে তানুর কর্ম বারো চিন্তাধারা অন্যান্য জীবরাংত হাবির গজে। মানুষে যদিও নাগাল নাপেইলেও হাবি বিশ্বম্মাণ্ডর গজে চিন্তা করানি পারতারা বারো আধুনিক যুগে এমন উন্নতি অনা পারলা যে বিভিন্ন গ্রহ-উপগ্রহ উতাও নাগাল পানা অকরলা। কিন্তুমান বাস্তবে দেহিয়ারতায় যে মানু এতাও যতই জ্ঞানী বা উন্নতি লাভ করলেও প্রকৃতির নিয়মর উর্দ্ধে কিণ্ডাউ করানি নুয়ারতারা।

বিভিন্ন জীবর আকৃতি বারো চরিত্র বিভিন্ন বারো হাবির জীব এতা পৃথিবীর বুকে কোনগউ স্থায়ী নাগয়। কোন কোন জীব মাত্র পাঁচ মিনিট থায়া পিছেদে মরতারা কোন কোন নাব, একশ বছর বা আরাকও গজে থায়তারা। হাবিও নিজর নিজর জীবন ধারালো চলিয়া পিছেদে সময়হান আহিলে মরতারা। মানু এতাউ প্রকৃতির এনিয়ম এহানান্ত রক্ষা নাউ পেইতারা। তানুও সময়হান আইলে বুড়া অয়া মরতারা। নিয়াম অইলে নব্বই বা একশ বছর থাইতারা। মানু আগই যতই জ্ঞানীগো অক, শিক্ষিত অক বা নিয়ামপারা ধনসম্পত্তি থাইলেও প্রকৃতির এ নিয়ম এহান খণ্ডানী কারতাও ক্ষমতা নেই, অধিকার নেই, ইচ্ছা থাইলেও আরতা পেইলতা নেই। অমর অয়া থাকুরা আকগউ নেই।

উহান অহইলেতে মানু কিহানর গজে নিজরে শ্রেষ্ঠ বুলিয়া দাবী করতারা ? যে মানুগো জনসেবা করিয়া জীবনহান কাটেইলো উগও মরিয়া যারগা যে বৈজ্ঞানিক নুবা নুবা জিনিষ আবিষ্কার করিয়া হাবি মানুর সেবা করের উগও মরের, যেতারকা এতাহাবি করতারা উতাও হাবি মরতারা উহান অইলেতে এসাদে হবা কাম করানির উদ্দেশ্যহানই বা কিহান বারো তানুবে বা কিহান পেইলা।

মানু আগো মহাজ্ঞানী, শিক্ষিত বা অশিক্ষিত অইতেও পারে, লেইরা বা বরাবালা অইলেও তাতে কিন্তু মানু আগো। যে মানুগোর মুরগত হাবি শক্তি, ন্যায়-অন্যায়, উচিত - অনুচিত এতা হাবি বিবেক বিচার করানির ক্ষমতা আছে। কিন্তু প্রয়োগ এহান মান্না নেই। নিয়াম পারা উচ্চ শিক্ষিত মানু আগউ সাকতি কাম করতে চিন্তা নাও করের। উচ্চপদবীত থায়াও উপযুক্ত বিচার করানি নুবারতারা, তানুও মানু। ধনীশ্রেষ্ঠ উতাও বিবেক বুদ্ধি হারোয়া চলেকুরা অভাব নেই। বিভিন্ন সম্প্রদায়ে এসাদে বহু খ্যাতনামা মানু আছি যেতা বাস্তবে মানব সমাজে কোন প্রয়োজনে না লাগের। তবে এহান হায়হান যে সৃষ্টির নিয়মহান অইলতায় যেপেইত ন্যায় আছে উপেইত অন্যায় থার, দিনহান থাইলে রাতহান থার, যেপেইত দৌআছি উপেই অসুর থাইতারা অর্থাৎ সৃষ্টির ধর্মহান অইলতায় বিপরীত ধর্মী শক্তির খেলা আহান।

জীবন আহানর শুরু অইলতায় জরম অনা এবং অস্তিম অইলতায় মরণহান। জীবনর হাবিস্ত মূল্যবান সময়হান কুংহান ? জরম অনার পিছেদে ছৌ আগরতা কোন বিবেক, বিচার, বুদ্ধি কিন্তাও নাথার, আঠারো বছরর পিছেদে মানু আগরতা পূর্ণ বিবেক, বিচার বারো জ্ঞানর বিকাশ পায়। ও বিবেক, বিচার, জ্ঞান-বুদ্ধি প্রয়োগ করিয়া তার বাকি জীবনহান কাটেইতইগো তার কর্মর মাধ্যমে। কিন্তু বার্ষিক্য অবস্থাত তার জীবনর সার্থকতা উপলব্ধি করেতায় তার জীবনর কর্মধারা উতা নিংশিং অর। তবে এহান হায়হান যে মানু আগর তার কর্মজীবনে যদি ছয় রিপু বারো পঞ্চ ইন্দ্রিয় এতা নিজর বসে আনানি নুবারের তবে তা তার জীবনে হবা কাম করানির সুযোগ হারোয়া বেলার।

এবাকা আসল বিষয়বস্তুহান আলোচনা করৌরি। পৃথিবীর বুকে মানু এতার সৃষ্টি অনার মূল উদ্দেশ্যহান অইলতাই ন্যায় বারো সত্য এহানরে রক্ষা করানি। এ ধ্রুব সত্য এহান পালন করানি নিয়াম কঠিন। ন্যায় বারো সত্য পালন করতে জীবনে

অনেক বাধা, ঘাত, প্রতিঘাত আহের। ঐ ঘাত প্রতিঘাত উতা হাবি অতিক্রম করতে কতিহান যে ধৈর্য্য ধরানি লাগতৈ ক্ষয় ক্ষতি স্বীকার করানি লাগতৈ এবং নিজেরে নিজে শাস্তি দিতে বাধ্য অনা লাগের। গোলাপ ফুলর গাছজারিত গোলাপ ফুল এগ এতাপারা কাটা এতা হাবির হাদিত কতিহান হিনপেয়া কুরিগততো ডাঙর অয়া পাপড়ি উতা মেলিয়া ফুলগর পূর্ণ রূপহানলো ফুটের উপেইত মানু এতায় ঐ ফুল উগো চেয়া আনন্দ পেইতারো এবং মানুরে আনন্দ দিয়া গোলাপফুলগো নিজে সার্থকতা লাভ করের। প্রকৃতির নিয়মর কোন পরিবর্তন নেই। কিন্তু জীবশ্রেষ্ঠ মানুরাং হাবি ধরনর পরিবর্তন দেহাদের। মনিষ্য এতারাং জ্ঞান, বুদ্ধি, শক্তি, ক্ষমতা হাবিতা আছে, তবে উতার প্রয়োগ হাবি বিবেক বারো বিচার এ শক্তি দ্বিয়হানর গজে নির্ভর করের। মানুষ্য আগরাং কাম, ক্রোধ, লোভ, মোহ, মদ, মাংশর্য্য এ রিপু যোগি বারো পঞ্চ ইন্দ্রিয় এতা হাবি অইলতায় জীবনে সার্থকতা লাভ করানির সহায়ক বারো বাধা দেনার উপাদান। যদি মানু আগর এ রিপু বারো ইন্দ্রিয় এতারে সঠিকভাবে পরিচালনা নাকরের বা এতার বশ মানের তবে ঐ মানুওগো যতই শিক্ষিত, জ্ঞানী বা ধনী অইলেও তা তার মহান কোন উদ্দেশ্য আহান পরিপূর্ণভাবে লাভ করতে পদে পদে বাধা পেইতৈ এবং লমইতেগা বিফল অইতেও পারে।

মনিষ্য এতার মূল উদ্দেশ্যহান হুদা নিজে জিংতা অয়া পালনি উহান নাগয়। কোন জীব আগও নিজে নিজে জিংতা অয়া থানা নুবারতারা। আকতার গজে আরাক আকতা নির্ভর করিয়া চলতারা। মানুর ক্ষেত্রেও আকহান নিয়ম। পৃথিবীর মা দেশ মহাদেশ বা বিভিন্ন জাতর মানু হাবিও আকতার লগে আরাক আকতার সহযোগীতালো জিংতা অয়া আছিগো। ব্যক্তিগত কোন মানু আগো পৃথিবীত অমর নার উহান সত্যহান। কিন্তুমান জাত আহান বা দেশ আহান বা মানব সমাজ অমর অয়া থাইতয় এহানেই ধ্রুব সত্যহান। এবং এ ধ্রুব সত্য এহানরে রক্ষা করে পারানি উহানেই মানুর একমাত্র উদ্দেশ্যহান।

ধনী, শ্রেষ্ঠ, জ্ঞানী, শিক্ষিত বা যে কোন স্তরর মনিষ্য কর্মজীবনে নিজর স্বার্থ উহানরেই বেশীরভাগ কেন্দ্র করিয়া কর্মজীবনে নিজর কাম করিয়া যিতারাগা। কিন্তু নিজরতা ছাড়াও পারতে খানি খানি হাবির স্বার্থ খানি চিন্তা করানি উহানরে বেশীরভাগ মানুয়ে উপেক্ষা করিয়া চলতারা। তবে এহানও হয়হান যে যেবাকা এ জীবশ্রেষ্ঠ মানু এতা বার্ষিক্য অবস্থাত নিজর কর্ম জীবনর দায়িত্ব নেনার ক্ষমতা নেয়র, উপেই বাকি জীবনর আরাকও গুরুত্বপূর্ণ সময়হান যেহান কোন কাম নাকরিয়াই কাটানী লাগের এবং কাম নাকরিয়া জীবন আহান কাটানী উহানাতেই জিঙে কঠিন সংগ্রাম দেহাদের। তবে এ কঠিন এবং জীবনর হাবিত্ত জিঙে গুরুত্বপূর্ণ এবং অন্তিম সময়হান অনেক গিরিগিথানি গাছি নুঙেইকরে হারৌ হারৌ অয়া কাটেয়া যিতারাগা বারো হাবি মানুরাং চির অমর অয়া থানা পারতারা। ঐ মানু উগ অইলতায় যেগর নিজর কর্মজীবনে নিজর ব্যক্তিগত স্বার্থর দেওয়াল ভেদ করিয়া হাবির স্বার্থে কর্ম করিয়া গেছেগা বারো জীবনর মূল্যবান সময়হানরে বিফলে নাথয়া হাবি ঘাত প্রতিঘাত অতিক্রম করিয়া সংগ্রাম করেছে ঐ মানু উগো যেবাকা কামহানাত থায়া নিজরে প্রশ্নকরের যে “মি মোর অমূল্য মনুষ্য জীবন এহানাত কিতা পেইলু?” তা তার অতীতর স্বার্থহীন কাম উহানাত নিংশিং অয়া অয়া হারৌ হারৌ অয়া অন্তিম জীবনহান কাটেয়া যারগা। ঐ মানু উগই তার মরনহানৌ ডর নাউ পার বরং মরণহান আহিলে তা তার মৃত্যু উহানরে স্বাগত জানার, কারণ এ পৃথিবীত তারতা আর থানার কোন প্রয়োজনও নেই। উহানরে মাস্তুরাতা “মৃত্যু হানরে জয় করানি।” রবীন্দ্রনাথর ভাষাত “মরণরে তুহমম শ্যাম সমান।” তার জীবনে পূর্ণ আত্মতৃপ্তিলো জীবনর সার্থকতা লাভ করের।

কিন্তুমান যে মানুগো তার কর্মজীবনে লোভ, মোহ, অহংকার এতালো বশীভূত অয়া কর্মজীবন কাটেয়া গেছেগা উগো অন্তিম জীবনহানাত দাবী করিলতা কিন্তাও নাপেয়া মনে আঘাত, দুঃখ বারো লমইতেগা নিজ জীবন হানরে ধিককার জানার কারণ তার ধন, দৌলত, গাড়ী, সম্পদ, এতার গজে তারতা হুতুমেউ কোন অধিকার নেই যেহেতু তা হারপার যে তা উতা হাবি বেলেয়া হুদালা অয়া যানা লাগতৈ। প্রকৃতির নিয়মর মরণ উহানরেউ গ্রহণ করানি ডরপেইতৈ। ঐ মানু উগ মরের মনে মনে জুলিয়া পুড়িয়া বারো জীবনহান এসাদে ব্যর্থ অর দুনিয়াহান শূন্য অয়া পড়ের।

মহাত্মা গান্ধী বিশ্বর হাবিমানু তথা বিশেষ করে তৎকালীন ভারত বর্ষর মানু এতার মঙ্গল করানির সালেদে স্বাধীন বারো

শান্তিরকা নিজর জীবনহান উৎসর্গ করেছিল। কিন্তুমান লমইতেগা ও মহাপুরুষ উগরেও আততায়ীয়ে গুলি করিয়া ঠেগ নিলগা। উহানেউ তার জীবনহান ব্যর্থ নাউ আছে, কারন মরণ উহানরকা তা দায়ী নাগয়, গিরকে তার জীবনে দেশ, সমাজ এমনকি সমগ্র বিশ্বর মানবজাতিরকা যে আদর্শহান থয়া যারগা উহানেই তার পূর্ণ আত্মতৃপ্তি এবং শান্তি পেয়া মরিয়া গেলগা।

“মার্কণ্ডেয় পুরাণে” রাজা হরিশ্চন্দ্রর গজে দেবরাজ ইন্দ্র বারো ধর্ম রাজার পরীক্ষা নিরীক্ষার য্যারি উল্লেখ আছে। রাজা আগো বারো তা কতি নিয়াম দান করানি পারের এহানর গজে পরীক্ষা নিরীক্ষা করানির পিছেদে যেবাকা হরিশ্চন্দ্র রাজা তার রাজ্য, সহধর্মিনী, পুতক এবং লমইতেগা নিজরেউ সমর্পন করিয়া অস্তিম পরীক্ষাহানাতউ জয় করলো উপেইত দেবরাজ ইন্দ্রই হরিশ্চন্দ্রে আংকরলোতা — “হে রাজা হরিশ্চন্দ্র — তোর গজে পরীক্ষা নিরীক্ষা করানি লমইল। পৃথিবী এহানরমা তি অতি পুণ্যবান রাজা আগো। তি বারো তোর সহধর্মিনী শৈব্যা বারো তোর পুতক রোহিদাস তিনগিরে স্বর্গধামে নেনারকা আহেছুগো। এবাকা স্বর্গধামে যিক্গা হাটো।”

কিন্তু প্রজাপ্রেমী হরিশ্চন্দ্র ইন্দ্রদেবর একথায় কোনমতে রাজী নাইল। রাজা হরিশ্চন্দ্রই মাতলো যে, তা যেদিনেও রাজ্য ত্যাগ করেছে উদিনেও প্রজা উতায় নিয়াম হিন্‌পেয়া দিন কাটেইতারা বারো কোনদিন তানুর রাজা হরিশ্চন্দ্র বারো রাজাগো পালয়া প্রজা এতার জীবন শান্তি পেইতাই উহান বাছেয়া আছি। প্রজার এতাহাবি খবর পেয়া রাজা হরিশ্চন্দ্র তার প্রিয় প্রজাএতারে দুঃখর সাগরে বেলেয়া হুদা নিজর স্বার্থরকা স্বর্গত যানা কোনমতেই রাজী নাইল। যদি তার প্রজা হাবিরে স্বর্গত নিলেগাতে তা রাজী আছে।

ইন্দ্রদেবে বারো হরিশ্চন্দ্ররে মাতলো যে বিধির নিয়মহান অইলতায়, এ পৃথিবীত যোগে যোগে পূণ্য করেছে উতা স্বর্গত যিতাইগা কিন্তু যোগে পাপ করেছে উগো স্বর্গত যানা নুবারতৈ। তোর প্রজাউতা হাবিত পাপ করেছেতাও আছি বারো পুণ্য করেছেতাও আছি। উতা হাবিরে নেনা সম্ভব নাইগে।

হরিশ্চন্দ্রই বারো মাতলো যে, উহানঅইলেতে মোর যত পুণ্য এতা প্রজা হাবিরে দিয়া দিলু। এর পিছেদেও যদি তানু স্বর্গত যানা নুবারতারা তবে মরতাও তানুরে বেলেয়া স্বর্গত যানা কোন মতেই সম্ভব নাইগে। প্রজারে লালন পালন বারো শান্তি দেনা উহানেই মোর স্বর্গ প্রাপ্তি হান।

হরিশ্চন্দ্রর এ মহান ত্যাগর কথা খনিয়া ইন্দ্রদেব আরাকৌ হারৌ অইল। যে রাজাগ নিজর হিন্‌ দুঃখ বেলেয়া প্রজার মঙ্গল উহানেই একমাত্র কর্তব্যহান নিংকরের, এগরাংত জিঙে পূণ্যবান রাজা এ পৃথিবীত আর নেই। ইন্দ্রদেবে হরিশ্চন্দ্ররে মাতলো যে তোর সাদানে গুণীবান রাজা আগর প্রজা এতা পাপী অয়াও থাকা বা পুণ্যবান অয়াও থাকা তোর গুণে হাবি স্বর্গ প্রাপ্তি অনা পারতাই। ইন্দ্রদেবর আদেশে রাজা হরিশ্চন্দ্র তার রাজ্যর প্রজা হাবিরেলো স্বর্গর পথে যাত্রা করলো।

এসাদে করে রাজা হরিশ্চন্দ্রও তার জীবনে অতি দুঃখ, কষ্ট, যন্ত্রনা ভোগ করলেও শেষ পর্যন্ত তা তার জীবনে সার্থকতা লাভ করানি পারলো।

আমার সমাজেও গীতিস্বামী গোকুল কীর্তনী, সাধুঠাকুর এসাদে মহাপুরুষ জরম অয়া সমাজরে কুসংস্কার বারো দুর্নীতি এতা মুক্ত করানির সালে অনেক বাণী প্রচার করলো। গিরক গাছিয়ে এ পৃথিবীর বুকগৎ নিজর অস্তিত্বলো জিংতা অয়া থানার পথ দেখরেয়া গেছিগা। সমাজর হাবি সংস্থার কর্মকর্তা গিরিগিথানী বারো হাবিস্তরের মানুরে একান্ত অনুরোধ, হেইচা, শ্রদ্ধা, ভক্তি কাতকরিয়া মাতুরি যে, সমাজর যে কোন সদস্য, সংস্থা যোগে যেপেইতউ থাইক উহানে কোন ক্ষতির কারণ নেই। কিন্তুমান যেকোন কামআহান গঠনমূলক ছাড়া ব্যর্থমূলক কোন কাম করানির অধিকার নেই। মানুর কুলে জরম অয়া মানুর পরিচয় দেনা উহানেই পয়লাকার উদ্দেশ্যহান বারো ব্যক্তিগত বা সংস্থার মাধ্যমে কর্মজীবনে অন্তত: পারতে এমন খানি কর্তব্য পালন করানি পারিয়ার। মানু আগর অস্তিম জীবনে আর কিঙাউ নাপেইলেউ উহানেই প্রকৃত ধর্মহান পেয়া যিতাইগা। এ আদর্শর পথ ইলয়া চলানি এহানেই প্রকৃত পথগো বুলিয়া মি নিংকরৌরি।

সুদেষণারে —

— মদন মোহন মুখোপাধ্যায়

আমার জীবন থাইতে
সুদেষণারে পাছরানি নাক্ —

আমার হৃদির হৃদিৎ
সুদেষণার্ক ফলম আহান থাক।

ইমার দুঃখ কঙ্করানিৎ

আগে বাঢ়ে পৌ পেয়া

জরম অছিলী —

নুংপাঙ মরণহানল

ইমারে হারৌ করিয়া

পূজা দেখিলী।

নুংশিপী সুদেষণা তি

তন্মক্গ তাম্শাগ

নাপেইতে পেইতে পেয়া

তোরে পাছিগ।

এসাদে ঠৌনাৎ

জরম অনাৎ

আরতা নেই —

আকখুলিগ

তোরে পাছিগ।

(কবিগিরকর 'রঙফিরক' কাব্যগ্রন্থতুৎ সৎকরে য়াথাং লয়া প্রকাশ করানি আইল)

— ০০০ —

অহংকার

— শ্রী সুখজ্যোতি সিংহ

মানুর জীবন এহান
ফানুসগর সমান
বৌ নিকুলিয়া গেলেগা
পড়িয়া থার খোলসহান ।।
মনুষ্যই কিন্তু আত্মাগ থাইতে
করতারা গৌরব ধন-জন-যৌবনর ।
আত্মাগই দেহগ বেলেয়া গেলেগা
পরিয়া থার দেহগ অয়া নি থর ।
পিছেদে দাহ করলে ছালি অয়া
মাটিত মিশের যৌবন-নাপালর ।
টেইপাঙর গৌরব কিহান কানা ?
উতা অইলে কিতার অহংকার ?

— ০০০ —

প্রভো স্মরণে

— গোলাপ সিংহ

তি যদি নুঙেই পার হে প্রভো,
মোরে দুঃখ দিয়া
দুঃখ অক মোর চিরসাথী
ঙককরতো বুক পাতিয়া ।।
সুখ দুঃখ হাবি তোর অবদান
ল'পারিঙ প্রভো আহিয়া
দুঃখর বেশল আহিলে হে নাথ
কল করিঙ নিবিড় করিয়া ।।
দুঃখ রাশিত প্রভো, অহনিশি
তোর মোহন বাঁশী
হাদি-মন দে'ক পবিত্র করিয়া
সুরর সাগরে বুড়েয়া ।
পতিতপাবন দয়ালহরি
অনাথ-বন্ধু-তি দুঃখহারী
দুঃখ মাঝারে স্নেহর পরশ
পাউরী যেন বিছাড়েয়া ।।

(সমাজর বিপ্লব সৃষ্টিকারী বারো মনচরকরা এলা - 'পুন্যতীর্থ মণিপুর মাটি মণিময় মোর ইমা'র লেংপা বারো সুরকার।
গিরক এগ ধলাই বহুমুখী উচ্চতর মাধ্যমিক বিদ্যালয়র অধ্যক্ষগো অয়া অবসর নেছিলগা। এলা, নাছা, নাটক বারো অভিনয়
জগতে গৌরবময় অধ্যায় আহান লিংকাত করেদেছিল।)

— ০০০ —

বিষ্ণুপ্রিয়া মণিপুরীর জাতীয় চেতনাবোধ

— শ্রী গৌর কিশোর সিংহ

বিষ্ণুপ্রিয়া মণিপুরীর জাতীয় চেতনাবোধ সমাজের কোণে কাঞ্চলেণ্ড অকরিয়া শিক্ষিত গিরিগিথানী তথা সমাজের বিভিন্ন সংস্থার স্থানীয় মানুর অন্তরে কতিহান জাগ্রত অয়া আছে এ প্রশ্ন এহান মনহানাত প্রায় আহের বুলতেগা প্রবন্ধ এহানর অবতারণা। প্রায়ই আহিত পড়ের, কানেও বাজের, বিভিন্ন লেখকে তানুর লেখনিত বা আলোচনাত উল্লেখ করতারা - ‘আমার বিষ্ণুপ্রিয়ারতা’, ‘বিষ্ণুপ্রিয়া বা মৈতৈ’ ‘ইমা বিষ্ণুপ্রিয়া’ এসাদে অসংখ্য দৃষ্টান্ত তুলিয়া ধরানি যাকরের। বিষ্ণুপ্রিয়া শব্দগর লগে মণিপুরী শব্দগ ক্ষেত্রবিশেষে ব্যবহার করানি বারো ক্ষেত্রবিশেষে বাদ দেনা বিষ্ণুপ্রিয়া মণিপুরী জাতির আত্মবিশ্বাসর অভাব ছাড়া কিতাও নাগয়।

১৯৭৭ ইংরেজীত আসাম সরকারে বিষ্ণুপ্রিয়া নামাকরণে তদানিন্তন কাছাড় জিলার (বর্তমান বরাক উপত্যকা) বিভিন্ন প্রাইমারী স্কুলে শিক্ষা প্রচলনর আদেশ দিলেও আমার শিক্ষিত সমাজ তথা নিখিল বিষ্ণুপ্রিয়া মণিপুরী মহাসভা, নিখিল বিষ্ণুপ্রিয়া মণিপুরী ছাত্র সংস্থা তীর প্রতিবাদ করিয়া গ্রহণ নাকরেছিল। এ সিদ্ধান্তর পিঠিত যতহান চেতনাবোধর পরিচয় পেইয়ার, ব্যবহারিক ক্ষেত্রে কিন্তু বিন্দুমাত্র চেতনাবোধর পরিচয় নাদেইয়ার। নিজর জাত, নিজর ভাষা, নিজর পরিচয় সম্মক্ষে নিজরতায় যদি সচেতন নায়র উহান অইলে কোনোগয় আমার জাতরে সচেতন করিয়া তুলতয় এহানর জবাব আছেতা?

বিষ্ণুপ্রিয়া বারো মণিপুরী শব্দদ্বয়গীর পরম্পরা সম্বন্ধহানর ব্যাখ্যা করিয়া চেইক, কিতা পেইয়ার। বিষ্ণুপ্রিয়া শব্দ এগর অর্থহান কিহান? শ্রীমন্মহাপ্রভুর অর্দ্ধাঙ্গিনীর নাঙহান বিষ্ণুপ্রিয়া। ১৬০০শ শতাব্দির মধ্যভাগে শ্রীমন্মহাপ্রভুর আবির্ভাব। তাছাড়াও শ্রীমন্মহাপ্রভুর অর্দ্ধাঙ্গিনী বিষ্ণুপ্রিয়ার কোন সন্তান সন্ততি নেই। ওহানে বিষ্ণুপ্রিয়ার কোন বংশধর নেই। তা অইলে এহান স্পষ্ট যে আমার সমাজ বিষ্ণুপ্রিয়ার বংশধর নাগয়। তাছাড়া বিষ্ণুপ্রিয়া শব্দ এগর উৎপত্তির আর কোন ইতিহাস সম্মত ব্যাখ্যা নেই। বিষ্ণুপ্রিয়া শব্দগর যদি আভিধানিক বা ইতিহাস সম্মত অর্থ নেয়র তা অইলে গুণগত কোন অর্থ আছে না কিতা চানা যাকরের। বিষ্ণুপ্রিয়া শব্দগর গুণগত অর্থহান মাতানি যাকরের বিষ্ণুর প্রিয় অথবা বিষ্ণুরে যেতায় প্রিয় বুলিয়া নিঙকরতারা অর্থাৎ বিষ্ণুভক্ত। বিষ্ণুর প্রভাবাধীন বিষ্ণুভক্ত মানুরে বিষ্ণুপ্রিয় বা বিষ্ণুভক্ত বিশেষণে ভূষিত করানি যাকরের। এগদে মণিপুরী শব্দগ ব্যাখ্যা করলে পেয়ারতায় বিশেষ অঞ্চল আগর নাঙ মণিপুর, আর ঔ অঞ্চলর বাসিন্দা মণিপুরী, তানুর রীতিনীতি, কৃষ্টি, ভাষা, ধারণ করিয়া জাতি আহান হিসাবে পরিচিত বারো সর্বস্তরে স্বীকৃত অছি। এহান আজিকার কথাহান নাগয়। প্রাগঐতিহাসিক যুগেও মণিপুরী পরিচয় ঔহানল পালয়া আছি। কিন্তু কালর গতিত মণিপুরর ইতিহাসরতাও পটপরিবর্তন অছে। প্রাগঐতিহাসিক কালে মণিপুরে বসবাস করেছিল মানুর ধর্ম এক, কৃষ্টি এক, ভাষাও এক। বিষ্ণু উপাস্যদ্যোগ, কৃষ্টিহানও বৈদিক বারো ভাষাহানও প্রাকৃত। কালে কালে বিভিন্ন কারণে পশ্চিমেদেও আয়া হমেইলাগা মানুর ভাষা, কৃষ্টি ধর্মবিশ্বাস তদানিন্তন কালর মণিপুরে বসবাস করা মানুর লগে খানি খানি পার্থক্য থাইলেও প্রায় সমপর্যায়র আছিল। উহানে উভয় দলর মধ্যে সমন্বয় সৃষ্টি করিয়া মণিপুরী জাতর পরিধিহান ডাঙর অছিল। যদিও পশ্চিমেদেও আহেছিল মানুর লগে পূর্ববর্তীকালে মণিপুরে বসবাসকারী মানুর ভিতরে সমন্বয় সৃষ্টি করিয়া এক জাতি হিসাবে পরিচিত অছিল। তথাপি প্রত্যেক গোষ্ঠীর পরিচয় নামাঙকরিয়া কোন গোষ্ঠী খুমেলে - গোত্র আত্রেয় বারো অংগ্রেস্য, আঙোম বা অক্ষম - গোত্র ভরতাজ, লোয়াঙ গোত্র বশিষ্ঠ পরিচয় এহানাত জিৎতা করিয়া থইলা। বিশেষ করিয়া বৈবাহিক সূত্রে স্বগোত্র বিবাহ নিষিদ্ধ করেছিল।

পরবর্তীকালে মণিপুরর পূর্বেদেওও ভিন্ন ভিন্ন জাতর মানু মণিপুরে হমাছিল। হাবিরেও মণিপুরর মানুয়ে কলকরেছিল। তবে পূর্বদিকেও আহেছিল মানুর ধর্মবিশ্বাস, কৃষ্টি ভাষা, আচার ব্যবহার পূর্ববর্তীকালেও মণিপুরে বসবাসকারী মানুর লগে না তিলছিল। হাবি মানুর পরিচয়হান মণিপুরী অইলেও ধর্ম, কৃষ্টি, ভাষা বারো আচার ব্যবহার পার্থক্য আছিল। কালর গতিত উহানে মণিপুরী বুললে এক জাতি, এক ধর্ম, এক ভাষা, এক কৃষ্টি না বুঝেইল। ১৮০০শ শতাব্দিত মণিপুর রাজ পামহেবার

সময় মণিপুর বাসী হাবিৰে এক জাতি, এক ধর্ম, এক কৃষ্টিৰ গণ্ডীভুক্ত করানীৰ উদ্দেশ্যে শাস্তদাস বাবাজী নাগুর রামাউতি বৈষ্ণব ধর্মৰ গুরুস্থানীয় আগরে আনিয়া হাবিৰে শাস্তদাস বাবাজীরাং দীক্ষা দেছিল। কিন্তু বৈদিক অনুশাসনে শাসিত বিষুভক্ত মণিপুরীয়ে দীক্ষা গ্রহণ করানিত আপত্তি জানাছিল। কারণ বিষু ধর্মীয় বৈষ্ণব বারো রামাউতি ধর্ম দিয়হানিও হিন্দু ধর্ম অইলেও প্রথাগতও দর্শনগত পার্থক্য আছিল। পামহৈবার হিন্দুধর্মৰ ভিতরে এসাদে পার্থক্য থাৰ উহানৰ কোন জ্ঞান নেয়নিয়ে শাস্তদাস বাবাজীৰেল হাবিহানরে দীক্ষা দেওয়ানিৰ আদেশ দেছিল। শাস্তদাসৰ দীক্ষা দেনাৰ পিছেও উভয় গোষ্ঠীৰ ভিতরে ধর্মবিশ্বাসৰ, কৃষ্টিৰ পার্থক্য থা গেলগা। যেহান ভাগ্যচন্দ্র মহারাজার সময় উভয় গোষ্ঠীয়ে মহাপ্রভুর প্রচলিত বারো প্রচারিত গৌড়ীয় বৈষ্ণব ধর্মত পাঠেও গুরুস্থানীয় গঙ্গানারায়ন চক্রবর্তীয়ে (মতান্তরে রামনারায়ণ) আনিয়া দীক্ষা দেনাৰ ব্যবস্থা করেছিল। উতার পিছে উভয় গোষ্ঠীয়ে এক ধর্ম, এক কৃষ্টি পালন করেছিল। যদিও ভাষাগত পার্থক্য থা গেছিলগা। পামহৈবার সময়ত বিষুভক্ত মণিপুরীয়ে বিষুপ্রিয়া মণিপুরী বারো শাস্তদাসরাং দীক্ষিত মণিপুরীয়ে মৈতৈ মণিপুরী এ দিয়ভাগে ভাগ করানি অছিল। ভাগ্যচন্দ্র মহারাজার আমলেও ধর্ম, কৃষ্টি এক অইলেও ভাষাগত পার্থক্য দিয় গোষ্ঠীৰ আলাদা পরিচয় থাগেলগা যদিও সামাজিক স্তরে বিশেষ কোন পার্থক্য নাথাছিল। উহানে মণিপুরী বুললে বিষুপ্রিয়া মণিপুরী বারো মৈতৈ মণিপুরী, মণিপুরী দ্বিভাষী জাতি হিসাবে পরিচিত অইলা। তবে মণিপুরৰ বাহিৰে আসাম, ত্রিপুরা, বাংলাদেশ তথা মেয়ানমারে বসবাস করা উভয় গোষ্ঠীৰ পরিচয় কিসাদে মণিপুরী ইতিহাসৰ পটভূমিকাত আলোচনা করিয়া চানা থক।

উনিশ শ শতাব্দীৰ প্রথমভাগে ব্রহ্মদেশৰ মণিপুর আক্রমণে মণিপুরৰ মহারাজা সহ বহু মানু কাছাড়, শ্রীহট্টে, ত্রিপুরাত প্রাণ রক্ষার তাগিদে দাবদিয়া আহেছিল। ইতিহাসে উল্লেখ আছে মণিপুরৰ মহারাজ সুরজিত তার দ্বি বেইবুনি মার্জিত বারো গণ্ডীৰ সিং কাছাড় আয়া কাছাড়ী রাজা গোবিন্দ নারায়নরে তাল করিয়া কাছাড় দখল করেছিল। মধ্যবর্তী কাছাড় সুরজিত সিং, ঝাপিরবন্দ সহ আশ পাশ মার্জিত সিং বারো কালাইন উত্তর কাছাড় গণ্ডীৰ সিং মণিপুর দখল করলে অনেক মানু মণিপুরে আলথক অয়া গেলাগাও অনেক মানু স্থায়ীভাবে আসাম, (কাছাড় বারো শ্রীহট্ট) ত্রিপুরাত থা গেলাগা। বহু মানুৰে ব্রহ্মদেশৰ রাজার বন্দী হিসাবে বা দাবদিয়া মিয়ানমারে গেছিলগাতা উতা এবাকাও আছি। গতিকে উনিশ শ শতাব্দীত অকরিয়া বর্তমান একবিংশ শতাব্দী পর্যন্ত দুইশত বৎসর মাত্র আমার সমাজৰ অংশ আহানৰ (যেগ মণিপুরে আলথক অয়া নাগেছিগা) বসবাসৰ কালহান। বারো প্রাগ্‌ঐতিহাসিক যুগেও অকরিয়া উনিশ শ শতাব্দী পর্যন্ত কয়েক হাজার বছর আমার পূর্বপুরুষ মণিপুরে বসবাস কালহান। এহানে দৃঢ়তারে মাতে পারিয়ার মণিপুরৰ মাটির লগে মণিপুরৰ বাহিৰে বসবাসকারী আমার সমাজৰ সম্মন্ধ হাজার হাজার বছর। হাজার হাজার বছর ধরিয়া আমার পরিচয় আমি মণিপুরী, আমি মণিপুরৰ বাসিন্দা, মণিপুরৰ মাটির লগে আমার ওতপ্রোত সম্মন্ধ। ওহানে মণিপুর বারো মণিপুরী এ দিয়হানিৰ লগে আমার রক্তৰ সম্পর্ক। আমার পূর্বপুরুষৰ রক্ত এবাকা আমার গারীগর সিঙলেয়ে সিঙলেয়ে দাবদের। এ রক্ত মণিপুরৰ রক্ত, মণিপুরীৰ রক্ত।

উহানে মণিপুরৰ প্রতি আমার মানসিক দুর্বলতা। মণিপুরৰ মানুৰ লগে আমার আত্মীয়তাবোধ, মণিপুরৰ মাটি আমার মাটি। মণিপুরৰ ভিতরেই অক্ বাহিৰেও অক্, সমগ্র মণিপুরী জাতিৰ এই মণিপুর। মণিপুরৰ গজে কোন অন্যায়, কোন অত্যাচার আমার নিজৰ গজে অর বুলিয়া মণিপুরৰ বাহিৰে বসবাসকারী মণিপুরীত নিওকরতারা। ও অত্যাচার অবিচারৰ বিরুদ্ধে সোচ্চার অয়া উঠানিৰ চিন্তা করতারা সমগ্র বিষুপ্রিয়া মণিপুরী সমাজ।

বর্তমানে ভারত সরকার এন.এস.সি.এন. (মুইবা গোষ্ঠী)ৰ লগে অস্ত্রবিরতি চুক্তি করতে নালালেও ভৌগলিক সীমা অতিক্রম করিয়া মণিপুর, আসাম বারো অরুণাচলৰ নাগা অধ্যুষিত অঞ্চলেও অস্ত্রবিরতি সম্প্রসারিত করেছিল। তিন চারিমাহা আগে দিল্লীত মুইভা গোষ্ঠীৰ লগে ভারত সরকারৰ আলোচনাত মুইভা গোষ্ঠীৰ দাবী আছিল উত্তর পূর্বাঞ্চলৰ নাগা অধ্যুষিত অঞ্চল হাবি নাগালেণ্ডৰ অস্ত্রভুক্ত করিয়া বৃহত্তর নাগালিম সৃষ্টি করানি। ভারত সরকারৰতাও এ দাবীএহানৰ প্রতি সহানুভূতি আছিল। কিন্তু আসাম, অরুণাচল বারো মণিপুরৰ প্রবল আপত্তিত আলোচনা অসম্পূর্ণ থাইল। ভবিষ্যতে বারো আলোচনা অইতয়। উত্তর পূর্বাঞ্চলে শান্তি স্থাপনৰ উদ্দেশ্যে যদি এন.এস.সি.এন. এর দাবী গৃহিত অয়া আসাম, অরুণাচল বারো মণিপুরৰ নাগা অধ্যুষিত অঞ্চল নাগালেণ্ডৰ লগে যুক্ত থর উহান অইলে মণিপুরৰ অস্তিত্ব বিলীন অনার সম্ভাবনা। নাগা অধ্যুষিত অঞ্চল

বাদ দিলে থাইল কুকি, মার অঞ্চল। ও অঞ্চল যদি মিজোরামে দাবী করের তা অইলে মণিপুর বুলিয়া থাইতয় উহান আসামর জিলা আগর লগেও সমান অইতয় কিনা সন্দেহ। এ অবস্থাত মণিপুর রাজ্যর অস্তিত্ব সঙ্কটাপূর্ণ।

এ অবস্থাত মণিপুরী জাতি হিসাবে বিষ্ণুপ্রিয়া মণিপুরীর জাতীয় চেতনাবোধ থার উহান অইলে মণিপুরর গজে কোন অন্যায় অবিচারর তীর প্রতিবাদ করানি বিষ্ণুপ্রিয়া মণিপুরী সমাজর প্রাথমিক ও প্রধান কর্তব্য নাগয়তা? বিষ্ণুপ্রিয়া মণিপুরী সমাজর হাবি সংস্থা, হাবি শিক্ষিত সমাজ তথা সমগ্র সমাজ মৈতৈ মণিপুরীর লগে একাত্ম অয়া হাবি রকমর বিভেদ পাহরিয়া বিষ্ণুপ্রিয়া মণিপুরী বারো মৈতৈ মণিপুরী দ্বিয় গোষ্ঠীয়ে মঞ্চ আগত উবা অয়া মণিপুর রক্ষার শপথ নেনা থক। মণি পুর জিংতা অইলে মণিপুরী জিংতা অইতয় বারো মণিপুরী জিংতা অইলে বিষ্ণুপ্রিয়া মণিপুরীও জিংতা অইতয়। তানুর সমাজর বিভিন্ন সংস্থার নেতৃবৃন্দর নীরবতা, সমাজর শিক্ষিত গিরিগিথানীর নীরবতা নিজর জাতীয় সত্ত্বার প্রতি সচেতনতার অভাব বুলিয়াই মনে অর। সূক্ষ্ম বিচার বুদ্ধি বারো বিবেক বিবেচনার প্রতি উদাসিনতা সমাজে ঝাপদিয়া। এহান সমাজর সংস্থার অনুসৃত যুগোপযোগী বারো এবাকা পেয়া সাবলীল নাগয়। এহান বিষ্ণুপ্রিয়া মণিপুরীর জাতীয় চেতনাবোধর অভাবহান কিনা এ প্রশ্ন এহান থয়া প্রবন্ধ এহানর অবতারণা।

— ০০০ —

স্বাধীন ভারত বারো বিষ্ণুপ্রিয়া মণিপুরী

— চন্দ্রমোহন রাজকুমার

দীর্ঘদিনর সংগ্রামর পিছে অপূরণীয় ক্ষতি স্বীকার করিয়াও বালা - ভারতবর্ষর স্বাধীনতা অর্জন করল ১৯৪৭ ইংরাজীর ১৫ই আগষ্ট। ভারতর এ স্বাধীনতা সংগ্রামে বিষ্ণুপ্রিয়া মণিপুরীর অবদান কম নাছিল। মণিপুর দখল করিয়া ব্রিটিশ সাম্রাজ্যর আওতাত নেনারকা দিয়া পেঠাছিল। ইংরাজ সেনাপতি হতভাগা কুইন্টনর নাটক স্রষ্টা আমার বীর টিকেড্রজীং, মহারাজ কুলচন্দ্র, মণিপুরর থাঙল জেনারেল, আয়াপারেল প্রমুখ বীর মণিপুরীয়ে ব্রিটিশ সাম্রাজ্যবাদ রোধ করিয়া দেশর স্বাধীনতা রক্ষারকা অসীম বীরত্ব সহকারে লালফাম্ করিয়া প্রাণ উৎসর্গ করিয়া গেলাগা। পরবর্তীকালে “ভারত এরো” আন্দোলনর আগে আগে ভানুবিলে শ্রীমতি লীলাবতী শর্মা, বৈকুণ্ঠ নাথ শর্মা, গিরীন্দ্র সিংহ, শ্রীমতি সাবিত্রী সিংহ, পঞ্চানন শর্মা, রূপচাঁদ সিংহ, কৃষ্ণমনি শর্মা প্রমুখ বারো কত গিরি-গিথানিয়ে জমিদারী বারো জমিদারর রক্ষাকর্তা ইংরাজ সরকারর বিরুদ্ধে কঠোর সংগ্রাম করিয়া সমগ্র ভারতবর্ষর কৃষক সমাজে বিরাট আন্দোলন আহানর অবতারণা করেছিল। যেহান ভারতর স্বাধীনতা সংগ্রামর রূপহান পেইয়া স্বাধীনতার টোল আসমুদ্র-হিমাচল আলোড়িত করিয়া তুলে পাঁরেছিল। প্রখ্যাত ইরাবত সিংহ গিরকর অনুগত করিমগঞ্জ মহকুমার খালপারর শঙ্কু সিংহ বারো প্রতাপগড় অঞ্চলর আরাকউ কত মানু পুলিশর আঁহিত ধুলি দিয়া বিভিন্ন উপায়ে ইংরাজ শাসনর বিরুদ্ধে দীর্ঘদিন লড়িয়া গেলাগা। গান্ধীজীর অসহযোগ আন্দোলনে প্রণোদিত অইয়া সারা ভারতবর্ষত আবালবৃদ্ধ-বনিতা, উদ্দীপ্ত অইয়া উঠেছি। উহান মানুয়ে হিম্পেয়া নাগয়- উহান স্বতস্ফুর্ত উদ্দীপনহান। মোর সাদানে উবাকার কনাক বয়সর ছাত্র আগয়ও শিলচর নরসিং হাই স্কুলর নিম্নশ্রেণীত তাম্‌করতে অসহযোগ পালন করানিরকা স্কুলে ছাত্র বারো শিক্ষকরে হোমানি খামকরানিরকা স্কুলর সদর, দুয়ারহানর মাটিহানাত দীঘল অইয়া পরিয়া থাইয়া - মনেইলে আমারে পারা দিয়া আমার গজেদে যেইগা বুলিয়া ছাত্র-মাস্তর আট কেইলাং। তেল্‌লাম্‌ হানাত পুলিশ আইয়া বারেইয়া উঠেইয়া দলবদ্ধ ভাবে থানাত নিয়া আটক করেছিলগা। কিন্তু কতিগ আটক করতায় তা; আন্দোলনে যোগ নাদানিরকা হুসিয়ারী করিয়া উবাকারকা নজর বন্দি হিসাবে এরা দিলা। কিন্তু গারিত উদ্দীপনার সীমা নেই। কোংগয় কার হুসিয়ারী হনতাইতা। নেতায় আহ্বান করলে বন্দেমাতরম্ বুলিয়া চিকারী দিয়া নিকুললাং - দিনে অক বা রাতি অক বন্দেমাতরম্ মন্ত্রল শহরে গজে সংগ্রামর ধ্বনিল তুলপার করিয়া থাইলাং। কোরাং গেলগা লেরিক - কোরাং গেলগা স্কুল। পুলিশর কিল্‌ বারি খেইয়াও আটকে থাইয়াও

এরাদেনাতে নেই। বিষ্ণুপ্রিয়া মণিপুরী স্বাধীনতা সংগ্রামী আজিও অনেক জিংতা অইয়া আছি যেতায় ঘটনার জীবন্ত সাক্ষ্য দিয়া আছি। স্বার্থপর রাজনীতির প্রকোপে, সাম্প্রদায়িক অন্ধতার কারণে বারো সার্টিফিকেট খারী খল-সংগ্রামীর ছলনায় সমাজ এহানর বহুসংখ্যক স্বাধীনতা সংগ্রামীরে আজিও ইতিহাসে ফাম দেনা নাছে। অউ সংগ্রামী উতায় আজির আমার সমাজর অবস্থা দেহিয়া উপায় নাপেয়া ঠু-নিংশা ভাগিয়াই ক্ষান্ত অইয়া আছি।

ভারতবর্ষ স্বাধীন অইলতা অর্ধশতাব্দীরও গজে অইল। কিন্তু স্বাধীন ভারতে বিষ্ণুপ্রিয়া মণিপুরী আমার স্বাধীনতা কিহানাত? দেশ বিভাজনের লগে সমাজর গুলিপারা মানু উগিও দেশ দিয়োহানাত ভাগ অয়া দুরেই অয়া রাজনীতিত সম্মন্ধ ছাড়া অয়া পরলাং। দ্বি় দেশেও অন্যজাতর তুলনায় আমি সংখ্যা লঘিষ্ট। অবশ্য পূর্ব পাকিস্থানর উত্তরাধিকার বাংলাদেশে কিন্তু মণিপুরী উতারাংত আমার বিষ্ণুপ্রিয়া মণিপুরী অধিবাসী যাম অয়া এবং লয়াগ ডাঙর অয়া কাদা-কাদাত আকসাটে পুলয়া বসতি করানিয়ে তানু বাংলাদেশে মণিপুরী হিসাবে সুযোগ সুবিধাও যথেষ্ট পেয়া থাইতারা। তুলনামূলক ভাবে তানু বরং নুঙেই অয়া পালয়া আছি বুলানি যাকরের। অন্যদিগে ভারতবর্ষত - আমার জন্মভূমিত আমার জনসংখ্যা মণিপুরেও দ্বিতীয় মণিপুরে অর্থাৎ কাছাড় লেইপাকে লঘিষ্টতম অয়া পরলাং। তাথেনেও ইমে উহান ও সময়কার আমার বিধায়ক গিরকগাছিয়ে আমার ভবিষ্যৎ সম্বন্ধে খানিগ্নারাও চিন্তা নাকরেছিল। না আমার ভাষারকা, না অবস্থার পরিপ্রেক্ষিতে আমার জনবসতির সুবিধারকা। আমার মানু যেগি উদ্বাস্তু অয়া পাকিস্থানেও হিন্দুস্থানে অয়া ফৌওইলাগা উগিরেও জিরিবামেদে মণিপুরেদে সেচা দিলা। 'অইন' সমাজর উদ্বাস্তু যাম অয়া কাছাড়, করিমগঞ্জ, বারো হাইলাকান্দিত চাকিরকহান অয়া হীঢ় না থয়া বসতির ফাম পেইলা, ফলে বিভিন্ন সম্প্রদায়র জনসমাজর হাদিত বিষ্ণুপ্রিয়ার জনসংখ্যা কময়া কময়া নেয়নি অকরলা। যেগি বনফাড়ার আমলেও বিছিন্ন অবস্থায় গাঙ পাতিয়া আছি এগিয়ে বারো পুলয়া আকসাটে আমারতার ডাঙর লয়া আগ অইয়া থানা উহানে বর্তমান অবস্থাত সম্ভব নাগয়। উতার গজে হেরে উতায় অর্থাৎ মৈতৈ মণিপুরিয়ে ডাঙর লয়া আকেইগত পুলয়া বসত করানিয়ে বারো মণিপুরর তানুর মানুর সমর্থনে বলি-পাংকাল পেয়া আমার পিছে লাগিয়াই আছি। ও কারণে ভারতর বিরাট জনগোষ্ঠীর হাদিত ক্ষুদ্রতম জনসমাজর আমার মানু বর্তমানে যে অবস্থাত পড়িয়া আছি এহানাত আমারাং স্বাধীনতার কি অর্থ? ভারত স্বাধীন অনায় আমি কি কি ফল উপভোগ করে পারেছিতা? মাতৃভাষাল লেরিক তাম্‌করানি - যেহান ভারতর সংবিধানে দেছে আমার মৌলিক অধিকার আহান, উহানউ এবুজ পুরাপুরী পানা নুয়ারিয়া আছি। বারো প্রয়োজনীয় সরকারী মূল্যবান ঘোষণা বারো জাননী উহানিল আমার মাতৃভাষাত থেই করিয়া প্রকাশ করলে রাজ্যিক বারো রাষ্ট্রর বিষয়ে আমার অনভিজ্ঞ সাধারণ নাগরিকে খানি হারপা পারিয়ার বা হিকে পারিয়ার- উহানও নার। অথচ এ বিষয়ে ১৯৬১ ইংরাজীত ভারতর প্রধান মন্ত্রীর সভাপতিত্বত মূখ্যমন্ত্রীবন্দর মহাসভা উহানর ১১-১২ আগষ্টর ১৩ নং প্রস্তাবে সিদ্ধান্ত নিয়া ইস্তাহার জারী করানি অছিল। ও মহাসভা উহানর ১৪নং প্রস্তাব উহানও উল্লেখযোগ্য। মাতৃভাষাল শিক্ষার বিষয়ে ১৯৪৯ ইংরাজীর প্রাদেশিক মূখ্যমন্ত্রীর মহাসভার প্রস্তাবর অনুযায়ী স্টেট রি অর্গেনাইজেশন কমিশনর প্রতিবেদন মতে ভারত সরকারেও এ বিষয়ে তানুর ১৯৫৩ ইংরাজীর মেমোরেণ্ডামে এ মত এহান প্রকাশ করেছিল। আমি কোনো তহশীলর ১৫ শতাংশ জনসংখ্যাও নাছিথাং? নাইলেও ভারতর জাতি গোষ্ঠী আহানে রাজ্যিক বিষয়ে মাতৃভাষার মাধ্যমে হারপানির অধিকার নেই থাং - বা উসাদে হারপেইল পছা নেইথাং? আমি কিন্তু এবুজ এসাদে সুযোগ নাপেয়াই আছি।

স্বাধীনতার প্রারম্ভে নিজর দেশর সংবিধানর সুযোগ সুবিধাল যেবাকা প্রত্যেক ব্যক্তি, সম্প্রদায় সমাজ বারো সাহিত্যর ক্রমোন্নতি সাধন করিয়া যুগ পরিবর্তন আহান করানিত ব্যস্ত অছি - অউ যুগে বিষ্ণুপ্রিয়া মণিপুরী এ ক্ষুদ্র অথচ ঐতিহ্যপূর্ণ সমাজ এহান অজ্ঞাত বারো অলক্ষিত বারো অবহেলিত অয়া আছি। তানুরে রাজ্য সরকারেও যথাযথ তদারক না করের, বারো কেন্দ্রীয় সরকারেও এতার এবেদে যত্নবান নার। ফলে সমাজ এহানর সামগ্রিক উন্নতি এবুজ একেবারে তৃণমূলে। হাবি পছাও বঞ্চিত অনায় তানু বর্তমান যুগর সরকারী কিংবা জাতীয় উন্নতিমূলক আচনিত যৌ অ-নুয়ারতারা; কারণ এক্ষেত্রে যোগদান করিল তানুর পথ নেই ক্ষমতাও নেই, বারো সরকারর পক্ষত তানুরকা বুলিয়া কোনো পদফাম সংরক্ষিত করিয়া থনাও নেই

এমনেও বিষ্ণুপ্রিয়া মণিপুরী এতা গুলি গুলি অয়া বিচ্ছিন্ন অবস্থাত বসত করিয়া থানায় রাজনীতির ক্ষেত্রে তানু একেবারে অসহায় অবস্থাত আছি। উতার গজে আমি অস্বচ্ছল অবস্থার কারণে সমাজ এহানর শিক্ষিত বারো উপযুক্ত খুব কম সংখ্যক মানুষেহে রাজনীতির ক্ষেত্রে বুকি নেনা পারতারাগা। রাজনীতির ক্ষেত্রে অসহায় অবস্থার কারণে প্রতিনিধিত্ব করে নুয়ারানিয়ে আইন সভাত তানুর নার না ফৌ অরগা। প্রতিনিধিত্ব যেহানে তানুর অনুপস্থিতির সুযোগ পেয়া পঞ্চায়েৎ বারো বিধান সভার সমষ্টি গঠন বা পুনর্গঠন এমনভাবে করানি অর যেহানে এ সমাজর জনগোষ্ঠীর স্থিতি টুকরা টুকরা করিয়া কাপিয়া কাটিয়া স্বার্থাশ্রেষ্টী রাজনৈতিক দৃষ্টিল নিজর নিজর সুবিধামত সমষ্টি হংকরানিত যেইতেগা সমষ্টি আকেইহানাত এ সমাজর মানুষে অতি অল্পসংখ্যক ভোটদাতা হংকরিয়া নির্বাচনে তানুর ভোটদাতার গুরুত্ব একেবারে নগন্য করে বেলতারা। এসাদে করতে ভৌগলিক বা প্রাকৃতিক বা তহশীলর সীমার চিন্তা মোটেই না থইতারা। উসাদে নিষ্ঠুর বারো বিবেচনাইন ভাবে এ সমাজর ভোটদাতারে না খেই করলে কিন্তু বিষ্ণুপ্রিয়া সমাজর কোনো আগয় কোনো সমষ্টি প্রতিনিধিত্ব করিল সুযোগ পেইলাইস্। কিন্তু কোংগয় খালকরতৈতা? কোনগয় মাত্তৈতা কোংগই করতৈতা? না আছে প্রতিনিধিত্ব না আছে উসাদে উপযুক্ত সংস্থান - না আছে বিবেক বিবেচনাপূর্ণ শক্তিও নার। এসাদে অবস্থাত তানু বরাবরই নিষ্পেষিত নিপীড়িত অয়াই থানাতপরেছি যতদিন তানু অজ্ঞতাপূর্ণ অতি অল্পসংখ্যক বারো বিক্ষিপ্ত জনসংখ্যা অয়া বাস করিয়া থাইতারা অথচ আওয়াজির সাদানে উপযুক্ত সংস্থানর মাধ্যমে প্রতিবাদমূলক উচ্চনিাদে স্থায়ী অধিকারর দাবী করে নুবারতারা।

জাত এহানরে মণিপুরী বুলিয়া অ.বি.সি. কমিশনে পয়লাঙও অন্যান্য পিছপরা শ্রেণী (অ.বি.সি.) আহান চিন্কেরেছি। উল্লেখ্য পয়লাকার ব্যকওয়ার্ড ক্লাশ কমিশনে শিলঙে স্বয়ং মিয়ে বারো আসাম সচিবালয়র মৈতৈ জাতর অফিসার আগয় গিয়া এবিষয়ে মেমোরেণ্ডাম দিয়া সাক্ষ্য দেছিলাংগা। ১৯৭৫ ইংরাজীতে ও ইমে আগেকার উসাদে আমারে পিছপরা শ্রেণীত লিষ্টিভুক্ত করেছিলা। এরে পিছেদে ভাষা আন্দোলনর হাকতাকে ১৯৯৫-৯৬ ইংরাজীত আমি আমার সন্তুষ্টিরকা কমিশনে আবেদন করানিয়ে আমারে বিষ্ণুপ্রিয়া মণিপুরী বুলিয়া তঙাল করে নাঙহান ভাবানি অইলতা। উহানও কিন্তু আগেকার সাদানে হে মণিপুরী জাতহানর আকতা বুলিয়া হে ভরানি আছে। যেমন - মণিপুরীর মাঝে - মণিপুরী ব্রাহ্মন মণিপুরী মুসলমান, বারো বিষ্ণুপ্রিয়া মণিপুরী। উহান আমি কিন্তু নুয়া করে অ.বি.সি.ত স্বীকৃতি পাছি তা নাগয়, আমি আগেকাত অ.বি.সি. আমারে আলাদা জাত আহান বুলিয়া পিছপরা মণিপুরী শ্রেণীর আকতা বুলিয়া হে মাতেছি। এহান আমি কতিহান লাভবান অইলাং এহান আমার উত্তরপুরুষে বিবেচনা করতাই। কারণ আমি ডেঙ নাগই।

আমি গাছ বার অন্য ঔতা হে ডেঙ। যেতাও অক বিষ্ণুপ্রিয়া মণিপুরী এতা কিন্তু অন্যান্য পিছপরা শ্রেণীর মাঝে অতি অল্প সংখ্যক জনসমাজর জাত আহান। জাত এহানরে অন্যান্য পিছপরা শ্রেণীর মানুর লগে তুলনা করানি থক্ নেই। কারণ বিষ্ণুপ্রিয়া মণিপুরী সম্পূর্ণ জাতহানেই পিছপরা জাতহান। এ জাত এহানাত উন্নত আকতা বারো অনুন্নত আকতা বুলিলতা নেই। সম্প্রদায় এহান নিজেই স্বয়ং সম্পন্ন জাত আহান। অন্যান্য জাতর বা সম্প্রদায়র মানুষে তানুর নিজ নিজ জাতর উন্নত বা অনুন্নত সম্প্রদায়র মানুর লগে বিবাহ সূত্রে আবদ্ধ অ পারতারা উসাদে বিয়ার পিছে অনেক ক্ষেত্রে, বিশেষ করে নিঙলব ক্ষেত্রে অনুন্নত শ্রেণীর নিঙল আগয় তানুর জাতর উন্নত শ্রেণীর মুনি আগরে বিয়া করলে অউ নিঙল উগ বারো তেইর ছৌ-জিপুত অনুন্নত বা পিছপরা শ্রেণীর থাকে না থাইতারা। বাঙালী সম্প্রদায়র পিছপরা শ্রেণীর মানুষে তানুর বৃহত্তর-বারো উন্নততর বাঙালী সমাজর লগে বৈবাহিকী অ পারতারা। উসাদে অসমীয়া, উড়িয়া, নেপালী, বিহারী ইত্যাদি অন্যান্য পিছপরা শ্রেণীর মানুষেও তানুর মূল সম্প্রদায় বা সমাজর লগে তিলো পারতারা।

ভাষা বুলতে ভাষাও তানুরতা স্বীকৃতিপ্রাপ্ত মাতৃভাষা আছে যেহানল তানু উন্নত অনুন্নত হাবিয়েও লেরিক তামকরে পারতারা এবং এবাকাও তামকরিয়া আছি। অন্যদিকে বিষ্ণুপ্রিয়া মণিপুরীয়ে অন্য কোনো জাতর সম্প্রদায়র লগে বিবাহ সূত্রে আবদ্ধ অনা নুয়ারতারা দৈবাৎ অইলে জাত মাঙইতারা - অর্থাৎ জাতেত্ব বহিস্কৃত অইতারা। এমন কি মৈতৈ মণিপুরীর লগেও তানুর বিয়া-সাদী অয়া ঔনা নেই। এহান তানুর সামাজিক গোড়ামীর কারণেই অরহান শ্বে নেই। গোড়ামী এহান সামাজিক

প্রতিবন্ধক আহান - এহানে সমাজ অগ্রসর অনার পথে বাধার সৃষ্টি করের।

শিক্ষার দিকেও বারো অর্থনৈতিক উবেদেও বিষ্ণুপ্রিয়া সমাজ এহান এবুজ পিছে পরিয়া আছি। দারিদ্র্য তাড়ানায়ে অনেকগয় উচ্চশিক্ষা বারো উচ্চতর কারিগরী শিক্ষা পানা নুয়ারতারা ও কারনে চাকুরীর উবেদেও তানু সীমাবদ্ধ। আজি বিষ্ণুপ্রিয়া সমাজে ভারতীয় প্রশাসন সেবাতও আঙুলির আগাত লেহা পারিল হিসাবে কতগ হোমাছি উগিও নিম্নস্তরে। জেলেই তে নামগন্ধও নেই। কেন্দ্রীয় সরকারর দপ্তরেতে আমার মানু বিছারেয়া পানাই হিন্। শতেকে গোটেক। শিক্ষার অনুযোগী পরিবেশে বারো নিম্নমানব শিক্ষা প্রাপ্তির কারণে এ সমাজর ছো-ছুমারা প্রতিযোগীতাত পাং কৃতকার্য অনুয়ারতারা। যেহানি করতারা উহানিও তানুর ধৈর্য্য বারো আশ্রাণ চেষ্টার সালেদে অরতা। এক্ষেত্রে বুলতে তানুরকা কোনো সংরক্ষণ নেই। অথচ তপশীলি জাতি যেতার শিক্ষা দীক্ষা অতি নিম্নে আছিল - যেতারে জাত্যাভিমানী বিষ্ণুপ্রিয়ার সময় আহানাত ছকনি পেয়া মাং বুলিয়া নিংকরলা - নাগা, কুকি, খাসিয়া প্রমুখ জাতিয়ে সংরক্ষণ পেয়া দেশ জুড়িয়া উচ্চপদে অধিষ্ঠিত অনায় তানুরাং গিয়া করজোড়ে আঠুগাড়া দিয়ারগা। স্বাধীন ভারতে রাজনৈতিক চাল চলনর কারণে কোনো কোনো জাতর সংরক্ষণর আয়ু দশ বছরেও পঞ্চাশ বছর বারো পঞ্চাশ বছরেও কত কত বছর বাঢ়া বাঢ়া উন্নতত উন্নত করে দিয়া মেডশেল শাক্পা করে দিলা বারো তানুর আগে মিঙাল দেহেছি বিষ্ণুপ্রিয়া মণিপুরী অতি অল্প জনসংখ্যক জাত এহান তপশীলি সংরক্ষণ কিতাউ না পেয়া পিছে পরিয়া দিনে-দিনে অন্ধকারে ডুবে যিতারাগা। বিষ্ণুপ্রিয়া মণিপুরী সমাজ এহানর গজে স্বাধীনতার কী না উপহাস।

ব্যবসা বাণিজ্যত ও অর্থাভাবে উৎসাহহীন অইলা। শিল্পর দিকেও অনভিজ্ঞতা বারো এন্টারপ্রেনারশিপর অভাবে বারো সর্বোপরি মূলধনর অভাবে ছুপকরে আঙুয়া নুয়ারতারা। এ সমাজর ইমাইন্দলর জন্মগত শিল্প তাত শিল্প উতাও প্রায় লুপ্ত অ যারগা কারণ যান্ত্রিক বারো উন্নত ধরণর বস্ত্র শিল্পর জগতে তানুর আদিম ধারাবাহিক ডিজাইন বারো শিল্প ব্যবস্থার প্রতি কোনোগয়ও আকৃষ্ট নাইতারা। শিল্প উৎপাদিত বয়-বস্ত্রর বেচা কিনারকাও কোনো উপযুক্ত সংঘবদ্ধ প্রতিষ্ঠান বা সমবায় নেই। যেহানর মাধ্যমে তানু ব্যবসার প্রসার করে পারতারা। সরকারেও তানুর আদিম শিল্প ব্যবস্থার উন্নতির উবেদে ছুপ না চার সরকারী পরিকল্পনা থাইলেও সরকারী আচনি উহানি গ্রামীণ অঞ্চলে বসতি করিয়া থাইতারা মূল শিল্প উগিরাং না ফৌ অরগা। বিষ্ণুপ্রিয়া মণিপুরীতে তানুর নিরানব্বই শতাংশরও গজে গাঙে বসতি করতারা। শহরে, গঞ্জে, শিল্প বারো বাণিজ্য কেন্দ্রস্থলে তানুর বসতি এবাকাও শুণ্য।

চাকুরী নেই - ব্যবস্থান নেই - কোনো উপায়উ করিলতা নেই তানুরতা। কাছাড়, করিমগঞ্জ, হাইলাকান্দি অথবা আসাম কিংবা ভারতর অন্য কোনো শহরে গঞ্জে বিষ্ণুপ্রিয়া মণিপুরীর উপযুক্ত দোকান কিংবা শিল্প বাণিজ্যর প্রতিষ্ঠান আক্হানও দেহিলতা নেই। এ সমাজর মানুর আর্থিক কাঠাম বুলিল কোনো বস্তুয়েই নেই। অভাবর তাড়ানায় কিবা জানি পেইলে যেতাও ঐতে বুলিয়া বাধ্য অয়া একমাত্র মূলধন বোপা-বোপেয়ে যে সামান্যতম মাটি-বাড়ি খানি জুড়ে দেছিল। উহানি বেছে বেছে উহানিও প্রায় আটেইলাগা। খেতি করিয়া পেট পালানিরকা বিষ্ণুপ্রিয়া মণিপুরীর ঘর প্রতি থুঙইল 'বি' নেই। ভবিষ্যৎ অন্ধকার দেহিয়া বিভোলা লাগিয়া সমাজ এহানর গাউরাপুয়েই ছৌয়ে ঘর এরা দিয়া শহরেদে গিয়া ডেইডেই-হারা দিয়া খেয়া নাখেয়া উপাস থায়া থায়া কাম বিছারেয়া বুলতারাগা। এ সমাজর বেকার এ যুব সমাজ এহান এবাকা সমাজে উছৃঙ্খল বা কলঙ্ক অয়া উবা অছি। এতার কোনো সংস্থান নেই। কিন্তু কিয়াকা? আমিতে ভারতবর্ষর নাগরিক নাগয় থাঙ? আমিতে সরকারর কামরকা প্রয়োজনীয় কর না দিয়ার থাঙ? আমিতে ভারতবর্ষর উন্নয়নর খানিগ্লারাও অংশীদার অনার যোগ্য নাগই থাঙ? আমি কিয়াকা এবুজ শিক্ষা লনা নুয়ারতাঙইতা? অন্যান্য ভারতীয়র সাদানে আমি বিষ্ণুপ্রিয়ায় কি কারণে বেতার কেন্দ্র বা দূরদর্শনর মাধ্যমে আমার ভাষার এলা দেনা - বা ছনানি নুয়ারতাঙইতা বা নাচা টেংঠার আনন্দ উপভোগ করে নুয়ারতাঙায় তা? আমার জনসংখ্যার লগিষ্ঠতার সুযোগ নিয়া আমারে এতা হাবিস্ত কিয়াকা বস্বিত করিয়া থইতাইতা?

ভারতীয় উচ্চন্যায়ালয়র বিচার আহানাত (মিঃ বালাজী বনাম মাদ্রাজ সরকার) রায় দিয়া গেছিগা "রাজ্য সরকারে একজিকিউটিভ অর্ডার আহানল পিছপরা শ্রেণীর মানুরকা যে বিশেষ পস্থা নিয়া পারের যেহানরকা বিধান সভাত আইন হংকরানি না লাগের

উসাদে পছা নিকালতে মনেতে থনা লাগতে যে সংবিধানর ২৯(২) অনুচ্ছেদে দেছে মৌলিক অধিকার উতার লগেও যদি এদিক হেদিক অর তথাপি এসাদে সম্প্রদায় এতার উন্নতির কা বিশেষ পছা অবলম্বন করে পারের। এসাদে অবস্থান্ত্র এহানেই বিদিত অর যে নির্দিষ্ট উদ্দেশ্য প্রণোদিত রাজ্য সরকারর কার্যকরী আদেশ উহান বাহিরা সর্ব প্রকার চাপেত্ত মুক্ত” (AIR 1963SC-649).

“সংবিধানর ১৫(৪) অনুচ্ছেদে পিছপরা বা অনুমত বুলতে সামাজিক বারো শিক্ষা বিষয়ে অনুমত অনা উহানরে বুঝার। সামাজিক অনুমতি উহান বিশ্লেষণ করলে দারিদ্র্যতা হে উহানর কারণ অয়া থার।

শিক্ষা, সামাজিক গোড়ামী, অর্থনৈতিক, অস্বচ্ছলতা বারো দারিদ্র্যতাই যদি অনুমত সম্প্রদায়র উপাদান অইলে বিষুগপ্রিয়া মণিপূরী সমাজ আসামর অন্যান্য অনুমত শ্রেণীর মানুর মাঝে হাবিও জিঙে অনুমত সম্প্রদায়হান। তুলনামূলক ভাবে বিবেচনা করিয়া তানুর অধিকন্তম অনুমত সম্প্রদায় - (এম.অ.বি.সি.) চিহ্নিত করিয়া তানুর সিডিউলর সাদানে সুযোগ সুবিধা বা অধিকার দেনা থকর।

বিষুগপ্রিয়া সমাজ এহান - যেহান আদি যুগর রীতি-নীতি বারো কৃষ্টি, কলা বহন করিয়া চলিয়া আইতারা এহান বিভিন্ন সময় বিভিন্ন জাতি উপজাতীয় আক্রমণে ছিন্ন ভিন্ন অয়া দেশ দেশান্তরে গিয়া কততা মাঙইলা। মুষ্টিমেয় কতগ কোনো কালে ভারতর পূর্বাঞ্চলেদে আইয়া বিক্ষিপ্ত অবস্থাত বসত করিয়া অতি কষ্টে সমাজহান অলয়া আছি। এতার কৃষ্টি কলা ইতিহাস লুট করিয়া জ্বলিয়া পুড়িয়া বেলাদেনায় তানু সর্বহারা অইলা। অওয়ার ধাওয়নে তানুর বিরাট অংশ আহান বর্মা, শ্যাম দেশেদে গিয়া মালয়েশিয়া, সিঙ্গাপুর, মান্দালয়, সুমাত্রা, যাভা প্রভৃতি দক্ষিণ পূর্ব এশিয়ার বিভিন্ন দেশেদে গিয়া ফৌঅইলাগা। দেবনাগরী অক্ষরে ইকরা বিষুগপ্রিয়া ভাষার লেরিক-হস্তলিপি হলাও পেয়া ফৌ অছেগা আমার সমাজ এহানর এ হাত সর্বস্ব উদ্ধাররকা যে আমার কোনো প্রতিষ্ঠান আজি পেয়া কোনো উপযুক্ত পদক্ষেপ নিয়া পারেছিগাতা? অবলুপ্তিত লুপ্ত প্রায় আমার ইতিহাস অনুধাবন করানিরকা আমার কোনো প্রতিষ্ঠানে আজিও কোনো সক্রিয়া ভূমিকা ল পারেছিগ?

সামাজিক প্রতিষ্ঠান আত্মতুষ্টিরকা নাগয়, এ আত্মগরিমারকাও নাগয়, প্রতিষ্ঠান সমাজ সেবারকা, সমাজর উন্নতি সাধনরকা। লক্ষ্য স্থির থয়া করিয়া থাইলে প্রতিবন্ধক ইয়াম সময় টিকিয়া থা নুবারের। আসলে বর্তমানর আমার সামাজিক প্রতিষ্ঠান এতাৎ সামাজিক পরিকল্পনার ভীষণ অভাব। আমার এবাকার সামাজিক প্রতিষ্ঠানর কর্মীরাং জাতীয়তাবোধন্ত প্রভুত্ববোধ বারো সর্বজ্ঞতাবোধ জিঙিয়া প্রবল অয়া আছে। লাগিয়াই থাইতে এসাদে সাময়িক আত্মসম্মান যুদ্ধ এতার অনিবার্য পরিণাম পরশ্রীকাতরতা, অসত্যর আশ্রয় গ্রহণ, ব্যক্তি চরিত্র হনন, শ্লাঘ্য অপবাদ এতাও ভুগতে ভুগতে, আগর গজে আগয় অর ছিটা ছিটি দিয়া থাইতে প্রতিষ্ঠানে জাতীয় চরিত্র গঠন কিংবা জাতীয় অস্তিত্বর বিষয়ে চিন্তার শক্তি ক্রমে ক্রমে হারা বেলতার। এতা অহংকার উদ্ভূত স্নায়বিক নুয়ারা। সমাজর খাতিরে আমার সংস্থা বা প্রতিষ্ঠানর কর্মীয়ে আত্ম সমালোচনা করিয়া না চললে এসাদে অঘচন ঘটয়াই থাইতে। এবাকা আমার আত্ম বিশ্লেষণর সময়হান। নিজরে কু-সংস্কারেত্ত মুক্ত করানি লাগতে। সমাজহানর জাতীয়তাবোধে উদ্ভুদ্ধ করানি লাগতে। জাতহানর রক্ষা করিয়া জাত এহানরে মাম্ করিল চেষ্ঠা ব্যর্থ করানি লাগতে।

জাত এহান মামনি অকরেছিাততে মণিপূরে থাইতে। চীন দেশেত্ত দক্ষিণ পূর্ব এশিয়ার দেশ পেয়া এহানাৎ বেপারর পথগত অবস্থিত মণিপূরর মানু বিষুগপ্রিয়া এতা জাত বেজাতর আক্রমণে বন্দী অয়া বারো ধাবদিয়া ছিন্ন ভিন্ন অয়া বিভিন্ন দেশেদে গিয়া মাঙইলাগা। পরবর্তীকালে মঙ্গোলীয় মৈতের আক্রমণে মণিপূরে আছিল উগির অধিকাংশরে আত্মসম্মান করে বেল্লা।

অওয়ার ধাওয়নে বারো মৈতের আমলে ধর্মবিপ্লবে যেগি ভারতর পূর্বাঞ্চলেদে আয়া বন ফারিয়া বসতি করলাহা-এগিও এপেইত্ত কোচ জাতির আক্রমণে - ত্রিপুরীর আক্রমণে, ধ্যান সেনাপতির রাজত্ব থয়া বারো কুকীর লুণ্ঠনে বারো কাছাড়ী রাজার লগে মণিপূরর গম্ভীর সিংহ, চৌরজিৎ, মার্জিতর যুদ্ধর কারণে এত্ত অয়া ধাবদিয়া লুকেয়া থয়া থয়া সামাজিক শৃংখলাত

আইতে বহুত দিন, লাগিল। এপেইতও আমার বহুত মানু মাঙইলা। গোয়ালপারাদেও কততা মাঙইলাগা। ইয়ান্দাবুর সন্ধির পিছেদেহে গিয়া থিতি অনা অকরলা। ইতিমধ্যে কিন্তু বিষ্ণুপ্রিয়াৰ জনসংখ্যা মণিপুরী বারো মণিপুরৰ বাহিৰেদে গিয়া মূল সমাজেও চ্যুত অয়া স্থানীয় মানুৰ লগে মিশ্ৰিত অনাত বাধ্য অইলাগা।

এবেদে বারো পাশ্চাত্য শিক্ষাপ্ৰাপ্ত যুগ এহানাত কাছাড় লেইপাকে নেতৃত্বৰ আঙুলিৰ নিৰ্দেশে বিভিন্ন সংস্থা হংকরিয়া বিভিন্ন পথেদে চলানি অকরলা। দলে ভরি উতায় সমাজৰ সম্মতি না লয়াই - ছাপেয়া নিকাললা সেল্লাকে আমাৰতায় 'মণিপুরী' না ইকরিয়া পত্ৰিকা নিকালেয়া ইকরানি অকরলা - নাঙৰ আগে 'শ্ৰী' না ইকরিয়া 'বি' ইকরোকা। জাতহান কিহান - বিষ্ণুপ্রিয়া। ভাষাহান কিহান - বিষ্ণুপ্রিয়া ধৰ্মহান কিহান বিষ্ণুপ্রিয়া (চিনো এগ কোংগ) পৰিনামে ১৯৬১ ইংৰাজীৰ সেনসাসে পাথারকান্দিত বিষ্ণুপ্রিয়া জেলা আক্গ নিকুললি। সমাজৰ এসাদে উচ্ছংখলতাৰ সালেদে ও লোকলেহাত (সেন্সাসে) আৰাকও সৰ্বনাশ অইল। আমাৰ ভাষাহান মেইতেই ভাষা অপভ্ৰংশহান বুলিয়া ভাষা এহানৰে লিঙ্গিউষ্টিক কমিশনে মেইতে ভাষাগোষ্ঠীত ভরা দিলা। মণিপুরে বিষ্ণুপ্রিয়া নেই বুলিয়া ৰিপোর্ট দিলা। বারো সেন্সাসৰ রেজিষ্টাৰ জেনাৰেলে বিষ্ণুপ্রিয়া এতা চৈতন্য দেবৰ ধৰ্মপত্নী 'বিষ্ণুপ্রিয়া' দেবীৰাংত অছিতা বুলিয়া নোট দিল। আৰ বিষ্ণুপ্রিয়াৰ সংখ্যা মোটতে ১৫,১৮৩ গ বুলিয়া প্ৰকাশ কৰেদিলা। বিষ্ণুপ্রিয়া নিজৰে আৰ মণিপুরী বুলে নুয়ারলা। আমাৰ সমাজৰ দায়িত্বহীন সংস্থায় কিহান পেয়া ফৌকৰে পাৰলাগাতা চৈইক। মি ১৯৬৯ ইংৰাজীত সভাৰ সভাপতিগ হিসাবে 'লাইফ এণ্ড হেলথ্ টু যু মাদাৰ টাং' পিছেদে 'উইদাৰ গো দে' নাঙৰ লেৰিক দুহান নিকালেয়া ৰাজ্য সরকার বারো কেন্দ্ৰীয়া সরকারৰাং এ বিষয়ে খোৰ আপত্তি কৰিয়া প্ৰতিবাদ কৰলু। বারো হলাণ্ডে লীডেন লাইব্ৰেৰীত আমাৰ ঠাৱৰ লেৰিক আহান আছে বুলিয়া বাগেইলু। সেন্সাসৰ ডেপুটী রেজিষ্টাৰ জেনাৰেলে তাঁৰ ১৭ জুলাই ১৯৭১ ইংৰাজীৰ ৭/৮২/৬৯/ সিটিও চিটি উহানাত মোৰে বাগেইল যে রেজিষ্টাৰ জেনাৰেল বারো অন্যতায় দেসী নোট উতা তানুৰ নিজস্বমত। উহান সরকারৰ মতহান নাগয়। বারো বিষ্ণুপ্রিয়া ভাষাহানৰ জনসংখ্যা দেখয়াছি উহান যেগয় যেসাদে ইকরেছি উহানৰ প্ৰতিফলন মাত্ৰ। সেন্সাসে উহান না বদলার। বারো বিষ্ণুপ্রিয়া মণিপুরীৰ সম্বন্ধে নৃতত্ত্ব বিষয়ক বারো জাতিতত্ত্ব বিষয়ক গবেষণাৰ প্ৰস্তাব তানুৰাং এবাকা নেই।

অন্যগদে লিঙ্গিউষ্টিক কমিশনে মোৰ প্ৰতিবাদ উহানৰ গজে প্ৰতিবিধান কৰিয়া তানুৰ ২৩ এপ্ৰিল ১৯৭১ ইংৰাজীৰ ১২/৪/৭১ - ১৯৭১ ইংৰাজীৰ সেন্সাসে ১৯৬১ ইংৰাজীত কৰেছিলা ভুল উতা স্বীকাৰ কৰিয়া সংশোধন কৰিয়া বিষ্ণুপ্রিয়াৰ ভাষাহান মঙ্গোলীয়া মেইতে ভাষা গোষ্ঠীৰ অউতাত্ব সেচেয়া ইণ্ডো এৰিয়ান গোষ্ঠীত থিতি কৰে দিলা। বারো সংখ্যাও দশবছৰ ভিতৰে ১৫,১৮৩ ত ৪৩,৪১৩ বুলিয়া দেখয়েইলা অবশ্য জনসংখ্যা পিছেদে দেখয়াছি এতাও কম। কিন্তু আমি, আমাৰ সংস্থা হজাগ বারো সতৰ্ক না থানিয়ে এতা অৱতা। লীডেন লাইব্ৰেৰীত মেখলীৰ বিষয়ে বিভিন্ন দেশৰ ৰাষ্ট্ৰদূতৰ লগে মি যোগাযোগ কৰেছিলু। হলাণ্ডত তদানীন্তন ভাৰতীয়া ৰাষ্ট্ৰদূত বারো লীডেন লাইব্ৰেৰীৰ কৰ্তৃপক্ষয় সৌহাৰ্দপূণ জুয়াব দেখিলা যথাক্ৰমে তানুৰ এচএজি। আই এস আই/৩০৮/৪/৭১ তাং ২৫-৫-৭১ বারো লীডেন ৪ জুনি ১৯৭১ নম্বৰৰ চিটি উহানিত। এবাকাও এ বিষয়ে লেখালেখি চলিয়া আছে।

আসাম সরকার কিন্তু উবাকাও প্ৰতিকার না নেছেগা ভাষাৰ বিষয়ে হুদা তদন্ত চলেয়া প্ৰশ্ন নিকালেয়া থেছে। আসলে উবাকাই মণিপুর সরকারে তানুৰাং প্ৰতিবাদ জানেয়া থেছে। মণিপুর সরকারে মোৰ গজে কৈফিয়ৎ কৰেছিলা- তানুৰ ৫ জুলাই ১৯৭২ ইংৰাজীৰ ৫২/১/৭২ - এল্/এল্ এণ্ড আৰ চিটি উহানল মি এম্ এ এস/৫৮/১৫/৭২ তাং ৩০-৮-৭২ চিটি উহানল জুয়াব দেনাৰ পিছে তানু স্তব্দ। উবাকা গৌহাটীতও মেইতে সংস্থা আহানে মোৰে বিছাৰছিলা। মি তানুৰে জুয়াব নাদেছু।

'মেখলী'ৰ বিষয়ে মি ফিন্ল্যাণ্ড বিশ্ববিদ্যালয়ৰ প্ৰাচ্য বিষয়ক পণ্ডিত আগ নুট ক্ৰিশ্চিয়ান্সনৰ লগে মুখামুখি আলোচনা কৰেছিলু। গিৰক উগয় মিয়ে আকসাটে লেৰিক আহান নিকালেইল কথা। গিৰক উগৰাং মোৰ বারো আমাৰ অন্যান্য লেখকৰ ইকরা লেৰিক কতহান উপহাৰ দেছিলু। উহানি শ্বে নেই ফিন্ল্যাণ্ড ফৌ অছেগা। গিৰক উগয় ভাৰত এরা দিয়া জিতেগা মোৰাং

দেছিল চিঠি উহান মহাসভার রাজনগর অধিবেশনে দেখাছিল হাবিবর অবগতিরকা কিন্তু মহাসভা উবাকা স্বীয় শক্তিত উত্তপ্ত। বাহুরাদে হুনা তারা। অথচ আমার ভাষাহানর বিষয়ে শিলচরেত্ত ১৯৬৮ ইংরাজীত স্কুল পরিদর্শকে তার ৮সি/১/৬৩/১৪৮ এচ চিঠি উহানাত যে রিপোর্টহান দেছিল উহান মহাসভায় হার না পেইলা তা কিয়াকা? অউ রিপোর্ট উহানেই আমার ভাষার স্বীকৃতি ইচুদিন ঘুরপাক খোঁয়েয়া থেছেহান। ঔহানেই আমার ভাষাহানর বিষয়ে পয়লাকার সরকারী তদন্তর রিপোর্টহান। আসলে আমার সংস্থা জাগ্রত না থাইয়ার আরো এহান অরতা।

দেহিয়া আয়ার আদ্যন্ত আজি পেয়া এহানাত জাত বেজাতর আক্রমণে অত্যাচার বারো নিজর দান্তিক বারো অসতর্কিত পাদক্ষেপে বিষ্ণুপ্রিয়া মণিপুরী জাত এহান কিসাদে তপ্প তপ্প মামো জিয়ারগাতা আরাকও খালকরিক কথা হানতে হারপা হারপাও সরকারে জাত আহানর সাহিত্য অনুসন্ধানর বিষয়ে কোনো প্রকারর উৎসাহ না দেখুয়াছে। অবশ্যে আমিও উসাদে উৎসাহ যোগাড় করে নুয়ারেছি। স্বাধীনতার পিছ এহানাত হাবিব জাতও মুড়খুলি দিয়া লাগিয়া উন্নতির পথেদে চলেছি। বিষ্ণুপ্রিয়া মণিপুরী সমাজ এহানাতে এবুজ হৌতার হৌ - ইমে অবস্থা আহানাত আছি বরং অনুন্নতি। দারিদ্র্য শোষণে শাসনে চানাপপা মামো যেইতারাগা এ সুযোগে আকতায় বারো এতা মণিপুরী নাগয় বুলিয়া লৌদিয়া উৎকেয়া উচ্চ ন্যায়ালয় পেয়া ফৌঅছিগা।

আক্গদে বিষ্ণুপ্রিয়া এতারে মামু করিল অনবরত চেষ্টা বারো অন্যগদে এ বিষয়ে সরকারর উদ্বৈগপূর্ণ অবজ্ঞা। এতা এতাত বিষ্ণুপ্রিয়া সমাজ এহান টিকিয়া থা পারতাঙায় না একবিংশ শতাব্দীর সভ্যজগতর মোঙে মাময়া নিশ্চিহ্ন অ যিতাঙাইগাতা এ অবস্থাত মনে অর ক্রমে মামনিত পরেছি যদি না এ বিষ্ণুপ্রিয়া মণিপুরী এতারে কোনো রকমে স্ব পরিচালিত কাউন্সিল আগ হংকরে দিয়া অর্থ বারো প্রয়োজনীয় সামগ্রিক সুযোগ সুবিধা দিয়া তানুরে স্বীয় সমাজর সামগ্রিক উন্নতির ভারহান দিয়া দেনা নার। বিষ্ণুপ্রিয়া মণিপুরী যেগ য়েপেইতও থায়াও থাকা সাংবিধানিক ভাবে কাউন্সিল রাজ্য সরকারর মাধ্যমেহে অনা থকর। এসাদে ব্যবস্থা আহান নাইলে এ সমাজর মানু দেশর দৈনন্দিন উন্নয়ন ক্ষেত্রে হোমা নুয়ারিয়া উন্নয়নমূলক কামে অংশ গ্রহণ করে নুয়ারিয়া আধারে থায়া থায়া সর্বস্ব হারেয়া মামো যিতাইগা।

বিষ্ণুপ্রিয়া মণিপুরী সমাজে বিষ্ণুপ্রিয়া মণিপুরী কাউন্সিল আগ হংকরিয়া উগর মাধ্যমে জাতীয় ঐক্য বারো সংঘবদ্ধতা আনিয়া আমার জাতীয়তা আমার কৃষ্টিকলা আমার যেতা উতা রক্ষা করানিরকা ভারতীয় সংবিধানে দেছে আমার অধিকার উহানি কাড়লয়া আনিক বারো দেশর প্রতি আমার কর্তব্য পালন করিক। আহো হাবিবয়ে আকতা অয়া লৌদিয়া মাতিক।

হুনো দেশবাসী হাবিবয়ে

হুনো দুনিয়ায়

হুনো মাটীর মানু

হাগর গ্রহ তারকায় -

জিংতা অনির লালফাম্

কারে ডেরেইতাঙায়।

হুনো দেশবাসী হাবিবয়ে

হুনো দুনিয়ায়।

(গিরক এগরে 'পটল রাজকুমার' বুললে নাচিনেকুরা নেই। গিরক অতি দূরদর্শী সমাজ সেবারী আগ। গিরকর অতি দূরদর্শী সমাজ সেবারী আগ। গিরকর Life and health to you, Mother Tongue, Whither go they, মেইরিক কাব্যগ্রন্থ নিয়াম উচ্চ ধরণর সাক্ষী অয়া থাইতয়।)



NORTH EAST MOTORS PVT. LTD.



**A.T. ROAD, GUWAHATI,
Phone : 0361—25424, 2591709**

**FOR YOUR
MAHINDRA, LUCAS, ALLYWN NISSAN**

AUTHORISED DEALER :

- 1. Mahindra & Mahindra Ltd.**
- 2. Lucas Indian Service.**

SETHI AUTOMOBILE CO.


G. S. ROAD, DIMAPUR,

(Authorised Stockists)

MARUTI UDYOG LTD.

MUL - Dealer Code - 3280

Phone : 03862 - 232866



হিষ্ণাপীর যারী

(বিষ্ণুপ্রিয়া মণিপুরী লোককাহিনী)

— শ্যামানন্দ সিংহ

দেশ আহানাত রাজার পুতক আগে আছিলতা। আকদিনে তা দেশ ভ্রমণ করানির সালে ঘড়া আগেত চড়িয়া সালইলতা। যিতেগা যিতেগা নিঘোর বন আহানাত হমেইলগা। সেকাহানৌ অইল। এগোদে হেগোদে চার হানতে দেহের হিষ্ণাপী আগোয় তারে চেয়া আছে। রাজার পুতক এগোয় লগে লগে ঘড়াগোত লামিয়া ডিগলগো অয়া হমা দিল। তার ভক্তি এহান দেহিয়া হিষ্ণাপী উগোয় নুঙাপাঙ অইলী। ময়া আহান হমেয়া রাজার পুতক এগোরে কিন্তাও না করলো। আংকরিবী — বাবা, তিতে কিসাদেগোথাঙ ? কি কামে এগোদে আহেছতা ?

রাজার পুতক — হায়, ইমা, মিতে দেশ ভ্রমণে নিকলেছতানা। মিতে ওতাপারা দেশউহানাত যিতৌগাগো, হানতে সেকাহানৌ অইল। থানার পথ নাপেয়া হিষ্ণাপী ইমার ঘরে থানা মনেয়া আছতা।

হিষ্ণাপী — অ, হবাছেনাই। থাক থাক, মি কালি বিয়ানে মাতর দেশউহানার পথগো দেহা দিতৌ। হানতে, মাতর দেশউহানতে হিষ্ণাপী আগোয় খেয়া হারি হারখার নারখার করেছে। হদন রাজার জিলক আকগো থাছে। হানতে উপেইত গেলেগা।

রাজার পুতক — কিন্তাও নেই। যেহান অইলতা অইতই নাই।

রাজার পুতক এগো রামতি থাইল। তা নেছেগা অচা-আদাক উতা-তাও খেইলো। বারো হিষ্ণাপী উগোরেও দিয়া দিলো। এসাদে করে দিয়োগিগো পুঙেই অয়া রামতিহান কাটেইল। পিছেকার দিনে বিয়ানতো হিষ্ণাপী উগোয় পথগো দেহা দিল। ওরে ওরে, দেহরনাই,.....ও টেঙরা উগো লালই বেতাই দেখতেই লামউহান তি মাতর লামউহান (দ এরে দ (হিলছৌ আগো দিয়া দিয়া) এ জিনিষ এহান না মাঙকরিছ। জিনিষ এহান তেতাও থাইলে কোন বিপদে তোরে লাগাল নাপেইতই। যাগা হে।

রাজার পুতক এগোয় হিষ্ণাপী এগোরে হমা দিয়া সালইল। যিতেগা যিতেগা তার মাতের লামউহান পেইলগা। দেহেরথাঙ, হায়হান আছে, কোন মানুআগো নেই। খানি গিয়া রাজার ঘরগে পেইলগা। উঠানহানাত ঘড়াগো বাধিয়া ঘরে ভিতরে হমেইলগা। হমেয়া চার হানতে দেহের নিঙোলশৌ আগো মাটিহানাত ঘুমজিয়া আছে। মাতের — ‘অবায়, নিঙোলশৌ এগোতে মরেছেগো না ঘুমজাছেগো।’ চার হানতে দেহের নিঙাশা কারিবি। দেহের কানত ফাইজনদুগো শুড়ি আগোয় বারো আগা আগোয় সুপয়া আছে। রাজার পুতক এগোয় ফাইজন দিয়োগি ধরিয়া ওড়িগি আকগোদে বারো আগাগি আকগোদে করেদিলোতায় রাজার জিলক এগো ফুককৌ উঠলী। উঠিয়া দেহিরা মুনিসৌ আগো তার মুঙহানাত উবয়া আছে। আঙকারিবি — হে, তিতে কিসাদেগো, দৌগো না মানুগো। হিষ্ণাপীয়ে খেয়া লম করেছে দেশ এহানাত তিতে বারো কিসাদে জিঙতা অয়া আছতা ?

রাজার পুতক — মি রাজার পুতক। দুরেই দেশেও আহেছগো।

রাজার জিলক — হইমা, এপেইত হিষ্ণাপী আগো আছে। উগো মানু খানাত গেছেগা। বিয়ান পূবানার সমইত আহিতই। উবাকা তোরে পেইলেতে আর তোরে না বহতই।

রাজার পুতক — হানতে কিহান করানি ?

রাজার জিলক — কাম আহান কর। ঘড়াগো ওরে জাপাল উগোর তলে লুকেয়া তি ওরে দেহরনাই পহরী দুগো, উগির বাঙুরিবারার পহরী উগোত বুরদিয়া হুদা নাকগো নিকালেয়া থাকগা। উহান অইলে তি জিঙতা অইতেই। নাইলেতে ইমে হিষ্ণাপীগোর পেটে হমেইতেইগা।

রাজার পুতক — হবাছে, তিও কাম আহান কর। হিষ্ণাপী উগোরে তাত-বাত দিয়া, হারৌ করিয়া তেইর মরানির পথগো হারপাবেলা। মি যিঙগা। পরইগোত লুকেইঙগা।

রাজার জিলক — হবাছে।

বিয়ান-পূবানার সময়থ হিষ্ণাপী উগো অইলী। আরাতে মানুর গত আহান পেইরী। মাতিরী-ভ-মবরে, কিন্তায়া টেইপাঙ মানুর গত আহান পাউরি পারত।

রাজার জিলক — ইমা, মিয়ৌতে ডাঙর অয়া আহৌরি। মোরাঙতো মনুষ্যর গত আহেরতানা। হিষ্ণাপী — অ.....

রাজার জিলক এগোয় মেঠেল মেঠেল রাধিয়া হিষ্ণাপী উগোরে খৌকেইল। খৌকেয়াতে মাতিরী — ইমাতি এগো মরলে মি কিসাদে থাইতৌতা ?

হিষ্ণাপী — মোর মরানির পথউগো আকগোয় হারপাছিগো নাগই। ওরে দেহৌরিনাই পহরী দুগো, উগির বাতর বাবার পহরী উগোত দন্না থাম্পাল আগো আছে। ও থাম্বল উগোর ভিতরে পক আগো আছে, ও পক উগো মোর ঠইগো। উগো আনিয়া মারে পারলেহে মি মরতুনাই। উহান পারেকুরা আছিগো।

রাজার জিলক — উঃ, ইমা উহানতে কুংগোয় পারতইগো।

বারো সেক্কাহান আহিল। হিষ্ণাপী উগোয় রাজার জিলক উগোরে মাটিহানাত ঘুমজাদিয়া ফাইজন দিয়েগি আগা আগোয় গুড়ি আগোয় বুলাবুলি করিয়া তেইর মাহি উহান দিয়া গেলিগা।

খানি পিছে রাজার পুতক আয়া আগেকার ডেকি ফাইজন দিয়েগি গুড়িগি আকগোদে দিয়া সুপকরে দিলতাই রাজার জিলক উগো ফুককো উঠলী। উঠিয়াতে মাতিরী — পেইলু, পেইলু। হিষ্ণাপীগোরে মরানির পথগো পেইলু। ওরে তি বুরদিয়া আছিলে পহরীউগোর বাতরবারার পহরী উগোত দন্না থাম্পাল আগো আছে, উগোর ভিতরে তেইর ঠইগো আছে। উগো আনিয়া মারে পারলে হিষ্ণাপী উগো মরতই। হানতে, পহরী উগোততে ডাঙর ডাঙর বিষধর হরপ মাহি আছি। উতায় ইমে লমকরেবেলতাই।

রাজার পুতক — কিত্তাও নেই। এতা বুলিয়া সালো গেলগা। আগেকার হিষ্ণাপী উগোয় দেছিলী হিলছৌ উগো থতাহানাত বড়িয়া পহরীগোত লামিলগাথাঙ কুরাঙকার হরপ, কুরাঙকার কিতা। কিত্তায়ো ছকনি নুরারলা। রাজার পুতক উগোয় দলা থাম্পাল উগো ছিড়িয়া আনলোগা। আনিয়াতে রাজার জিলক উগোয় কিতায় চেইতারথাঙ দেখতার হতুমেও থাম্পালগোর ভিতরে পক আগো আছে। থাম্পালগোর ভিতরেও পকগো নিকালানিয়ে হৌগোদে হিষ্ণাপীগোয় হারপেইলো তেইর ঠইগো আহান অইল। লগে লগে হিষ্ণাপী উগোয় তেইর ভয়ঙ্কর রূপউহান ধরিয়া ধাবহানলো দিয়া আহিরী। কিন্তু হিষ্ণাপীউগো ঘরগোত ফৌয়নির আগেই পক উগো পাটাগোত পিছে বেললা, হিষ্ণাপীউগোও পথগোত ডমকো পড়িয়া মরিয়া থাইলী।

হিষ্ণাপী উগোর মরানিহান দেহিয়া রাজার পুতক এগোয় বারো রাজার জিলক এগোয় বাইসাঙউলা। রাজার পুতক এগোয় রাজার জিলক এগোরে ঘড়াগোত চরুরেয়া তার দেশে নিলগা। উপেইত রাজার জিলক এগোরে বিয়া করিয়া নুঙেই অয়া থাইলা।

— ০০০ —

কানুন ঘরে আছেছে

— শ্রী নরেন্দ্র চন্দ্র সিংহ,
সিঙ্গারী, শিলচর

বি, এ, ফাইনাল পরীক্ষা দিয়া কানুন ঘরে আছেছে। বাপক কামিনীর পরিবার চাকুরীর ফামে থাইতে বিদেশে জরম অছিল। দিল্লীত থায়া পরীক্ষা দিয়া আহিলতা। বাপক মিলিটারী চাকুরী করেছেগ প্রায় ত্রিশ বছর অইল। কানুন কলকাতাত জরম অছে বারো বনক খুলী এগ দিল্লীত। বদলা বদলীর চাকুরী। উহানে আমার মানুর থানা খানা উৎসব পূজা কিত্তাউ না দেহেছেগ। বৈশাখে নুরা বছরর বিষু ববাকে ঘরে বিষুর পিঠা খওয়েইরী, খুন্তুমর চাম্পুত, লামর দৌওরে ভোগ দেনা, বিষুর পাঁচদিন সেংকম পুলকরিয়া থির বানদারা খানা, গিল্লা খেলা, দশ পঁচিশ খেলা সিংনা এতা দেহিয়া কত আনন্দ ফুটি, হারৌর সীমা নেই। এতা আগে কোনদিন দেহেছেগ নাগই।

জেঠ মাহাত পুরা মুরালীর ক্ষেতি করতারা গাঙে গাঙে এলা দিয়া লপুকে ধান আলী রুয়া রুয়েইতারা এতা দেহিয়া কানুনরতা কতি হবা লাগের। বি, এ, ফাইনাল দিয়াও আছেছেগ। পাশ করলে চাকুরী বিছারতৌ বুলের। মাতের এ পেইর ছাত্র এতা ধন্য, এতা হারৌর উৎসব উপভোগ করে পারতারা। বাপকে ফোনে বাগেইল, কানুন বি, এ, পাশ করেছে। রিজালট আজি নুকুলেছে। চাকুরী বিছারেয়া পেইলে যেইতৌগা বুলের। তেব ঘরে থায়া করতৌ নাইলে বেবসা করতৌ বুলের।

আষাঢ়ে আকগদে হাইলর ক্ষেতির আলি বেলতারা। হাইলর ক্ষেতির বি-হজ্জকরতারা বারো কাং আহিল খেচুরীর পালি মালঠেপে মালঠেপে অইল। জয়দেব দিয়া খেচুরি খেইলা। কাং আচুলীয়া ফল কেহেম, খাটল, হেইনৌ, আপেল, আংগুর

কাতকরিয়া প্রসাদী করিয়া খেইতারা। জগবন্ধুরে কাণ্ডে কাকরিয়া পথেদে আছুলতারা ভক্ত বেয়াপা মুনী আকতা অয়া। জয় জগবন্ধু বুলিয়া কাণ্ডর দরিগাছ ধরিয়া আচুললে পূণ্য বুলতারা। পিছে মালঠেপে মালঠেপে খেচুরির পালি দিতারা চলন দিয়া ফালদিতারা জয়দেবর এলা দিতারা। কানুনও হমেয়া নাছের, খেচুরি খার কুমারার হৌ ভাজা মেঠেল মেঠেল খেয়া কতি হারৌ আনন্দ বুলের। নয় দিনকার দিন উহান ফিরাকাং, ওদিন খেচুরির পালি লয়র। এতা দেহিয়া তারতা হারৌর সীমা নেই। ববাকরে মাতের বুড়িমা ! গাণ্ডে থায়া চাকুরী করতৌ আর বাহিরে না যেইতৌগা বুলের। ববাক হারৌ অয়া হবাছে বুলল। সমাজর মানুরে দেহের, তিলয়া নিয়াম হবা লাগের বুলের।

হাওনে রাধা কৃষ্ণর জুলন বারো ঘোর ক্ষেতি বরন জুমমারিয়া দের, গোলার পানি আহের নৌল বুলতারা কতি হবা লাগের। ক্ষেতি করে ঘরে এতা হারৌ উৎসব আনন্দ, কাম ও চলের উৎসব ও অর বুলের। ভাদ্রত কৃষ্ণ জন্ম, রাধা জন্ম, উপবাস, নন্দ উৎসব করতারা। আশ্বিনে পিতৃপক্ষর পনর দিন পিতৃ তরপন, সিদ্ধা, দুর্গা পূজা, পাঁচ দিন গাণ্ডে সহরে পূজার ধুমধাম কতি হারৌ বুলের। লক্ষ্মীপূজা, কালীপূজা, দীপাঙ্কিত গোবর্দ্ধন পূজা, কার্তিকে নিয়ম সেবা মা আহান ভাগবত, মহাভারত, রামায়ণ ধর্মগ্রন্থ পাঠ, কাপকর পালি, গাণ্ডে গাণ্ডে মালঠেপে মালঠেপে অর। এতা দেহিয়া কতি হবা উন্নত মানর সেবা পূজার বুলিয়া নিংকরের। উতাতদিবস, দৌ-হমাদেনা, কতি নিমজ্ঞণ, বানদারা, মানু মরলে বারো দিন নিরামিষ শ্রাদ্ধ কীর্তন, লেরিক থিকরানি এতা কিতা। এসাদে অধিবাস কীর্তন, সংকীর্তন, সিংলুপ, রামায়ণ, নাটক, রাস পদাবলী কীর্তন, বাসক, কতি হবা কলা কৃষ্টি, এতা হুদা নিয়ম আমি পালন করিয়ারতা, কতিহান উন্নত মানর রীতি নীতি। হরি উত্থানে ফিরাল কুপানী। এতা কোন জাতোও নাকরতারা কতি হবা সভ্যর রীতি। আমি হিন্দু উন্নত বৈষ্ণব কৃষ্ণসেবা পূজা করিয়ার। আগনে ধান কাপানি মারা দেনা, ধান বারনে বরানি নুয়া ভাতর চালৌ, পৌষে সংক্রান্তি কত মিষ্টি নুয়া চৌলর নারৌ খুদর হৌ খার বারো হৌ ইরলপা, পালটই, চিঞ্চু, চাম্পুত, আম্বল, এতা এত স্বাস্থ্যকর হৌ কতি হারপেয়া জ্ঞানী অয়া নিকালাছি, মাছ নিরামিষ খেইতারা মাংস না খেইতারা কতি পবিত্র সভ্য। ক্ষেতি করিয়া ধান বারন বুজে পেইতারা, সেংকম ঘরে চিপতারা হৌপাত ঘরে ক্ষেতি করতারা কিত্তরউ অভাব নেই। ফুতিও নিজে বুন তারা কতি হবা অর্থনীতির চিন্তা বুলের তা তিলর উতারাং এতা যারী দিয়া। ফল্লুনে বিয়া, মহাপ্রভু জন্ম-জন্ম হংকরানি হলি রং খেলা এতার গজে খেলা ফুটবল ক্রিকেট, ডুডু, বলিবল, কাঞ্চের হাবিতা খেলতারা। গাণ্ডে নিয়াম বসতি অয়াও কতি শিক্ষা দীক্ষা নামডাক এলা খেলাত উন্নত আমার জাত এহান, এতার গজে মাংসেং হিনেয়া গৌরিয়া মত পূজা, দৌওর সেবা করতারা গাণ্ডে গাণ্ডে মন্দির আছে কতি হবাতা। লেরিকও চানা বুলের, কামও করে। নিক্কা মন্দিরে আরতি করতারা। দৌওর সেবা পূজা বামুন আমি। গাণ্ডে গাণ্ডে স্কুল কলেজ আছে, শিক্ষিত নিয়াম। হবা হবা চাকরী ও করতারা ভারতর হাবি ফামে। এতাত আমার মানু মণিপুর, আসাম, ত্রিপুরাত নিয়াম বারো বাংলা দেশেও নিয়াম। হাবিষপেই এসাদে উৎসব কিতা করতারা বারো দরবার, মাইর, চরকরানি খুনাখুনি নেই। কতি সং বিদ্বান গুণী মহৎ জ্ঞানী মানু আমার সমাজে জরম অসি বারো কতি হবা সমাজ ব্যবস্থা। তিলর মারপ এতারাং মাতের আমার ডেকি সুসভ্য উন্নত জাত নেই, কিয়া বুললে আমারতাই তলকাম এতা কিতা নাকরতারা, রাজবংশী রাজা পালয়া মণিপুরে রাজত্ব করেছি। পিছেদে মণিপুরেও আহেছিতা এতা যারী হুনিয়া মাতের আমার জাত এহান আর্য্য নিয়াম দুঃখী সমাজর নিয়াম পূজা মানতারা উহানল অন্য সমাজেও আমারতাই তঙা। স্বগোত্র বিয়া নার অন্য গোত্র বিয়া অর। আমার কৃষ্টি বারো সংস্কৃতির গজে লেরিক ইকরা থাইলে কতি হবা অইল অইছতা। উহানল আন্দোলন করলেও লেরিক ইকরানি লাগের। ভারতর উন্নত পত্রিকাত এতা প্রকাশ অনা থক্। উহান অইলে হাবিষয়ে কতি উন্নত জাতহান বুললাই বুলের। বিষ্ণুপ্রিয়া মণিপুরীর জয় জয়কার অইলইছ।

সাহিত্য বারো সমাজ

— সুশীল কুমার সিংহ

অনেক সাহিত্যিক আছি যেতায় খালকর তারা সাহিত্যরতা কোন পৃষ্ঠপোষকর প্রয়োজন নেই, নেই কোন দরকার অনুসন্ধিসু সমালোচকর। এসাদে সাহিত্যিক হারো বা কৃতজ্ঞ নাই তারা নিজর লেখাহান উল্টো চানা নামনেই তারা যেবাকা হুন তারা তানুর রচনা উতা অনিচ্ছাকৃত অর্থ বহন করেব বা অনুকরনে ইকরা বা অসম্পূর্ণ। অনিচ্ছাকৃত এসাদে সাহিত্যিকে যে কথা চুটি পাহুরিয়ানির প্রবণতা দেহেয়েই তারা উহান অইলতাই, তানুর লেখা, আকখুরুম প্রকাশ পানার পিছেদে তানুর সমপত্তি অয়া থারতা হুদা আইনর আহিত। ঔ লেখা উতার প্রকৃত মালিকানা বর্তারতা সমাজর সাধারণ পাঠকগুটিরমা যেতাই ঔ লেখাত আছে ভাব উহানরে আদরে সাগ্রহে গ্রহন করতাই নাইলে উরা বেলা দিতাই ট্রেস (Trash) নিংকরিয়া। এ প্রসঙ্গে ফরাসী দার্শনিক সমালোচক Jean Paul Sartre – 'What is literature?' (১৯৪৭) উহানর উল্লেখ করানি পারিয়ার যেপেইত Sartre গিরকে সাহিত্যিকর মননশিলতার লগে তার সমাজর উন্নয়নর মা আদর্শ সম্পর্কহান prescribe করানির চেপ্টাচির প্রচেষ্টা আহান নেছেগা, বারো চেষ্টা করেছে দেখ্যানির সাহিত্যিকর মানসিকতার লগে তার রচিত সাহিত্যর গুট সম্পর্ক আহান যে সাহিত্য মানুর স্বাধীনচেতা মনর রূপাংকণ আহান। একই সাদে কতগ মার্কিন সমালোচক যেমন আলফ্রেড কাজিন, লিয়নেল ট্রিলিঙ, কেনেথ বার্ক ১৯৩০র দশকে তানুর কর্মসূচীর রাগগ অকরেছিলাতাই পলিটিকেল রেডিকেল হিসাবে এবং ক্রমে অউ যুগর সামাজিক দ্বন্দ বারো 'ভ্রম সেচানিত সাহিত্যর দায়িত্বর সম্বন্ধে তানুর ব্যাকুলতারে আরতাউ চহা করেদিলা। ট্রিলিঙর প্রভাবশালী 'Liberal Imagination' (১৯৫০) 'মুক্ত কল্পনা' গ্রন্থ উহান সাহিত্যিক প্রবন্ধর সংকলন বারো রাজনীতি বারো আর্টর মা সমঝোতার প্রচেষ্টা আহান।

এসাদে সমঝোতা অবশ্য সমস্যা সংকুল যদিশয় ট্রিলিঙর ডেকি খালকরিয়ার সাহিত্যরতা আছে তার পূর্ণ স্বাতন্ত্র্য, সেইতার প্রতি আনুগত্য কোন রাজনৈতিক বা যে কোন মতবাদ বা ফরমুলার প্রতি সাহিত্যর আনুগত্যরাতও গভীরতর। তবে মার্কসবাদী দেশে সাহিত্যরে সাধারণত সমাজ গঠনর উপায় আহান বুলিয়া নিংকর তারা 'Literature as means to social ends' 'Dialectical Materialism' অরতা অর্থাৎ দ্বন্দ্বমূলক জড়বাদরতা সাহিত্যর গজে বাধানিষেধ আছে — তা সাহিত্যরে কারণ (cause) হিসাবে গণ্য করে নুয়ারতই সাহিত্য মেহেনতী জনশ্রেণীর প্রয়োজনর খোরাক হিসাবে সম্মানর অধিকারী — অবশ্য ও প্রয়োজন উতার নমুনা পাটীর interpretation অনুযায়ী অনা থকয়তয়।

তবে যে সমালোচকে সাহিত্যরে সমাজর পূর্বনির্দিষ্ট প্রয়োজনর খোরাক হিসাবে বহাল দেহানি মনেই তারা তানুরতা প্লেটেই তাঁর রিপাবলিকে যে বিপরীত যুক্তি তর্কর উপস্থাপনা করেছে উতার মুণ্ডামুণ্ডি অনা লাগতৈ — কবি এগ মানুগ হিসাবে এবং কবিতা এতা ফর্ম (Form) হিসাবে দ্বিগুণ প্রোচোরাং বিশ্বাসযোগ্য নাগই বুলিয়া মনে অর। অলৌকিক পার্থিব জগত এহানরে প্লেটেই রূপায়িত করেবতাই অতি মহতী ভাবধারার (Transcendent ideas) অনুলিপি আহান বুলিয়া বারো কবিতারে নিংকরেবতাই এ অনুলিপির আরাক অনুলিপি আহান বুলিয়া। উহানল এ কবিতা বা সাহিত্যরাত সত্যর সন্ধান পানা সম্ভব নাইতয়, ভুলপথে ইজজু চালিত অনাই সম্ভব। প্লেটো অবশ্য যাকরেছিল কবি এগ ঐশ্বরিক অনুপ্রাণ লাভে সক্ষম, তবে কবিয়ে এ ঐশ্বরিক অনুপ্রাণ ও অভয় দিয়া নুওয়ারের, কিয়াকা বলে, ঐশ্বরিক অনুপ্রাণ জাতীয় উন্মাদনা আক্রান্ত কবি এ যুক্তিভিত্তিক কোন রাজনীতিবাদরে প্রাপ্য মূল্য নাদতে পারে। উহানল কবি-সাহিত্যিক এতারে তার Hypothetical Republic এন্ত দেশান্তরর শাস্তিমূলক বিধান দেছে।

এগদে বারো Aristotle এ তাঁর পয়েটিকসে (Poetics) প্লেটোর এসাদে শাস্তিমূলক বিধানর বিরুদ্ধে কাব্য সাহিত্যর প্রয়োজনীয়তার বারো স্বাভাবিকতার গজে জোর দেছে।

বিয়োগাত্মক নাটক দর্শকমনে বানানুশি, ভয়ভীতি ইত্যাদি নানান প্রবৃত্তিজ ভাবর উদ্বেক করেব, কিন্তু লগে লগে ঔভার (Emotion) উতা সংস্কৃত অয়া নানর। সাহিত্যই মনুষ্যপ্রবৃত্তিরে সন্তোষজনকভাবে চামকরানি পারের, বারো লগে লগে

অনুশাসনও করের— Aristotle এ সাহিত্যে এসাদে রূপআহান দেখিল।

কোন লেখা সাহিত্যের মর্যাদা পানা থক কোনহান নাপানা থক ঔকৌলিত হমানি না মনেইলেও হেইরাপ শকয়া যিকগা। আর্ট হিসাবে সাহিত্য অইলতাই শব্দর সুসংবদ্ধ সংযোজনা; যাতে এ যোজনা মানুর মনে আনন্দ পরিবেশন করে পারের, এ শব্দ যোজনার মাধ্যমে মানুর অভিজ্ঞতার মানরে গজেদে কাকরের বারো পরিবর্তন করের। তানুর মাধ্যমে সাহিত্যই সমাজব্যবস্থাত কাম করে যিতইগা ভ্যালুর অবিরত সিম্বলিক (symbolic) সমালোচনা হিসাবে। সাহিত্য মানুর এক্সপ্রেসনের ফরম (form) আহান। কিন্তু যেতাও শব্দে প্রকাশ পেইলেই সাহিত্যের কুলে না কার এমনকি সুসংবদ্ধভাবে লিখিত অইলেও। এপেইত Lord Chesterfield অর পুতকরাং ইকরা চিঠি আহানর লাইন আহানর উল্লেখ খানি অপ্রাসঙ্গিক অইলেরগায়ো করলু "words are the dress of thoughts; which should no more be presented in rags, tatters and dirt, than your person should" অর্থাৎ সুসংবদ্ধ শব্দ অইলতাই চিন্তার মার্জিত ফিজের বা পোষাক, উহানল শব্দরে হাজানি থক নেই ফারাচিলা তেনার ছাদে, উতারে হাজানি উচিত হোভা নিঙলপি আগর কঙালা দেহগর আভরণর ডেকি।"

কোন সাহিত্যের মান যাচাই করতগা অবশ্যই চানা লাগের তার content অর্থাৎ বিষয়বস্তু ফরম বারো স্টাইল। ফরম বারো স্টাইল সাহিত্যিকর নিজর বিষয়হান কিন্তু বিষয়বস্তুরকা তারতা সামাজিক কালচার অর্থাৎ কৃষ্টি সংস্কৃতির গজে নির্ভর করানি ছাড়া গতান্তর নেই। উহানল সাহিত্যিকরতা সমাজরাং দায়িত্ব আহান আছে বুজ্লে নিয়াম লালয়তাঙইতা? যদিও মতিয়ার (form) ফরম সাহিত্যিকর নিজর বিষয়হান, তবুও বা ফরম বারো content র পারস্পরিক সম্পর্কর ব্যাপারে সাহিত্যের ইতিবৃত্ত পাকরলে পেয়ার যে অনেক সমালোচকই form বারো content র মা কোন পার্থক্য দেহানি এহান কৃষ্টিমহান বুলিয়া খালকরতারা; form এ নিরূপন করের কিসাদে content হান অনা, content এ কিসাদে form অনা। এ পার্থক্যর ইস্যু এহানরগায়ই তুলতারাতা হুদা উতায় যেতায় সাহিত্যরাংতও নিয়াম আকর্ষিত অইতারা রাজনীতি, ধর্ম বা আদর্শবাদে। তানুরতা আপত্তি আছে ঔ সাহিত্যে, যে সাহিত্যই আদর্শরে জলাঞ্জলী দিতারা form র perfection অর খাতিরে, বারো message বা অর্থবহ বার্তারে জলাঞ্জলী দিতারা style র খাতিরে। কিন্তু style অর অস্তিত্ব চেহানাত নাগয় উহান অইলতায় সাহিত্যিকগয় তার মননশীলতারে প্রকাশ করতে গিয়া কিছাদে ভাষারে নিজর ভঙ্গিমায় বাঁধিয়া থর উহান।

— ০০০ —

শ্মশান

— লেং - দৃষ্টিকোণ

কোংগয় মালততা শ্মশান
হাবি শূন্যতার হম ফাম ?
জীবনর হাবি ওয়াই হীন
কঙ্করানীর একমাত্র থান—
এ শ্মশান।

প্রেম-প্রীতি বানা নুংশি তার
ওউ শান্তিময় ফামহানর
মা, ওর অবসান। ঔ হল
চাতুরী হিংসা নিন্দার মূল,
প্রকৃতির লীলা খেলা হাবির
লুপ্ত থান। জাতি না বিজাতীর
কোন প্রশ্ন না উঠের এপেই।

ঔগ কোংগ ? হোবা বা হোবা নেই

আংকরানির সময় নেই।

হারা দিনর থেতপা গারী

চিকিয়া করতারা উঠা উঠি ;

মাং না সেং কোংগ মাতের !

জীবাত্মার এ মহামিলনর

পবিত্রময় পূণ্যময় এ থান —

এ শ্মশান ।

প্রকৃতির নুংশিপা সাজেল

আর জোনাক তেরার মিঙাল,

এপেইত নাহেসে কোন দিন ।

নাহেছি ভ্রমরার পালহান

ব্যর্থ প্রেমর ছন্দল বুজিয়া;

কোকিলর কুহ আর পাপিয়া

না বহিতারা হারোয়ে নাহিয়া ।

নুংশিপা বৌহানৌ চেয়া চেয়া

যারগা আলয়া, ঔ বারে বারে

দরা দরা হিল পারা দেওয়ালে

বারি খেয়া খেয়া । হোমানি নেই

কোনগো, কোনগোর থান নেই,

জগতর আরোপা এ থান —

এ শ্মশান ।

রূপ রস গত, অনুভবে তা

নাবহেছে মিকুপ হানরকা ।

স্বত্ব রজ তম গুণর গজে

আরাকো গজে এ রম্য থান —

এ শ্মশান ।

লোভ লালসা হারা এ নিষ্কাম

সৃষ্টির অনন্ত রূপর মাজে,

অপরূপ অপরূপ সাজেলে

হাজেছে এ জগতর আঁদারে

শান্তির চীর শান্তিময় থান —

এ শ্মশান ।

— ০০০ —

দশমিক ভগ্নাংশ

— স্মৃতি কুমার সিংহ

বিয়ান পরহান। খুরাহান সেচেয়া নদীয়ার মাংকলে তেরচা অয়া পড়েছে রইদহানাত কুলঠুক কুলঠুক কাহে কাহে কলঠাগ অয়া বছে নদীয়ার আশি বছরর বাপক তমাল সিঙ। কাহানিহানে ডিল-ডিলা আহিতম বুদ্ধো নিকুলেছে। বাউ মাছর সাদানে নিংশাহান। কুমলেইনা কাছরা এহানে নংশাঙ অইল তারে চানাপ্লা ফামে বেলাছে। আটাফিরাতে নেইতার নেই ঠিকদিয়া মেস্তমকা বনার মুকদুরও নেই। রইদহান পড়লে জিপুত, নাতিনাতে ধানপেলীর সাদানে ধরিয়া দুরাত নিকাল দিতারা, বেলী হমানির পরে বারো ঘরে ভিতরে বরেইতারা। বুকগ বুজে জুলা, যন্ত্রণা, যারী, মুরগ বুজে অউলি জউলি চিত্তা।

হৌগদে বুলতে পরাণ মাষ্টারর মাংকলে বেলীহানাদে পিঠিবুলন দিয়া অংকলো মেইখু অছি পাঠশালার শৌ কতগ। পরাণ তমালর খুলা পুতক। পুতক অইলেতে কিতা অইব, বুড়া অনির পিছে তা পুতকরে ডরপার না ডরেয়াতে। ফিবামহানে, খস্তাহানে — মাষ্টারগ নয়া মঠর হিনচাপাগ বুললেহে চুনা অইব। কানাহার আড়গিয়ে ডাঙরতাই হদাই দাত কামারেয়া থার পারা। জেঠা পুতক নদীয়াতে বৈষ্টবগ। লেইরাহানে খম থেঙইলেও জীবন ফুর্তি জনগ। আলেউ আইতেও অটগিত মনশিক্ষা, মেইথঙে মুকসিহান নাপয়া থার। জিপুত বুলতে এ দুগুলি। পানথে খানি নৌরাক অনাই থাংনা থাংনি এ দ্বিযো বেইবুনিরে ডাঙর করতে মালকতে মালক, বাপক তমালরতাও গারিগ খুতপ কতোহান পড়িলগা। কনাকে চান্না অছিলাতাতে উপায় নেই। এবাকাতে তঙাল তঙাল জিনা। নদীয়া ঘরগ খুলা বেয়করাং এরদিয়া উঠানর আগাত টেপশৌ আহানাত মৌয়েই জিপুতরেলো অঙইল। বি মিরাস খেইপক খেইপক। বাপক জেঠাগর বাটে, মালক খুলা উগর।

“আঠারোরে তিনলো ভাগ কর।” দ্বিতীয় শ্রেণীর শৌগিরে অংকহান দিয়া নাকর ছিদ্রগিদে পিরকাই খৌ আছুলিয়া, খইতঙগত ফুটি আহান তাক্করে তাক্করে পরাণ মাষ্টারে কাদাত ধারাপাতহান সালকরিয়া এলোনুরারিয়া বছে জিলক শৌগর বেদে চেইল। বাপকর মিল্লঙেহান পড়নির লগে লগে নারগর আরাক থাক আহান কাকরিয়া তালে তালে, লরে লরে পাকরানি অকরল, “... তিনদশ দুই বত্রিশ, তিনদশ তিন তেত্রিশ, তিনদশ চাইর চৌত্রিশ...” মালকে বেরাগাঠি দিয়া উরাদেছে আচালাহান হচরত অয়া লরণহান নেহে গারগন্ত সেচের থাঙও লেম্পালহানাত জাতেয়া কৌশালি করাত লাগেছে। মনহান পুন্নাপে আচালাহানাত থাইলেও বাপকর ডরে ছাৎ অভ্যাসমত আর্যাহান একেবারে শুদ্ধ অয়া নিকুলতে আছে। বাকী শৌতা সিলেটহানিত উবুরি অছি। পরাণে তার উদালা পিঠিহানাত খৌরে চেপচেপা আতর তারাহানলো ‘চের্‌কো’ থাপন দিল। শৌগি কার ভাগ্যত পড়িলতা বুলিয়া ডরা ডরা রেঙকো আগরে আগই চেইলা। তার জিলকশৌগ উঙখাত অয়া ‘তিনদশ নয় উনত্রিশ’ বুলিয়াও জুহান কেট্‌কো কামারেয়া মুব নঙেয়া বাছেয়া থাইলী।

তমাল সিঙও উঙখাত অয়া মুঙর ঘরর মাংকলেস্ত নাতিনকরে ডরা ডরা চেইল। পরাণ অজারেও আকফির। নিক্কা মাংকলে বয়া শৌতার লেরিক তামকরানি হনতে হনতে নিঃসঙ্গ তমালর মনহানও শৌতার তুলো মান্না অ পরেছেগা। তাও অংকলো মেইখু অর। পরাণ তারতাও অজগা অ পড়েবগা। পরাণে তাপ্ন জিলকর গারগন্ত আচালার গাঠিগ ফুকোয়া বারো জুংকরে বাধে দিল। তমালও নিংশাহান বেলল। পরাণে শৌতারে আংকল, ‘ভাগফল কতি?’

‘ছয়।’ শৌতাই চিকারি দিলা। তমালে এ মাংকলেস্ত নির্ভয়ে মনে মনে লৌদিল, ‘শূণ্য।’ ‘ছয়। বেশ।’ পরাণে উরতগ খৌলো থাপন দিল।

তমাল বিল বিল করে পরাণরে চেয়া বাছেয়া থাইল। তার পিঠিহান আপ্পানে হিরহিরেইল। তারতা যে ভাগহানরতাও

ভাগফল শূন্য অরতা কিয়াথাঙ ? শালকরাত লাগিল। মাতাশালা মিকুপ ঔহানাত পানথৈ পরাগর ঘরেন্ত নিকুললী। তেইর কাপক পারা চুল সেটুকাপা, কানহানাত ধলা তেরা ফুলগি য়ালছে। তমালর ভাবনার নানগাছ ছিড়িল। শৌর হাদিস্ত আকফালে ফামে আহিল। মুরগ ঝাকারেয়া কৌলিরকা হিঙ ধারেয়া থাইল। পানথৈ হৈ হৈ করে হেঙ্ক তার মুঙহান পানা ফাৎনেই তমালে ঠিচালাই অকরল,

- ‘উম্, কামিলীগ ডেকি মালয়া ডেপ ডেপ করিয়া আটরী।’
- ‘হেই, হেই, থতাহান সামালেইছ। নাহাল — কুলঠুক — কুলঠুক।’
- ‘লৌদে, লৌদে। কাহুরাহানলো বিয়ানকার পাথাপহান অকর।’
- ‘অঃ, লাকচা এহানতে। দেখতে — কুলঠুক — আকবারিত —’
- ‘দিতইহে পাউরি। বাই ছনরগতে, আংকুরি কারের ঔগই।’

‘আইস, মিথ্যায়া কিতা করতু ?’

‘কিতাতে করতে। দ, তালমিছিরি চুরা। তোর পুতকে আনে দেছেতা।’ মাংকলে লেরিক চেইতারা শৌতা হাবিবতা পাছরিয়া চিয়া করে আহিলা। নাউ গনিয়া তাল মিছিরির মচা উহান তমালর কাদাত থ দিয়া, মুকসিহানলো পানথৈ পহরীগদে গেলীগা দ্বিকুড়ি দশ বছর হেইমাক অয়া পালয়া তেই হারপাছে — ইমে হুংকারগনা। তেইর গারিগত কুনোদিন খেড়গাছলও সকনি নেই। হাবিব ও হারপাছি, এতা এ হেইমাকর মারাক নেই কৌলি। লৌদালৌদি ছনিয়া আহিতারা শৌতারে পরাণে হুংকার আগ দিল। ঔতারে ছুটি দিয়া বাপকরে দিশা করিয়া কাকেই কারল পরাণ। ভাগ অংকর বাঘগর ছেয়াগ পড়ানিয়ে তমাল হামুকগর সাদানে চানাপ্পা মেইমুত অইল। তারে বিল বিল চেইল। পরাণে সাদানে বাপকরে ফেঙ্ককরে উরে লয়া উঠানে লামিল। উহান দেহিয়া পানথৈ পরহীপারেত্ত আলথক আয়া মাংকলেত্ত তমালর ফামহান তুলিয়া উঠানে হাবিস্ত রইদ পড়েছে কোণে পারে দিল। তমাল পুতকর উরহানাত থায়া তার মেইথঙহানাদে চেয়া হপারা থতাহান আংকরিয়া কানহান যৌকরে আহানি লাগিল। পানথৈয়ে রু পো কবিরাজে ছাগির ঘি বারো বছর মারায় তিলকরিয়া দেছে মালিশ অউতা তমালর পিঠির গুজগত তাক্করে তাক্করে মালিশ করে দেনা অকরল। মিকুপ আহান আগেকার গড়েইপা কৌলির চিনত এ বুড়াবুড়ীর মেইথঙে মিংটা আহানও নেই। এজাত কৌলিই তানুর অড্ডুত প্রেম। লেঙউর তলে ফল্গু। আগই আগর লগে মিলনর হেইচা লাংকরানির বিশেষ রূপ আহান। মিরাসমাটি, কলখেরির লগে ভাগবাটুরা অছি এ ইমাবাবা জিপুতর খেই খেই জিনার চেইখালগ লালয়া তিলনির নিয়াম চিলপেইতারা। কিয়া বুঙ্গে, লৌকিক লাজ, লেইরা বরার ফারাক, বৌরের সন্দে, অশান্তি হাবিয়ে তিলয়া চেইগালগর পাথারিহান নিয়াম। বিয়ানে মাদানে তমালর হজক যুগত করে দিতে মালিশ করে দিতে মেত্তমকা কাদাকাদি অইতারা উপেইত হিন দুখ হাবিব ককর। এ মিকুপ এহানির সালেদে নিঃসঙ্গ তমাল আ করে বাছেয়া থার। বাছেয়া থার তেইর বানালো যমকরা খুন্তল, আতর মাঠিয়া পানার খৌরাঙলো। তেই কাদাত বয়া মঠিয়া দিলে তার কাহুরাহানও থিতর পারা। যারি দিল মানু আগও কাদাত পার। তালমিছিরির টুমাহান গালগছে ঠেলা দিয়া তমালে গজেদে মেইথঙ তুলিয়া মাতানি অকরল, ‘হারপেইলু, জীবন এহান অংকহান এনা। যোগ মানে জরম, বিয়োগ মানে মরণ। মালিশর গতহান পাছরিয়া তার পিঠিহান আদে আদে একীন অয়া ছনিরী পানথৈ। আহিথমে মেত্তমকারকা বাহিল কার্তিকর পালিত লেউ ফুলর ফিতুপ আহান গারগত বেলেয়া অর্থ দিল তমালর মুতী ঔগ। তমালে যারি দেনা না জিরার। ইদুমদুরা মালঠেপ মেইয়েলর দ্বিয়োফালুর হাদিত, গিল্লাহানর সাদানে তালমিছিরির টুমাহান তমালর এ গালেত্ত হৌগালে নিশ্চিন্তে পাঙচেল গাদানি অকরল।

বেলীটিকে নদীয়া গাটর পারর মিয়ার ক্ষেতির বারিহানাত আলথক অয়া অয়া বাপকরে হিনা দিয়া আকসাটে ভাতপানি খেয়া

জিরেইলা। তমাল ঘরর এ বাজুত, সন্দুকগর গজে বজ্রাসনে আতহানিলো মুণ্ডে ঠিকাদিয়া বনার হন্না করের। নদীয়া হৌবাজুত তার ফামহানাত বয়া হ'জকারি আসুলে আসুলে জিরাছে। মনশিক্ষার খল্লিক আগ গুণাগুণার। কদাল মারতে মারতে তার আতর সিংলেই টিঙ টিঙ করে নিকুলেছে। কাঞ্চনপুরী নারিকেলর আরিগ মাঠিয়া মাঠিয়া তা ফুডুক কুডুক করে আসুলের ঔহান তেরাদে চেইতে চেইতে আর জারে নুরারিয়া তমাল সিঙে পুতকরে ডাকল, 'নদীয়া, বাবা হিনপেইলেও পিঠি এহান খানি ধরে দিয়াতা। আজিতে খানি ইহৌ আগ অকরেছেতা। নদীয়া এলাহান খামকরিয়া বাপকরে চেয়া মুকসি দিল। তা আরিগলো বাপকর সন্দুকগর গজে বহিলগা। বাপকর পিঠিহানাত আত আহানলো ধরিয়া আরাক আকআতে হ'জকারি ছাড়া চলে নুরারলগ। এবাকাতে কাছরাহানর সালে সুপ সকনি নাদতারা। গতহান পেইলেও মন এহান চামর পারা। নদীয়াই বাপকর মনহান বপিয়া তাল্প মাতল, 'বাবা, আকচুম দিতে? 'হে—' পিঠিবুলন দিয়া তমাল সিঙে থতাহান হাবি এরেদিয়া গলিয়া আহানি আহান দিল। 'কিত্তাও নেই, আকচুমেতে কিতা অইতইথাঙ।'

'দিতু?'

নদীয়াই কিত্তাও নামাতিয়া বাপকরাং হ'জকারি সিলকরল। তমালে আরিগ আতর তারাহানলো পুছিয়া যৌকরে আকচুম দিঙ বুলিয়া থতাহানাত লাগেইতেই দুবারহানাত পানথৈরে দেহিয়া খামইল, 'অহ, ফৌঅইলীহা।'

'পি, পি, কিয়া খামইলেতা। ধানর কলহান অকরবেতা, পি।'

তেইর আতহানাত গাছ গাছরার পাতা, তমালর হজকর অনুপান।

'হেরা, ধুমা নিকালাদিঙ বুলিয়া—'

'ধুমাতে কিয়া, মোরে নিকালা দিয়া বাপক পুতক রাইশাঙয়া পিয়োনে।' জেঠি বহক ঔগই চাকামর কুঠাগত গাহালি শৌ আগত পাতা উতা দুহিয়া খেরি আগত রস নিকালেয়া দিল। পানথৈ নৌরাগত হজক অনুপানলো তাক্করে বক বক করানি অকরল, 'রকত বঙিয়া খাঙকরতেও হজকারির লোভ এহান বেলা নুরারলে। হাবিতা বেলা, কৃষ্ণখয়া নিংকর।'

'অইলগা এর, গিখানক।' আর কথা না বাড়েয়া তমালে তাল্প পুতকরাং হ'জকারী সিলকরল। নদীয়াও লাজপেয়া তার ফামে গেলগা। তমাল হজক ঠাকহান খেয়া সুপ না টটরেয়া ঘুম আহান ঠৈমকরল।

সেক্কার পরে তমালর কাছরাহান ইহৌ ইহৌ করে জবর অনা অকরল। হাদি এহান নিক্কা বেলী হমানির পিছে বারিদেবরতা কিয়াকা বুলিয়া খালকরে নদীয়া মালকরে ডাহিয়া বাপকর কাদাত বহুরেয়া রূপো কবিরাজরে ডাহাত গেলগা। পানথৈ হুমানির লগে লগে অইলী। জেঠি বহক ঔগই কিতাই পিঠিহানাত মালিশ করে করে নুরাাগর সেবা করানি অকরল। পরাণ মাষ্টারর ঘরে ভিতরে শৌতা থঙমেইহান দিয়া বারো অংকলো মেইখু অছি। জিলকশৌগর নারগ আহিল, 'আটদশ এক একাশি, আটদশ দুউ বিরশি.....।'

পরানে শৌতারে পড়া দিয়া হাদি হাদিত বাপকরে তালাবি আহান করিয়া যারগা। শৌতার পরীক্ষাই বিত্তা অইলতাই বাপকর নাতা এহানে তার মনহানও কালিরা অছে। কাহানির চুটে তমাল হুঁঅছে কুকুরগর সাদানে ফ ফ করের। আহিথম মানা রকত। শৌতার লেরিক পাকরানির নার তার কানহানাতও ফৌঅরগা। মেত্তমকা ঔ চিন্তাত বিভোর অর বারো হিনহানে কেকার। হাদি হাদিত মারাম অর ঔপেইত দ্বিআকচুটি আবিজাবি কথা পানথৈরে মাতের, বিবিয়ানিহান পারা করে—

'পুরণ এহান আশা, লোভ, হারৌ। ভাগ এহান দু:খ, জ্বালা, হিন। দাদার জিপুত ঔতা আগ নাইলা। পৌ নাপাছিতা? জাঙাক ঔগও—

'অইলগা নিয়াম না টটরেই।'

‘তালমিছরি ঔতা আছেতা ? না, অবশিষ্ট শূন্য।’

‘একরে দুইলো ভাগ কর।’ পরাণর নারগ। তমাল বিভূলা অইল। ‘ভাগফল কতি ?’ শৌতাই লৌদিল। ‘শূন্য।’ তমালর ডিলডিলাছে আহিগি চিক চিক করল। তা হারৌ অয়া পানথৈরে মাতল দেখলে ?

‘অবশিষ্টতে ?’

‘এক।’

‘চুমইল।’ তমাল নিংশাহান বেলল। ‘তালমিছরি কইতে ?’

‘অর্থাৎ, একরে দুইলো ভাগ করানি নাকরের।’

‘নাকরের, নাকরের। কোনদিনও নাকরের।’ তমাল হারৌ অয়া মাতল, ‘ছনলাইতা, নাকরের। নিয়মে নেই। তেশ্’
‘কিয়া বুঙ্গে, দুই এগ একেস্ত ডাঙর সংখ্যাগ আরো, নাগইতা পরাণর নারগ।

না, নইল। কত্তি হারপাছেতা। একেস্ত ডাঙর সংখ্যা আছেতা ?

ঈশ্বর এক, আত্মা এক — তমালে বিবিয়ানি অকরল —

‘নৈনং ছিন্দস্তি শস্ত্রাণি, নৈনং দহতি পাবকঃ।

ন চৈনং ক্রেদয়ন্ত্যাপো, ন শোষয়তি মারুত ॥

‘অইলগা এর। তুমিল অ —’ পানথৈয়ে খামকরল।

‘ন জায়তে শ্রিয়তে বা কদাচিচ্চায়ং ভূত্বা ভবিতা বা ন ভূয়।

অজো নিত্যঃ শাস্ত্রতোহয়ং পুরাণোন হন্যতে হন্যমানে শরীরে ॥’

পরাণে হৌগদে লৌদিল,

‘ছনো। এখুরুমতে নুবা অধ্যায়হান। এহানাত হিকতাঙাইতা আধুনিক রীতি আহান, দশমিক ভগ্নাংশ। ছনতাইতা ?’

‘হায় অজা।’

তমালও ইম্পানি অয়া কানহানি হিঙারল। পুরানর নারগ গম্ গম্ করের, ‘এ রীতিত ছরকাং ডাঙর বৌনেই যে সংখ্যালোও আরাক সংখ্যা আগরে ভাগ করানি য়াকরের। হারপেইলাই।

‘না —’ তমাল কাছিহানে আরাকৌ ফ-ফআনি অকরল। কাহানিহান জবর অইল। কাহিতে কাহিতে কলঠাগ অইল। মুরর রকত হাবি আহিগিত পুলইলহা।

পানথৈয়ে বহকে আকসাটে চিকারি দিলা, হেই, কিতা অইলএ, কিতা অইল। পরাণ —

পরাণ লৌগ ছনিয়া আকফালে বাপকর কাদাত হাজির অইলহা। লেরিক চেইতারা শৌতাও হাবিতা উরা বেলেয়া এ ঘরর দুরারহানাত পুলইলাহা।

(চিন্তাস্ত লেখকর য্যাথাংলো শাংকরানি অইল।)

ছনার মণিপুর চেইকগা

— সেনারূপ সিংহ

যেপেইর চিক বৌ চিকদের মনঠে
পানীয়ে চিকর মোর
হাবি দাহ।
থৈবিয়ৈ খাম্বায় মাহাদেব দুর্গায়
লীলা করলা যেপেই
আহ আহ।
বলী খুমেল মৈরাং লগে আঙম নোয়াং
কৈরেং খুলাকপা
হাবি দাহ।
ধন্য মণিপুর হে পুণ্য মণিপুর হে
মণিপুৰে যেইকগা
আহ আহ।
মণিপুর লকতাক খেতৌ মাঞ্চাক
চউগোতে থাক থাক
অবিরাম।
হাত মারল টেঙারা চারিদিক কৈকরা
মোর মণিপুর ছনা
ইমফাম।
পুণ্য নিংখৌখঙে পানী দিয়া খৌরাঙে
কক্করের মনর
যত দাহ।
সতী তারালৈইমার স্মৃতি খৌনাংঝার
দরশন পেইকগা
আহ আহ।
চিক পানী ঢল ঢল ফসলউ গল গল
মিঙালউ ঝলমল
ছনালাম।
য়মদেছে আসাংপা জোনাক বেলী তেরা
ঙালকরতার লাম
অবিরাম।
আর্য লীলার ফাম বিষ্ণুর শ্রীধাম
দেহিয়া চিকইকগা
হাবি দাহ।
পুণ্য বিষ্ণুপুৰে ধন্য বিষ্ণুপুৰে
বিষ্ণুপ্রিয়া লামে
আহ আহ।

(কবি গিরকর আনৌপী (পয়লা পরল) কাব্যগ্রন্থত এ কবিতাহান সৎকরে প্রকাশ করানি অইল। কবি সেনারূপ সিংহ বিষ্ণুপ্রিয়া মণিপুরী সাহিত্য জগতর অন্যতম উজ্জ্বল তেরাগ আছিলগ। বিক্রমপুর লয়াত গিরকে মাষ্টারী করেছিলগ।)

— ০০০ —

তপস্যালো পুণ্য পানা ভোগলো পুণ্য মাণ্ডকরানি

(তপসা পুণ্যার্জনম ভোগেন পুণ্যক্ষয়ঃ)

— অধ্যাপক বীরেন্দ্র সিংহ

মনভাব বারো বিবেকলো উপসে মানব জন্ম এহান হবাকরে চালেয়া নেনা বারো পালকরানির দায়িত্বহানও নিজরাং থা-গেছেগা। হবা ছাকতি বিবেচনা লেপকরে পারানি; নিজে অসমর্থ অইলে সাধুসঙ্গলো বা বেত্তা গিরিগিথানির সাহচর্যলো লেপকরানি। চরকরানি মদপিনা কিতা এতা ছাকতিতা, কিন্তু চরগোর মদুরার বিবেচনাও ঔতা ছাকতি বুলিল জ্ঞান হান বা বিবেচনাহান লেপ্ নার। তাথকয়া মি মোর প্রবৃত্তিলো হবাহান্ ভাবুরি ঔহান্ হবা নাও অইতে পারে। আরো হবা ছাকতির লেপকরা বিচার হান্তে জনসাধারণর স্বীকৃতি অস্বীকৃতির গজে থা-গেলগা যুগে যুগে এহানই চলিয়া আহেসেহান। দেহ বুদ্ধির প্রাধান্যে ছাকতি প্রাধান্য ঘটের বারো আত্ম বুদ্ধির প্রাধান্যে ছাকতি প্রাধান্য দেহা দেব। হবাহান অক্ বুলেকুরা উগর্তা তপস্যার প্রয়োজন; কারণ তপস্যালোই পুণ্য প্রাপ্তি অর। পুণ্যএহান বুলতে নুঙেইপার, জ্ঞানর বারো আত্মবিকাশর হেতু হান্। তারো যদি সংসারে কোনগ বুদ্ধিমান্গো অর ঔগয় পুণ্যার্জনর হত্মা করের যেহান্ তপস্যালোই সম্ভব। তপস্যা মানেই কোন বৃহৎ মহৎ বৌদ্ধিক প্রভাব প্রাপ্তির সালে দেহগরে সংযম করিয়া তৎপ্রাপ্তির হত্মা করানি। পক্ষান্তরে ভোগলো পুণ্যক্ষয় অর। ভোগ মানেই দেহগরে নুঙেই দেনির বৃত্তি। দেহর নুঙেইপা যতই বাড়ে বারো ঔগদে যতই প্রবৃত্তি দেনা অর ততই বৌদ্ধিক বা আত্মসত্তার প্রভাব বা বিকাশ কমর বারো দেহবুদ্ধি বা পশুবুদ্ধির প্রভাব দেহাদের ফলে অহংকার মদমত্ততা সংঘাত জীবনে উপরহা। এহানই প্রমাণহান্ যে ভোগল পুণ্যক্ষয় অর বারো পাপার্জন অর। পূর্ব জন্মে তপস্যালো অর্জিত পুণ্যফললো আগো হয়তঃ নুঙেইপা গরে জরম অইল। ঔগ যদি ছুপ্ তপস্যার দৃষ্টি ভঙ্গি না থয়া ভোগবাদীগ অর উতাইলে ঔগয় পুণ্যহানি লমনির পিছে দুঃখভাগী ও পাপী অর। তারো যেগর জন্ম যেপেয়ও অর তপস্যা বুলিল প্রবৃত্তি হান্ থাইলেতে উগর্তা পুণ্যার্জন অর বারো ঔগর জীবাত্মার উর্দ্ধগতি অবশ্যসম্ভাবী। নুঙেইপারগরে জরম অয়া সত্যর সালে ত্যাগাদি তপস্যা করেকুরা মানু জগতে বিরল যদি কোনগ অয়া থার ঔগ মহাপুরুষগ। রামচন্দ্র, যুধিষ্ঠির প্রমুখ চরিত্রে দেহ বুদ্ধিরে গৌণ করিয়া সত্যপালনাদি জীবাত্মার উর্দ্ধগতির সালে যে তপস্যা আচরণ করে গেলাগা ঔতালো তানু পরিণামে সুখদ অসিলাং বারো অন্তকালে পরম গতিং গেসিলাগা “ইহ অধিলং ভুঞ্জা অস্তেচ পরমাং গতিমাণুয়াং”। পক্ষান্তরে রাবণাদি চরিত্রে তপোবনে রাবণ ত্রিজগৎ “বিজয়ী পুণ্যার্জনর সালে অইল কিন্তু যেবাকাই সীতাহরণাদি ভোগবাদে গেলগা ঔবাকাই পুণ্যক্ষয়ে তার নাশ প্রাপ্তি অইল।

তারো ব্যক্তি, সমাজ বারো রাষ্ট্র জীবনে যদি বিকাশ যশকীর্তি পানার কারো অভিলাষ থার, উতাইলে গিরক ঔগর্তা অবশ্যই তপস্যার পথ অবলম্বন করানি লাগতয়। তপস্যা মানেই সত্যকা ত্যাগর মাধ্যমে হত্মা অথবা নিত্যবস্তু রক্ষার সালে অনিত্য দেহাদি বস্তু ত্যাগলো জীবন ধারণর হত্মা। ভোগবাদীগ অয়া বিকাশ যশ কীর্তির অভিলাষ করের ঔগতে জগতর ক্ষতিকারকগ অর; কারণ ভোগী পুণ্যক্ষয়ীর আচরণ বিধি ঔতা সমাজে বা রাষ্ট্রে যেবাকাই সিতারানি অইতয় ঔবাকাই সমাজে বা রাষ্ট্রে সাধারণ মানুরাং অহংকার, মদমত্ততা, হিংসা বিদ্বেষাদির বীজ পরোক্ষে সিতারানি অর ফলে মানব সমাজে বা রাষ্ট্রে অশান্তি, দুঃখ ও নাশাদি অইতে বাধ্য পৃথিবীহানও পাপীর ভারে আক্রান্ত অইরি। তারো মানব জীবনর চতুরাশ্রমেই ভিন্ন তপস্যা সত্যবাদী জিতেন্দ্রিয় বারো ত্যাগী পুরুষ সমাজে বা রাষ্ট্রে নায়ক অইলে ঔ সমাজ রাষ্ট্রর শান্তি মঙ্গল যেসাদে ও অইতয় পুণ্যার্জন অইতয় মানু সুখ শান্তি বারো উর্দ্ধগতির পথে যিতাইগা অন্যথা ভোগবাদীর পৌরহিত্যে বিপরীত ফলাবস্থা অর্থীং ভ্রষ্টাচার পাপাচার স্বৈরাচারাদি প্রবল অয়া জগৎ নাশর পথে যিতাইগা। অত, নিজর সমজার দেশর সালে তপস্যা করিক পুণ্যার্জন অক সবহিতার্থে বারো ভোগবাদ স্বার্থবাদ বর্জন করিক পুণ্যক্ষয় নাক পাপার্জন নাক জগদ্ধিতায় হাবিয়ে ‘তপসা পুণ্যার্জনম, ভোগেন পুণ্যক্ষয়ঃ’ এহানর তাৎপর্যার্থহানি লয়া জীবন সার্থক করিক। বিস্তরেনালম্।

Space Donated By

☎: 265825

M/S. CHOUDHURY OFFSET,
NORMAL SCHOOL ROAD (TARAPUR), SILCHAR - 788 003

Sales & Services of :

CANON PHOTOCOPY (XEROX)
MACHINE & SPARES,
OFFSET PRINTING MACHINE ETC.

Welcome to consumers & wellwishers.



केनरा बैंक

(भारत सरकार का उपक्रम) (प्रधान कार्यालय - बेंगलूर - 560 002)

CANARA BANK

(A Government of India Undertaking) (H.O. Bangalore - 560 002)



संदर्भ सं/Ref. No.

तार/Grams :

दिनांक/ Date:

फोन/Phone : 268417

ACTIVITIES OF CANARA BANK

1. Helping the down trodden by lending under DRI Scheme.
2. Lending under all Govt. sponsored schemes.
3. Promotion of SHGS and credit linking them.
4. Excelling under KVIC finance.
5. Highest CD ratio in Barak Valley.
6. Highest participation in Fisheries Loans & Bank with social cause.

No. 1 among Nationalised Banks in quantum of business. First National Bank to achieve profit exceeding 1,000 crores (1019 achieved).

FOR : CANARA BANK

Sd/-

Officer / Manager
Govindapur, Assam

K. EBENEZER PREM KUMAR

MANAGER SP NO. 24927

ভগবন্ সৌভরি

— শ্রী বনবীর সিংহ

ঋষেদর ঋষি, দয়ার প্রতিমূর্তি ভগবন্ সৌভরির কথা বেদ, উপনিষদ বার পুরাণে পেয়ার। সৌভরি 'সংহিতা' আহানৌ বহুল প্রচলিত। বৃন্দাবনমণ্ডলে কালিন্দীর পারে রমণক বুলিয়া দ্বীপ আগত ঋষি সৌভরির আশ্রম। বর্তমানে রমণক দ্বীপ সুনরখ বুলিয়া খ্যাত। যমুনার পানীত বুরিয়া ঋষি সৌভরি লিশিং বছরর তপস্যা ত ব্রত অসিল। দিন আহান মস্যাজীবি কতগয় অজান্তে ও ফামে মহাজাল নিক্ষেপ করলা। ডাঙর মাছ আগ ধরা পরিল বুলিয়া হারৌ এ মারাণ্ডে জালহান তুলিয়া কাকরতেই মুরে আত দিলা। হাঃ এহানতে কিহান? স্বয়ং ঋষি সৌভরি জালে আবদ্ধ। ডরে শংকায় ঋষির শরণ লইলা। দয়ালু ঋষি, অভয় দিয়া তানুরে মাতল 'তুমি মস্যাজীবি, মস্যশিকার তোমার পেশা, যেহেতু মি তোমার জালে বদ্ধ মোরে বেছিয়া তুমি ধন সংগ্রহ কর।' ঋষির কথাত আরাকৌ বিচলিত অয়া অনুনয় বিনয় করিয়া ঋষিরাও সমাধানর পথ দেনার হেইচা কাতকরলা। ঋষিয়ে মহারাজাও এ বার্তা ফৌকরানির য্যাথাও দিল। বার্তা শ্রবণে চিন্তিত বিচলিত রাজা ত্বর অয়া রমণক দ্বীপ তালকরে সালইল। ঋষির দূরবস্থা অবলোকন করিয়া কিংকর্তব্যবিমূঢ় অয়া পরিল। নতজানু অয়া করজৌড়ে ঋষিরাং ভক্তি কাত করিয়া মাতের ভগবন্। তোর মূল্য নির্ধারণ করানির মত ধৃষ্টতা এজগতে কারতাও নেই, পৃথিবীত এমন কি ধন আছে যেতার বিনিময়ে ঋষিবরর মূর্তিপন দেনা পাকইব? বিচলিত রাজারে অবলোকন করিয়া ঋষিয়ে মাতল 'সুরভি গাভীর প্রতি লোমে লোমে লিশিং লিশিং দৌ-দৌলাশার অধিষ্ঠান, ও সুরভি গাভীর বিনিময়ে মোর ক্রয়মূল্য শোধ কর।' মহারাজাই কপিলা গাভী আগ দিয়া ঋষিরে মুক্ত করেছিল বার মীন ব্যবসায়ী উগীরে যথাযোগ্য ধনসাম্পাল দিয়া বিদায় দিয়া দেসিল।

দিন আহান ঋষি সৌভরির আশ্রমে আয়া মস্য শিকারে ব্রতী অসিল পক্ষীরাজ গরুড়। গরুড়র আগমনে মস্যকূল ছটফট করানি অকরলা। মস্যকূলের দূরবস্থা দেহিয়া ঋষির মনে করুণার সঞ্চার অইল। মস্যকূলের গরুড়র আতেত রক্ষা করানির নিঙে গরুড়রে মস্যশিকাবেত্ত বিরত অনার আদেশ দিল। বকে টাটিয়ে জর্জরিত গরুড়, ঋষির কথাত কর্ণপাত নাকরানিয়ে ক্রোধান্বিত ঋষি গরুড়রে অভিশম্পাত দিয়া মাতল, আজিগুপরি যেগয় এ রমণক দ্বীপে জীব হত্যা করতায় তানুর মরণ অনিবার্য। ও দিনেত্ত রমণক দ্বীপ হিংসা, দ্বেষমুক্ত।

সময় আহানাত গরুড়র অত্যাচারে অতীষ্ট অয়া নাগগোষ্ঠী তিলয়া সিদ্ধান্ত নিলাগা, পালা করিয়া নিক্কা নিক্কা আগেইগ গরুড়রাং যানা। দিন আহান কালীয় নাগর পালাহান। কালীয় নাগে নির্দিষ্ট ফামে গিয়া গরুড়র বলি ভক্ষণে ব্যস্ত অয়া থাইল। পক্ষীরাজ গরুড় কালীয় নাগর এ দুষ্কর্ম দেহিয়া সৌঅয়া কালীয় নাগরে আক্রমণ করল, কুনরকমে গরুড়র আতেত্ত রক্ষা পেয়াই কালীয় নাগ ঋষি সৌভরির শরণ লসিল বার নির্বিষয়ে নিরাপদে মনর সুখে ঋষির আশ্রমে বাস করিয়া আসিল। ও অহি বা কালীয় নাগর নাঙে ইলয়া রমণক দ্বীপর নাঙে অহিবাস বার ঋষি সৌভরির বংশজ হাবি অহিবাসী বুলিয়া পরিচিত অইলা। ঋষি সৌভরির বিয়াও অসিলতা অভিনব উপায়ে।

ঋষি সর্বদাই পানীত বুরদিয়া সমাধিমগ্ন অয়া তপে ব্রতী অর। দিন আহান পানীর তলে সমাধি ভঙ্গ অনাত মস্য পরিবার আহানর যৌবনর খেলা লীলা, মিথুন ক্রীড়া দর্শনে পরেছিল মিকুপ আহান। ঋষির ভাবর পরিবর্তন অইল, কামনা ভাব আয়া দেহা দিল। 'এতদিন মি এ সংসার সুখেত্ত বঞ্চিত অয়া আসুতাক? পানীহানাত্ত কায়াই অযোধ্যার রাজা মাঙ্কাতারাং বুলিয়া সালইল। রাজা মাঙ্কাতার য্যাঙখেইগ নিঙল আসিলা। মহারাজে পাদ্য অর্ঘ্যাল ঋষির আপ্যায়ন করিয়া যথাযোগ্য আচরণ বিধিল গোদান দিয়া আতজোড় করিয়া ঋষির আগমন বার্তা আঙকরানিত ঋষিয়ে মাতল, "রাজন মি গৃহস্থ সূখ উপভোগ করানি মনাউরি, তারো তর য্যাঙখেইগ নিঙলর আগ মোরাও সম্প্রদান কর।"

ঋষির কথা হনিয়া মহারাজ স্তব্ধ অইল। কিংকর্তব্যবিমূঢ় অয়া বিনয় করিয়া মাতল "হে ভগবন্! মোর নিঙলসৌ হাবি অন্ত-পুরে আপনি পদার্পন করে দিয়া দিলে, যে নিঙলগয় ঋষিবররে বরণ করতই ও নিঙল উগ মি ঋষিবররাও সম্প্রদান করে

দিয়া দিতো।” মনে মনে মহারাজায় খালকররেসিল মোর রূপসী সুশ্রী যুবতী নিঙল এ লিশিং বছরর বৃদ্ধ বনবাসী ঋষি এগরে পছন্দই নাকরতাই। তা’র হরপগৌ মরতই লাঠীগৌ নাভাগতই অর্থাৎ মোর রাজ্যপাট ঋষির অভিশাপেত্ত মুক্ত অইতয় বার মোর নিঙলও এ বৃদ্ধ এগরাঙ সম্প্রদানর কথা নেইঅইতৈ। অন্তর্যামী ঋষি মহারাজর অভিশ্রায় হারপেয়া সুদর্শন যুবক আগর বেশে অন্তঃপুরে গিয়া হমেইলগা। ঋষি সৌভরির এ অপরূপ রূপলাবণ্য দেহিয়া হাবিগী নিঙল মুগ্ধ অইলা। বার ঋষি সৌভরিরে মনে মনে পতিরূপে বরণ করলা। মহারাজ প্রতিশ্রুতি পালনে বাধ্য অইল। তার য্যাঙথেইগ নিঙল ঋষি সৌভরির আতে সম্প্রদান করে দিয়া দিল।

হাবিরেল ঋষি সৌভরি আশ্রমে ফিরিয়া আহিল। দেব কারিগর বিশ্বকর্মার স্মরণ করিয়া স্বর্গতুল্য সুখ আনন্দ উপভোগ করিয়া থানার মত য্যাঙথেইগ মহল হঙকরেদেনার হেইচা জানেইল। ও অমরাপুরীত তপোবনে ঋষি য্যাঙথেইগ সৌভরির বেশে গৃহস্থ সুখে মত্ত অয়া থাইল। জরম অইলা আটগ করে জিপূত প্রতি ভাৰ্য্যার ঔরষে। ক্রমান্বয়ে রমণক দ্বীপ পরিপূর্ণ অইল ঋষি সৌভরির জিপূত, নাতিনাতে। ডাঙর অইল পরিবার, দেহাদিল সাংসারিক ঝামেলা, নানান অশান্তি। এতদিনে ঋষির হুস পরিল। হাঃ এহানতে কিহানে? মিকুপ আহানর মিথুনক্ৰীড়া দর্শনে আজি মি সংসারর মায়াজালে বদ্ধ, সংসার যন্ত্রনায় জর্জরিত। বিষয়ীর ক্ষণিক সংসর্গত এসাদে দুস্পরিণাম! মনে এভাব উদয় অইতেই বিদগ্ধ ঋষির থতান্ত কাম্মার সুরে নিকুলিল হকগ।

“অহো, ইমং পশ্যত মে বিনাশং তপস্বিনঃ

সচ্চরিত ব্রতস্য অন্তজলে বারিচর প্রসঙ্গাৎ

প্রচ্যাবিতং ব্রহ্মচিরং ধৃতং যত্।।”

সঙ্গাৎ ত্যজেত মিথুন ব্রতিনাং মুমুক্শুঃ

সর্বাত্মনা ন বিসৃজেৎ বহিরিন্দ্রিয়ানি।

ত্রকশ্চরণ রহসি চিত্ত মনস্থ ঈসে

যুগ্মাত তদ্ ব্রতিসু সাধুসু চেৎ প্রসঙ্গঃ।।

নিঃসঙ্গতা মুক্তিপাদং সঙ্গা দশেষাঃ

প্রভবন্তি দোষাঃ

আরুঢ়যোগেৎপি নিপাত্যেহঃ সঙ্গেন যোগী

কিমুতান্ন সিদ্ধিঃ।।

চেই! চেই! মোর পতন এহান চেই। ব্রতচারী সচ্চরিত তপস্বীগ আসিলু। পানীর ভিতরে মিকুপ আহান মস্যামিথুন ক্রীড়া দর্শনে বর্ষলব্ধ ব্রহ্মতেজ বিষয়ভোগে হারেইলু। মুমুক্শু অর্থাৎ মুক্তি অভিলাষি ভক্তর কুনদিন মৈথুন ক্রীড়া রত প্রাণীর সংস্পর্শে আনা থক নেই। সংসংগ বার নিঃসঙ্গ জীবন যাপনেই মুক্তিমাৰ্গ পানার একমাত্র পথগ, সংগদোষে হাবি অধঃপাতে যারগা এমনকি যোগীও পথভ্রষ্ট অইতারা। অল্পসিদ্ধি সম্পন্ন মানুর যারিতে নাদিয়ানেই শ্রেয়।

ঋষি সৌভরি পরবর্তীকালে বানপ্রস্থ অবলম্বন করিয়া ব্রহ্মো লীন অয়া গেলগা। ঋষি সৌভরি জীবপ্রেমিক আগ আসিল, প্রাণীমাএর প্রতি দয়ার ভাবনায় সত্যিকারর সাধুতা।

জীবে প্রেম করে যেইজন

সেইজন সেবিসে ঈশ্বর

(গিরক্ এগ শিলচরে A.C.F গ অয়া সমাজর কামে হাবিতাত্ যৌ’অ পারেরগ)

— ০০০ —

পত্ৰিকাৰূহনৰ নযমখানি

- ১। জুলাই ২০০৩ ইংৰেজীও বিষ্ণুপ্ৰিয়া মণিপুৰী সাহিত্য সভা পত্ৰিকাৰূহন তিন মাহা পিছে পিছে নিকালানিৰ হুনা কৰেছি। (বৈশাখ, হাওন, কাৰ্ত্তিক, মাঘ)।
- ২। লেখক গিৰিগিথানিয়ে তানোৰ প্ৰবন্ধ, কবিতা, য়াৰি, উপন্যাস, নাটক, রম্য রচনা বা আর আরতা নিজৰ কপি থয়া খানি ডাঙৰ আখৰে লিখিয়া দিয়াপেঠাদিবাং। লেখা চেৰ পিঠি আহানাৎ ইকরানি অক্।
- ৩। জমা অইতয় লেখা ফিৰং দেনাৰ দায়িত্ব নেনা নুৰাৰিয়্যার।
- ৪। পত্ৰিকাৰূহনৰ বছৰৰ সংখ্যাৰূহনীৰ দামহনী ৮০ টাকা। কপি বা সংখ্যা আহানৰ দাম হুদা রূপা ২০.০০ হান।
- ৫। বিতৰ্কিত লেখা গ্ৰহণযোগ্য নাগয়।
- ৬। সৃষ্টিকামী সাহিত্যৰ ভাঙাৰ আগ হংকরানিৰ হুনাহানাৎ হাবিয়ে পাংকরিক।
- ৭। সমাজৰ ভেদাভেদ মূলক লেখা প্ৰকাশ করানি নাইতয়।
- ৮। পত্ৰিকাৰূহনৰ বানান পদ্ধতি সম্পাদক বারো পরিচালক মণ্ডলীৰ আতে থাইতয়।
- ৯। বিষ্ণুপ্ৰিয়া মণিপুৰিৰ কৃষ্টিকলা ঐতিহ্যৰ বারো লয়াৰ লয়াৰ অপ্ৰকাশিত হোভা য়্যারী অগ্ৰাধিকার পেইতয়।
- ১০। সৃষ্টিকামী সমালোচনা সাদরে গ্ৰহণ করানি অইতয়।
- ১১। এজেণ্টরে ১০% কমিশন দেনা অইতয়।
- ১২। যোগাযোগৰ ঠিকানা :- মুখ্য সম্পাদক - তিন মাহিয়া বিষ্ণুপ্ৰিয়া মণিপুৰী সাহিত্য সভা পত্ৰিকা।
(লেখা দিয়া পেঠানিৰ) Kathal Road, Zero Point Lane, Silchar - 5 (Assam).
Tel. : 241140
- ১৩। পত্ৰিকা প্ৰস্তুিৰ স্থান :- Secretary Business Management, Kathal Road,
Zero Point Lane, Silchar - 5 (Assam), Tel. : 2441140
- ১৪। চাঁদা, অনুদান, বিজ্ঞাপন Secretary Business Management,
দিয়া পেঠানিৰ ঠিকানা :- Kathal Road, Zero Point Lane, Silchar - 5 (Assam),
Tel. : 03842 - 241140

“কতি ঘুমিতাই উঠ ক্ষত্ৰিয় সন্তান”

— গীতিস্বামী



Chairman,
Board of Management

PHALEI

☎ : 2340204

Orion Tower, G.S. Road, Christian Basti, Ghy - 5



(Centre of Handloom, Handicraft & Garments
Outlet of North East Women's Welfare Society)

ফলেই

শাখা দোকান

রাজগড় রোড, ওয়েস্ট বাইলেন - ১২, ঘর নং - ৪৭

গুৱাহাটী - ৭৮৮১০০৭

ফোন : ২৫১৪০৪১

গুৱাহাটীত উত্তৰ-পূব ভাৰত বিমুখপ্ৰিয়া মণিপুৰীৰ হস্ততাঁত - বস্তুশিল্পৰ ফুটিফালিৰ দোকান। বিভিন্ন প্ৰাদেশ, বিশেষ কৰে মণিপুৰ, নাগালেণ্ড, উড়িষ্যা, বেংগল, বিহাৰ, অৰুণাচল, মিজোৰাম, গাৰো, অসমীয়া হেণ্ডলুম বাৰো হেণ্ডিক্ৰফটৰ মূলভ মূল্যৰ নিৰ্ভৰ যোগ্য দোকান। বিয়া, পূজা-পাৰ্বৰ, উৎসব-অনুষ্ঠান আদিৰ দূতিফালিৰ বেচা-কিনাৰা কেন্দ্ৰ। ১৯৯৬ ইংৰাজীত সেৱাত ব্ৰতী আছেহান।

North East Womens' Welfare Society ৰ হঙকৰা ফুতি-ফালি-ভাৰ-পাবাৰ একমাত্ৰ বিক্ৰয়াকেন্দ্ৰ।

পৰিচালক

ফলেই

**Culture Handloom, Habit Handloom
Support Poor Women Weavers of the North-East.**